

## DUCASËN DADA UAID

Mibi ismenuequin dada uaid Ducas nebi.

<sup>1</sup> Utsin-utsinquien ambi naidbëdtabi Esuquidistu chuibanquin dada uaid dadpen iquec. <sup>2</sup> Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. <sup>3</sup> Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aitedi mibi chuibanquin dada uaimbi, chuiquid dapa, Teyopido. <sup>4</sup> Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

*Uan, acten mentoanquid tishte chiaid*

<sup>5</sup> Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. <sup>6</sup> Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. <sup>7</sup> Edisabed bacuë tishesa icpanëdash. Adquid yequi aton bënëbëdi tsusio budpanëdash.

<sup>8</sup> Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. <sup>9</sup> Ambi noadte

bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uatsaidëmpi abia puduenacsho isacpadec Sacadias puduedpanëdash. <sup>10</sup> Noadte bëda tauinuc utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

<sup>11</sup> Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash.

<sup>12</sup> Adec tabadsho isash dacuëdampambo iquec, quetanec Sacadias uëdëquiampanëdash.

<sup>13</sup> Adsho isash Nuquin Papan uaid mayan bëda nadpanëdash: –Bacuë bunquin mimbi chian-chiamboed Nuquin Papan tantiaidquio neque. Dacuëdenda, Sacadias. Min chido Edisabedën min mado tishendac. Min mado tishacsho Uan cuënta. <sup>14</sup> Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiaish matses dadpen bëdambo iquendac.

<sup>15</sup> Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. <sup>16</sup> Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho

Nuquin Papa nec, queoaindac. <sup>17</sup> Min mado Nuquin Icho bëyucanec choendac. Tsusedpa Ediasën chiampicpadquiequi dachuëdenquo icquin cuembo chuibanquidquo min mado iquendac. Aden chuibanquid Nuquin Icho bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquo nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquo iquendac. Nuquin Icbon matses aido icmenuen min madon chuibanendac – quepanëdash Nuquin Papan uaid mayan bëda.

<sup>18</sup> Aden Nuquin Papan uaid mayan bëdan chiaquien Sacadiasën: –¿Mitsipadentsimbi mimbi chuiboed tantiape? Con chidobëdi tsusio budpobi –capanëdash.

<sup>19</sup> Adoquien: –Ëbibi, Cabaded nebi. Nuquin Papan abëd tabadquin namiaidquo nebi. Nuquin Papan ambi chiacpadomboen mibi chuimenuen chomiaid nebique. <sup>20</sup> Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantiengquo icsho mibi eme uaindac. Min chidon bacuë tishan padpidec mibi onquianoaindac –quepanëdash Nuquin Papan uaid mayan bëda Sacadias caic.

<sup>21</sup> Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo. <sup>22</sup> Aden yuen caimbudnubien puduenash onquenequi buëd cuëdenquiocpanëdash Sacadias. Adsho

isun: —Ushquin isachimboen isbenac — cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

<sup>23</sup> Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash.

<sup>24</sup> Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash.

<sup>25</sup> Adec tabadec Nuquin Papan naid chiec naded Edisabed onquepanëdash: — Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Èbi tantiaquin Nuquin Papan usundomiaid nebi —quepanëdash Edisabed.

### *Esus tishendac, quequin chiaid*

<sup>26</sup> Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash.

<sup>27</sup> Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash.

<sup>28</sup> Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icho mibëdi tabadendac —capanëdash Cabadedën.

<sup>29</sup> Adoquien Madia, ¿Atotsi quepeba? quequin otacquo tantiec tsadpanëdash.

<sup>30</sup> Adec tsadsho isun Cabadedën: —Dacuëndenda. Mibi bëdamboen tantiaquin Nuquin Papan naden nanu quequin chiaid nad iqueque.

<sup>31</sup> Chuinu. Tantiata.

Bacuë usundoshon min mado mimbi tishendac. Tishun, Ĕm̄bi tishaid Nuquin Papa yacno yuedanquidquo nec, quequin Esus cuënta. <sup>32</sup> Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuededpendac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. <sup>33</sup> Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

<sup>34</sup> Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

<sup>35</sup> Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquo Madia usundomiaid, icsa nibëdquid, Nuquin Papan madombobi nec, utsibon cabededendac. <sup>36</sup> Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. <sup>37</sup> Utsin natiapimbo yaid Nuquin Papan naidquo nec —quepanëdash Cabaded.

<sup>38</sup> Adoaquien Madia: —Ai, con Icbon nami-aidquo nebi. Ma mimbi chiacpadquo icpanuna —quepanëdash. Aden chiaquien Cabaded nidpanëdash.

### *Madia Edisabed isedec nidaid*

<sup>39</sup> Adashic, aton na nacnenanec Madia tsusedpa Udan tsyuecquidon nidaid macuësh yacno badedi

nidpanëdash. <sup>40</sup> Adec nidashic Sacadias oncamenquo yaidën shubu yacno choec puduedshun Sacadiasën chido, Edisabed istuidash: — Mibi isnuec chobi —Madia quepanëdash. <sup>41</sup> Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed <sup>42</sup> Madia chiec nadec comapenec onquepanëdash: —Nuquin Papan bëdamboshë icmiaidquo mibi nec. Mimbi usundoaid adembidi bëdamboshë icmiaidquo nec. <sup>43</sup> Nuquin Icbon tita mibi yec ¿atotsi quiash ëbi isnuec cho? <sup>44</sup> Mibi isec chobi, mibi quesho ëmbi tantianubi, Cuis-hon, quiacbimboec con bacuë cuididiquianosh. <sup>45</sup> Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

*Nuquin Papan naid chiec Madia cuëdënaid*

<sup>46</sup> Adnubien Madia nadec onquec cuëdëmpañdash:

“Nuquin Papan naid chuibanu. Tantia.

<sup>47</sup> Ëbi usundomiaid Nuquin Papa yacno Yuedanquid nec, quequin tantiec bëdambo iquebi.

<sup>48-49</sup> Ëbi ambi namiaid icsho bëdamboen isquin Nuquin Papan naosh.

Adoacsho, Nuquin Papan bëdamboshë icmiaid Madia nec, quequin abitedishunquo tantiabededendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

<sup>50</sup> Ambi chiaid tantiaquin naquid icsho,

Mimbi naid icsa cuidnu, quenquiocquin abëdi  
shubu abentsëquën tabadac bimboecnuc  
adquid tabadmendac.

Adenuidi tantiaquin nampidquio abi iquec.

<sup>51</sup> Nadatiambocquin naded-nadedquidquio  
Nuquin Papa nec.

Ëmbibi tantiacpadomboen naimbi, quequid ic-  
sho isun Nuquin Papan cacumiac uano  
tabadendac.

<sup>52</sup> Ancanquid dapa icboedi utsin namiaidquio  
adquid iquendac.

Utsin namiaid icboedi chuiquid Nuquin Papan  
icmendac.

<sup>53</sup> Ambi chiaid tantiec bëdamboec tabadte  
comapenec bunquiacpaden naquidquio  
Nuquin Papan icmendac.

Con na ëmbi bedaiduidi tantiec bëdamboec  
tabadebi quequid unësacsho cacumiac uano  
tabadendac.

<sup>54</sup> Chuiquid Dapa Abentsëcquiobi chidon  
usundoendac, quequin ambi tsusedpabo  
chuiamiampicpadomboen Nuquin Papan  
ëbi usundomiac.

<sup>55</sup> Tsusedpa Abadauambëdta aton tsyuecquidtedi  
ambi tantiampicpadomboen Nuquin Pa-  
pan ëbi usundomiac.

Mimbi usundoaid ëbi yacno yuedanquid nec,  
quequin Nuquin Papan ambi tantiampic-  
padembi ëbi isec,”

quec comapenec cuëdëdash Madia ënëdpanëdash.

<sup>56</sup> Adec ënëdash Edisabedbëd ushë daëd nidmec  
tabadashic ushë utsi nidbudtsëcnubi aton  
shubuno nidoapanëdash.

*Uan tishaid*

<sup>57</sup> Adnubien Edisabedën bacuë tishthe ushë chonoc dada bacuë tishpanëdash. <sup>58</sup> Bacuë tishenquiochoedëmbi nëbi aton bacuë tishosh, qesho tantiash aton matses ado shubu utsinquidotedi Edisabedbëd bëdambo icpanëdash.

<sup>59</sup> Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi

<sup>60</sup> Edisabed: —Padenquio. Abi cuëmëdquid Uan nec —quepanëdash.

<sup>61</sup> Adoaquien utsibo: —Min matses utsi Uan cuëmëdquid nibëdec —qeshun <sup>62</sup> Sacadias ismenuequin mëdante uic-uiccaquin: —Abi cuëmëdquid chui. Tantianu —capanëdash utsibon.

<sup>63</sup> Adoaquien dada uate bedshun, Abi cuëmëdquid Uan nec, quequin dada uaquin Sacadiasën ismepanëdash.

Adoaquien: —¿Abimboda mimbi cape? — quecuededpanëdash utsibo.

<sup>64</sup> Adnubien Nuquin Papan oncameoac Nuquin Papan naid Sacadiasën chuibampanëdash.

<sup>65</sup> Aden chuibansho tantiash: —Dacuëdampambo iquec. ¿Atotsiepashun onquenquiochoedëmbi nëbi onquequin Nuquin Papan naid chuibampec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash. <sup>66</sup> Adoac: —¿Mitsipadquidquio aton mado nepec? —quecuededpanëdash Sacadiasën mado Nuquin Papan tantiamiaidquio isbededec.

*Sacadias oncamiaid*



<sup>67</sup> Adnubien Uanën papa Sacadias Nuquin Papan Mayanën oncamiac nadec Esus chiec onquepanëdash:

<sup>68</sup> “Nuquin Papa isadaidbon Icbo nec, quequin chuibanuna.

Aidën isadaidbo icsaquid icsho cuidnushe quiash abided

cuidadquid chomiac mayan icsan yuaid icboedi aidën

mënchictequidquio isadaidbo iquendac.

<sup>69</sup> Abi mënchicquid nadatiamboquid nendac.

Tsusedpa Dabidën tsyuecquidquio aid nendac.

<sup>70</sup> Ambi chuimiaidon chiampicpadembi

Nuquin Papan adquidquio icmianac.

<sup>71-73</sup> Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo

aton tsyuecquidbëdtabi abi chieshënquido

nidtiapimbo yacnombo abi yacno yuedanquid

Nuquin Icbo Abentsëcquiobi nec.

<sup>74</sup> Abi cudasquin mënchicaid yec dacuëdenquio yec

Nuquin Papan namiaidombo iquendac.

<sup>75</sup> Adquid yec icsaisa abipadquio bëdamboec tabadquid icsho

nuqui aidën isendac ënenquiocquin.”

Adec Esus chiec onquiashic nadec aton mado chiec Sacadias onqueoapanëdash:

<sup>76</sup> “Adnubien nëbi Nuquin Papan chomiaid chuibanquidquio

mibi nec, quequin utsibon mibi cuënendac, mado.

Nuquin Icbo choec, quequin utsibon tantiabicnuc bëyuc tantiashun abi chuiquidquio mibi iquendac.

77 Adquid icquin mibi icsaquid icscho cuidnushe  
quiash

abided cuidadquid tantiasho isash Nuquin Papa  
mibi icsaid tantienquio yec bēpiscudendac,  
quequin chuibanquid mibi iquendac, mado.

78 Nuquin Papan matses tantiaquin naquidquio  
icquin  
abipadquidquio icsaisa abi yacnoshon chomi-  
aidquio iquendac.

79 Aidën tantiamiac unēsash abi iquendac.

Adquid shubu abentsēquën tabadacpadece  
tabadendac,

quequin mimbi chiendac, mado,”

quec Uanën papa Sacadias Nuquin Papan  
Mayanën oncamiac onquepanēdash.

### *Matses nibēdacno Uan tabadcueniaid*

80 Adashic, Sacadiasën bacuë Uan caniacsho  
Nuquin Papan tantiamiaid yequi matses  
nibēdacno tabadcuenepanēdash ambi Esus  
chuibante ushë choabicnuc.

## 2

### *Esus tishaid (Mat 1.18-25)*

<sup>1</sup> Adnubien, Doma yacno tabadquid, isadaidbo  
ancaquid dapambo, empedadod caid, Aucusto  
cuēmēdquid icpanēdash. Aucuston, ¿Ēmbi  
ancaido isadaidbo aton nabēdta tedtsi iqueque?  
Isquin tantiata, quequin Sidenio cuēmēdquid  
chuiapanēdash. <sup>2</sup> Sidenio nidaid Sidia caid  
yacnocquido chuiquid, cobednadod caid  
icpanēdash.

<sup>3</sup> Min tsusedpa tishampid yacnoshon mibi cuëmédquid mitsanabëdtabi dada uanuec nidtan, cac abëd icquido buanec isadaidbo nidanepanëdash.

<sup>4</sup> Adec utsibo nidnubien Ose aton chido Madiabëdi nidaid Cadidia caid shubu dadpen icquid Nasaded caid yacnoësh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanëdash. <sup>5</sup> Aton chido Madia bacuë nua usunquidbëdi Ose abi cuëmédquid aton nabëdtabi dada uanuec Beden yacno chopanëdash. <sup>6</sup> Ambo choquin aton bacuë nuambo usumpanëdash. <sup>7</sup> Ambo matses dadpen cho-choash shubu abitedi puduedash tsucus-tsucustsëcquo tabadnuc nidaidën capuquid tabadacno puduedshun ambi bëyuc usundoaid Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

*Obeca pemebanquin buanquido Nuquin Papan uaidon chiaid*

<sup>8</sup> Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash. <sup>9</sup> Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenuc obeca pemebanquin buanquido dacuëdcuededpanëdash. <sup>10</sup> Dacuëdsho isash: —Chiaid bëda chuinuec chobique.

Dacuëdenquiocquin tantiata. Chuinu. Ęmbi chuitequid bēda mibi, Cuishon, quetequid nendac. <sup>11</sup>Nēbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. <sup>12</sup>Abi tishacno nidshun naden mimbi aidi ispec. Dashcute cuēsh-cuēshun dapucaid nidaidēn capuquidēn pete santen uesho mimbi istuidendac. Bacuēmpi adquiec uesho istuidash, Nuquin Papan chomiaid Quidistu nec, mibi quependac. <sup>13</sup>Aden chiec Nuquin Papan uaid mayan bēda onquenubien abēdi abipadquid utsi dadpen choash Nuquin Papan naid chiec nadedc cuēdēncuededpanēdash:

<sup>14</sup> “Nuquin Papa abucquio tabadquid abitedi uaquidquio bēdamboshē iquec.

Nuquin Papan bēdamboen isaido ma abēdi tabadpanuna,”

quec cuēdēmpañēdash. <sup>15</sup>Adec cuēdēnash Nuquin Papan uaido mayan bēdabo abuc nidoapanēdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiamboed bacuēmpi isnuec Beden yacno nidnu. Nid —quianec nidpañēdash. <sup>16</sup>Adec nidshun nidaidēn capuquidēn pete santen bacuē nanacsho istuidpañēdash. <sup>17</sup>Isanec nidquimbi ambi isboedbēdta ambi tantiaboed chiac <sup>18</sup>tantiaquidtedi: —¿Midapadquidien capec? — quecuededpañēdash. <sup>19</sup>Aden obeca pemebanquin buanquidon chiaid tantiash bēpiscudenquio yec Esusēn tita, Madia, ¿Mitsipadquid con bacuē nepec? quequin bēpiscudenquiocquin tantiadenepañēdash.

<sup>20</sup> Adnubien Nuquin Papan chiaid chuibocpadquiocsho isash obeca yacno choash obeca pe-mebanquin buanquido: –Ëmbi isboed ëmbi tantiaboeed Nuquin Papan naidquio nec –quequin chiec onquecuededpanëdash.

*Nuquin Papa tabadte shubu uashunaid yacno Esus buanaid*

<sup>21</sup> Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chiacpadomboen cuënaid Esus nec, quequin Madian aton mado cuëmpañëdash.

<sup>22</sup> Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampañëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañëdash.

<sup>23</sup> Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. <sup>24</sup> Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bëdambocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpañëdash.

<sup>25</sup> Adnubien Edusaden yacnombo tabadquid Simeyon cuëmëdquid Nuquin Papan naden

nata quequin chiaid tantiaquin naquidquo icpanëdash. Aidi isadaidbo chuiquid dapa abentsëcquiobi cainquidquo icpanëdash. Aidi Nuquin Papan aton Mayan meniaidquo icpanëdash. <sup>26</sup> Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bëdamboen isaidquo choacsho unësabicquin isendambi, quequin tantiapanëdash. <sup>27</sup> Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquo nanuen aton bënëbëdtambi Madian Esus bëpanëdash. <sup>28</sup> Esus bësho isun Simeyonën Esus bedshun icucquin Nuquin Papan naid naden chuibampanëdash:

<sup>29-30</sup> “Abitedishun Icho icquin mimbi ëndenquo chiampid nëbi nëid isembi.

Nëid isash unësmane quenquo yec, Cuishon, quec unësebi, Papa.

<sup>31</sup> Mibi yacno yuedanquid nëbi isembi.

Nëid mimbi chomiaid icsho ma abitedishunquo ispanuna.

<sup>32</sup> Nëidëmbi mimbi tantiacpaden chuibanquin isadaidbo bëdambo icmendac,” quepanëdash Simeyon.

<sup>33</sup> Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash. <sup>34</sup> Esus chuibanquin naimbudshun Osebëdta Madia chiec Simeyon: —Bëdambo icmiaid mibi daëdi nec — quepanëdash. Aden chuishumbic Madiauidtsëqui naden Simeyonën chuioapanëdash: —Chuinu.

Tantiata. Nëid bacuë tantiesa isadaidbo utsi-utsiec icsho Nuquin Papan uquë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bēdambo iquendac. Min bacuë, Esus, Nuquin Papa yacno puduedmianquid nec, qesho tantiashun matses dadpeshun icsamboen chuided-chuidedendac. <sup>35</sup> Adsho ambi ompoquin naid icsabēdta ambi tantiaid icsa tantiamequid min mado iquendac. Adobanquin ismiac unēs uasho isash mibibi unēsquio yec, Con madon natiambo iquebi, mibi quendac –quepanēdash Simeyon Madia chiec.

<sup>36</sup> Aden Simeyonën chuinubi Nuquin Papan naden nanu quequin chiaid chuiquid chido Ana cuēmēdquid icpanēdash. Aidën papa Panued icpanēdash. Aidën tsusedpa Ashed icpampic. Aid aton bēnēn bedac abēdi seta 7ted matamiash tabadnubi <sup>37</sup> aton bēnē unēsapanēdash. Aton bēnē unēsan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mēmumbudnequin Nuquin Papa chuidenepanēdash. <sup>38</sup> Ambo icnubi Esus bēsho isun Anan Nuquin Papan naden nanu quequin chiampicpaden chuipanēdash: –Isadaidbo icsaquid icsho cuidnu caid mēnchictequid nëid nec –quepanēdash Ana Esus chiec utsibon tantianubi.

<sup>39</sup> Adashic, Nuquin Papan naden nata quequin chiacpaden nainash Osebēd Madia nidaid Cadidia caid yacno nidoash Nasaded caid yacno abi tabadacno choapanēdash. <sup>40</sup> Ambo tabadnubi aton bacuë Esus dada bēdambo yec canicuempanēdash. Aidi comapenen

tantiaquidquio Nuquin Papan bëdamboen  
isaidquio icpanëdash.

*Canicuenash Nuquin Papa tabadte shubu  
uashunaidën Esus tabadaid*

<sup>41</sup> Adashic, Ęmbi bëyuc tishaid unës uamenushe  
queshun intaquën aton shubu shëcuë ěcnoshcacsho  
isun aidon bëyuc tishaid unës menquiocquin Nuquin  
Papan uaid mayan bëdan matampampid tantiate  
ushë yanuc Madia Osebëd Edusaden yacno  
nidoapanëdash. Nuquin Papan chiacpadequi  
setan-setanquiec nidtenepanëdash. <sup>42</sup> Adecbidi,  
Esus abi tishaid seta 12ted yanash canicuenash  
anibëd Edusaden yacno nidpanëdash. <sup>43</sup> Adec  
ambo nidashic nami uabicquid petequid  
tantiaid ushëtedi tantiec tabadtenepanëdash.  
<sup>44</sup> Adec ambo tabadquin nainash Esus ambo  
icnubi tantienquio yec Madia Osebëd auëshquio  
nidoapanëdash. Adec nidash inchëshbudtsëqui  
abëd choboedo yacno capuquin Esus  
nibëmbenepanëdash. <sup>45</sup> Aden nibënquin istuidabi  
yec Edusaden yacno padpidec nidoapanëdash.  
<sup>46</sup> Daëdec ushquin nibënshun Nuquin Papa tabadte  
shubu uashunaid yacno puduedshun Esus  
tsadsho istuidpanëdash. Ambo tsadec Nuquin  
Papan chiaid tantiamequin chuibanquidbëd  
onquecuededsho istuidpanëdash. <sup>47</sup> Adec  
onquec tsadsho isquin, Bëdamboen tantiaquin  
chuibanquidquio nëid nec, quequin utsibon  
tantiabededpanëdash. <sup>48</sup> Adnubien, ¿Mitsipadquid  
con mado nepec? quequin otacquio Madian  
tantiapanëdash. Aden tantiequi: —¿Atotsi quiash  
ëbi daëdi tantienquio yec nëmbo choash mibi



tabade, mado? Unësquiocquin papabëdtambi mibi nibëmbeniombi —capanëdash anin.

<sup>49</sup> Adoaquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? <sup>50</sup> Aden Esusën chuisho anibëdtan Osen tantienquiocpanëdash.

<sup>51</sup> Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madian chiaidbëdta Osen chiaid tanti-aquin Esusën nadenepanëdash. Adec tabadnubi aton titan ambi isboedbëdta ambi tantienquio yaid bëpiscudenquiocquin tantiadenepanëdash.

<sup>52</sup> Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën isbededpanëdash.

### 3

*Esus choec, quequin Uan mentoanquidën chiaid (Mat 3.1-12; Mad 1.1-8; Uan 1.19-28)*

<sup>1</sup> Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi

icpanëdash. Ancanquid aidtedi icnubien Disanias cuëmëdquid nidaid Abidinia caid yacnocquido ancanquid cobednadod caid icpanëdash.

<sup>2</sup> Ancanquid aidtedi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacadiasën mado matses nibëdacnombo tabadshobi Nuquin Papan, Ëmbi chiaid chuibanta, capanëdash.

<sup>3</sup> Adoac acte Odan caid cuëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsambocquin naboed tantienquio yacbimboen Nuquin Papan mibi bëdamboen isendac. Ëmbi tantiaid icsa nainquiocquin ënu, mibi quesho tantiashun mibi acten mentono, quequin cho-choquid cho-choquidquien Uanën chuidednepanëdash.

<sup>4</sup> Ëndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uapampic:

“Matses nibëdacnombo tabadquidën ëcauanshun naden chiendac:

Nuquin Icbombo choeque. Aid tantianu, quequin mimbi tantiaid icsa ëmbanta.

<sup>5</sup> Umbo ancuenquio chosho isnu quequin cuembocnoc andëdshun

ambescabanacbimboen abimbo chuiquidënquio chiaid tantianu, quequin mimbi tantiaid icsa ëmbanta.

<sup>6</sup> Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,”

quequin Isayasën Uan tishabicnuc chuiquin dada uapampid nec.

<sup>7</sup> Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanëdash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe qeshun ambi mënchictequid icta, quequin mibi chiosh? ¿Aidën chiaid tantiashta acten mentomenuec cho? <sup>8</sup> Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquio icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquio nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanëdash Uan. <sup>9</sup> Adequi onquebudec: —Cuëte icsatedi matenu, quequin cuëte bacuëesa dëdshun mateshun icbon nëdëncaquin tauiec. Adquiecbidi tantiaid icsambocquid cuëshëdmenu, qeshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

<sup>10</sup> Adoaquien: —Chian anëdënquequid Nuquin Papan nësiate ictiapimbocquin ¿atotsimbi napeba? —quepanëdash iccuededquido.

<sup>11</sup> Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

<sup>12</sup> Adecbidi ancanquid dapan matses utsin na bedtequid nëidted bedta caidotsen acten mentomenuec cho-chopanëdash. Choshon Uanën chuibansho tantiash: —Chian anëdënquequid nësiate ictiapimbocquin ¿atotsimbi napeba? — quepanëdash.

<sup>13</sup> Adoaquien: —Ancanquid dapan chiactedsëqui bedta. Muaquin mitsana daëd uanuequin bedenda —capanëdash Uanën aido chuiquin.

<sup>14</sup> Adashic, adecbidi sondado cho-choash: — ¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

<sup>15</sup> Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? — quecuededpanëdash cho-choquido.

<sup>16</sup> Adsho tantiash: —Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshî? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan.

<sup>17</sup> Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun

chian anëdënquequid nësiashun abi tantiaquidtedi abi yacno puduedmendac aidën. <sup>18</sup> Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

<sup>19</sup> Adshumbic, ancanquid Edodesën tantiaid icsatsen Uanën chuibanpanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuioapanëdash. <sup>20</sup> Aden ambi tantiaid icsa chuibanşho tantiashun Edodesën Uan bedmeshun quënën nauedmepanëdash abitedishun tantianushe qeshun.

*Esus acten mentoaid*  
(*Mat 3.13-17; Mad 1.9-11*)

<sup>21</sup> Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoaquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec <sup>22</sup> dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadec aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

*Esuquidistun tsusedpabo chiaidtedi*  
(*Mat 1.1-17*)

<sup>23</sup> Adashic, abi tishaid seta 30ted icquimbi Nuquin Papan chiacpaden naquin tauapanëdash

Esusën. Aden tauaquin chuibansho tantiash aton matses nadpanëdash. Osen mado nec, quiash, Nuquin Papan mado nec, quenquo yec matses onquepanëdash. Esusën papapenquo Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash. <sup>24</sup> Aidën papabic Matak cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, <sup>25</sup> aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, <sup>26</sup> aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, <sup>27</sup> aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, <sup>28</sup> aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, <sup>29</sup> aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matak cuëmëdquid, <sup>30</sup> aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, <sup>31</sup> aidën papabic Medeya cuëmëdquid, aidën papabic Menan cuëmëdquid, aidën papabic Matata

cuëmédquid, aidèn papabic Natan cuëmédquid,  
<sup>32</sup> aidèn papabic Dabid cuëmédquid, aidèn  
 papabic Isai cuëmédquid, aidèn papabic Obed  
 cuëmédquid, aidèn papabic Bos cuëmédquid, aidèn  
 papabic Sadomon cuëmédquid, aidèn papabic  
 Nason cuëmédquid, <sup>33</sup> aidèn papabic Aminidad  
 cuëmédquid, aidèn papabic Adan cuëmédquid,  
 aidèn papabic Eston cuëmédquid, aidèn papabic  
 Pades cuëmédquid, aidèn papabic Uda cuëmédquid,  
<sup>34</sup> aidèn papabic Acobo cuëmédquid, aidèn papabic  
 Isac cuëmédquid, aidèn papabic Abadauan  
 cuëmédquid, aidèn papabic Tade cuëmédquid,  
 aidèn papabic Nacod cuëmédquid, <sup>35</sup> aidèn  
 papabic Seduc cuëmédquid, aidèn papabic Dacau  
 cuëmédquid, aidèn papabic Pedec cuëmédquid,  
 aidèn papabic Ebed cuëmédquid, aidèn papabic  
 Sada cuëmédquid, <sup>36</sup> aidèn papabic Cainan  
 cuëmédquid, aidèn papabic Adpashad cuëmédquid,  
 aidèn papabic Sen cuëmédquid, aidèn papabic Noe  
 cuëmédquid, aidèn papabic Damec cuëmédquid,  
<sup>37</sup> aidèn papabic Matusaden cuëmédquid, aidèn  
 papabic Enoc cuëmédquid, aidèn papabic  
 Aded cuëmédquid, aidèn papabic Macadaded  
 cuëmédquid, aidèn papabic Cainan cuëmédquid,  
<sup>38</sup> aidèn papabic Enos cuëmédquid, aidèn papabic  
 Sed cuëmédquid, aidèn papa abia uampid Adan  
 cuëmédquid, aidèn papambo Nuquin Papa abia  
 yanampidquio nec. Abi tabadec. Aidtedi Esusën  
 tsusedpabo nec.

## 4

*Satanas Esus icsamete bunaid*  
*(Mat 4.1-11; Mad 1.12-13)*

<sup>1</sup> Adshumbic, Matses nebi, quequin Nuquin Papan chiacpaden nanuen acten mentomepanëdash Esusën. Aden Uanën acten mentoaquien Nuquin Papan Mayanën chiacpadec acte Odan caid yacnoësh puduanec matses nibëdacnombo nidash tsadpanëdash. <sup>2</sup> Ushë utsi nidash utsi choaid abuctotsëcquiecnuc ambobi tsadpanëdash. Aidedi ushquin penquio yash Esus bundopanëdash.

<sup>3</sup> Bundoacsho isash Nuquin Papa chieshënquid choash Satanas nadpanëdash: —Nuquin Papan madombo icquin penun cuënotebi pete icta cata —capanëdash Satanasën Esus chuiquin.

<sup>4</sup> Adoaquien: —Padi: “Peteuidi pec bëdamboec tabadtemaid nec,” quequin dada uapampic —quepanëdash Esus Satanas caic.

<sup>5</sup> Adoshombic, macuësh dapa abucquio yacno Esus buanshun Satanasën badedquio nidaidtedi ismebampañdash. <sup>6</sup> Ismiash: —Nidaidën icquidtedishun icbo icmiaidquio nebi. Abitedi con na nec. Ëmbi menenu cac aidedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac. <sup>7</sup> Nidaidën tabadquidtedi chuiquid dapa icnu quequin, Con icbo mibi nec, ëbi casho adquid mibi icmëmbi —quepanëdash Satanas Esus caic.

<sup>8</sup> Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min icombo neque. Aidën namiaidquio icta” —quepanëdash Esus Satanas caic.



<sup>9</sup> Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanëdash. Aden tsadunshun: –Mibi Nuquin Papan madombo yec nëuëshquio dacuëdenquio yec pudunta. <sup>10</sup> Naden dada uapampid iqueque. Tantiata. Chuinu.

“Mibi pudunsho isun, Tsicateguin bëdamboen budmeta, quequin Nuquin Papan ambi uaido mayan bëdabo chiendac.

<sup>11</sup> Aidombi min taën tsasimbocquid tincanushe queshun uidën uaqin mibi bëdamboen budmendac.”

Aden min Papan chiaid icnuc dacuëdenquio yec pudunta –capanëdash Satanasën Esus chuiquin.

<sup>12</sup> Adoaquien: –Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec –quepanëdash Esus Satanac.

<sup>13</sup> Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaid namenuquin Esus tanun nanuna, quequin ambibi tantianec Esus nianec Satanac nidpanëdash.

*Nasaded yacnocquido Esus bunesabo*

*(Mat 4.12-17; 13.53-58; Mad 1.14-15; 6.1-6)*

<sup>14</sup> Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapanëdash. <sup>15</sup> Adnubic, Nuquin Papan chiaid chuibante shubu utsin-utsinquec

puuedcuenequin Nuquin Papan chiaid Esusën chuibampanëdash. Aden chuisho tantiash, Nuquin Papan chiaid tantiaquidquo Esus nec, quec cuëdëncuededpanëdash.

<sup>16</sup> Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puuedteniaccpadequi puuedash Nuquin Papan chiaid isec onquenush nidtopanëdash. <sup>17</sup> Nidtosho isun Nuquin Papan chiaid Isayas cuëmëdquidën dada uapampid anocquidën Esus menepanëdash. Aden aid meniac sananquin seccudoabanquin isbanec nadec Esus onquepanëdash:

<sup>18</sup> “Nuquin Icbon Mayanën namiaidquo nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquo nebi. Aidëmbidi Satanasën yuaid Nuquin Papan bacuë icmenuequin chuibanta caidquo nebi.

<sup>19</sup> Aidën Nuquin Icbon bëdamboen iste chuibanta caidquo nebi.”

<sup>20</sup> Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash. <sup>21</sup> Adoac: —Nuquin Papan chiaid mimbi tantiaboed nëbimbobi tauadoec —quepanëdash Esus abibi chiadequi.

<sup>22</sup> Adoacuien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

23 Adoaquien: –Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuipampid nec. Ęmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec. 24 Abimbo chiembique. Tantiata –quiash Esus abi onquec: –Nuquin Papan ěmbi tantiamiapaden chuibanta caidën abi caniacnoshon chuibansho tantienquiocquid icpec. 25 Ęndenquimboshë adomboembidi Nuquin Papan ěmbi tantiamiapaden chuibanta caid Edias cuëmëdquidën chuibansho tantiesa icpampic. Aidi icnubien isadaidbon bënuu chidobo dadpen icpampic. Aido adquid icnubien seta abentsëc chotsëcnuc matamec aton pete nibëdquiec yanubi isadaidbon bënuabo bunec tabadpampic. 26 Adec bunec tabadsho isun, Isadaidbon bënuu yacno nidta, quenquiocquin isadaidpembon bënuu yacno pemenuc nidta cac Edias nidshun ambi chiapadomboen isadaidpembon bënuu nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsëqui icpampic. 27 Adashic, adecbidi isadaidbo abi daushumbo yacno mishac mishadenquio yacbimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembon abentsëc

Naman cuëmédquid Ediseyon bédamepampic. Ëbi bédamepec, quequin tantiec aton nidaid Sidia caid yacnoësh choacsho Ediseyon Naman bédamepampic –quepanédash Esus.

<sup>28</sup> Aden Esusën isadaidpembo nashumpampid chuisho tantiash iccuededquido isadaidbo comapenec nëishpanédash. Isadaidpembobéd isadaidbo ictiapimbo iquec, quec iccuededquido nëishpanédash. <sup>29</sup> Adec nëishash nidanec nuntanuësh puduenanec shubu ënédacno nidshun acte dapa quiusudacnombo nebudnuequin Esus buampanédash. <sup>30</sup> Aden nidmiaquien matses dadpen icquid natsusash Esus nidpanédash.

*Mayan icsa dapuedaid cuemete*  
(Mad 1.21-28)

<sup>31</sup> Adec abi caniacnoësh Nasaded caid yacno nidtanashi nidaid Cadidia yacno nidequi Capednaun caid yacno Esus choapanédash. Ambo choash chonoadtemaid ushë icnuc Nuquin Papan chiaid chuibante shubun puduedshun Nuquin Papan chiaid chuibanpanédash. <sup>32</sup> Aden chuibansho tantiash: –Ambia tantiaquidën chiacpaden chuibanquidien Esus nechitec –quecuededpanédash anocquido.

<sup>33</sup> Aden Esusën chuibanubien Nuquin Papan chiaid chuibante shubu nuntan mayan icsa dapuedaid icpanédash. Aidi comapenec sidquetanec onquec: <sup>34</sup> –¿Nasaded yacnocquid Esus caid atotsi quec mibi cho? ¿Ëbipadquidtedi naimbudmenuecta cho? Ëmbi isaid mibi nec. Nuquin Papan bédamboen isaidquio, icsapenquiocquidquio mibi nec –mayan icsan caquien: <sup>35</sup> –Otacquio

tabad. Adec tabadec dapuduenta –Esusën cac mayan icsan abi dapuduedaid tacpanën nebudec icsa uainquio yec dapuduempanëdash.

<sup>36</sup> Adosho isash tantiadempambo iquequi: – ¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec –quepanëdash Capednaun yacnocquido. <sup>37</sup> Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapanëdash.

*Daicsambocquid dadpen Esusën bëdamiaid  
(Mat 8.14-17; Mad 1.29-34)*

<sup>38</sup> Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: –Simonën nachi chumboshë iqueque. ¿Ada aid bëdametsia? –caquien:

<sup>39</sup> Simonën nachi yacno choash dayunquio nidtuidec: –Chumbocquid daebudta –Ësus quenubi badedquio daebudpanëdash. Adec daebudash nidtoshon codocashun Esusbëd icquido pemepanëdash Simonën nachin.

<sup>40</sup> Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash. <sup>41</sup> Adembidi mayan icsa utsi-utsien dapuduemepanëdash. Adoac, Nuquin Papan madombobi mibi nec, quec sidquesho tantiashun: –Nuquin Papan chomiaid nec, quequin ëbi chiec adec onquenda –Esusën cac mayan icsa ënëdpanëdash.

<sup>42</sup> Adashic, badiadnuc matses nibëdacno Esus nidpanëdash. Esus nidacsho isun matses dadpen-shun nibënquin istuidshun: —Nidenquo yec ëbëdi tabadta —capanëdash istuidquidon.

<sup>43</sup> Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidendabi. Nuquin Papan chomiaid icquin chuibanun nabono — quepanëdash Esus abi nibënquin istuidquido chiec.

<sup>44</sup> Aden chiashic Nuquin Papan chiaid chuibante shubu utsin-utsinquiec pudued-cuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

## 5

### *Abëd tabadmenuen chomiaid (Mat 4.18-22; Mad 1.16-20)*

<sup>1</sup> Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash. <sup>2</sup> Adnubien masi yacno aton cano daëd nëshun icbon aton nëshaidtedi pambampanëdash. <sup>3</sup> Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

<sup>4</sup> Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

<sup>5</sup> Adoaquien: —Icbo, inchëshëmbi nuëcquid bednuen nëshaid nënebenuquin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

<sup>6</sup> Adash shodombo yacno nidshun nëshaid nënetanquin nuëcquid dadpenquioshë bedac nëshaid tësëdec taëpanëdash. <sup>7</sup> Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoadtsempanëdash.

<sup>8</sup> Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquio yec nidaneta. Icsambocquid nebique —capanëdash Esus chuiquin. <sup>9</sup> Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo. <sup>10</sup> Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuiban-chuibanendac —quepanëdash Esus Petedo caic. <sup>11</sup> Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

*Daushumbocquid bēdamiaid*  
(*Mat 8.1-4; Mad 1.40-45*)

<sup>12</sup> Adashic, shubu dadpen yacno Esus icnubien daushumbocquid nami mishac paēpenquiocquid chopanēdash. Aidi choash Esusën taēno shuebudec nadpanēdash: —Ēbi bēdamete bunquin ēbi mimbi bēdamepec —quepanēdash daushumbocquid.

<sup>13</sup> Adsho tantiashun adquid daushumbocquid mishtemaid nec, quenquiocquin damishec Esus: —Mibi bēdamete bunebique. Mibi bēdamenu —quenubi badedquio bēdampanēdash.

<sup>14</sup> Aden bēdametanec Esus: —Ēmbi naid utsibo chienda. Adenquiocquin isadaidbo tsusiobo ismetanta ma bēdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bēdambo icmiaid cuidtequidquio meneta —capanēdash Esusën ambi bēdameboed chuiquin.

<sup>15</sup> Adnubien Esusën bēdamesho isquidon Esusën bēdamiaid chuibanac matses dadpen Esusën chiaid tantianuec cho-chopanēdash. Adecbidi, daicsambocquido bēdanuec chochoacsho Esusën bēdamepanēdash. <sup>16</sup> Adashien matses nibēdacnombo nidash Nuquin Papa chiec onquepanēdash.

*Dada shēquēquenquiocquid bēdamiaid*  
(*Mat 9.1-8; Mad 2.1-12*)

<sup>17</sup> Adashic, ushē utsin Esusën chuibanuc padiseyobobēdi Nuquin Papan naden nata quequin chiaid tantiamequid dadpen



tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuec Esus icpanëdash. <sup>18</sup> Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan nënantanquio Esus icnubi <sup>19</sup> matses tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

<sup>20</sup> Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

<sup>21</sup> Aden chuisho tantiaish padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bëpiscudquidquio nec —quepanëdash ambibi tantiacpadec onquec.

<sup>22</sup> Aidon tantiaid tantiec Esus: —¿Atotsi quiash mimbibi icsamboen tantiec onquepe? <sup>23</sup> ¿Mimbi tantiaid icsa cuidenquio yec bëpiscudtequidquio nendac ëmbi chiaidquio bëdantequidpenda nedic? Adecbidi, ¿Mibi icsambochoedi mibi

bëdanoque. Nidtoash nidta, quequin chiaid bédantequidpenda nedic? <sup>24</sup> Nuquin Papan chomiaid icquimbi mimbi tantiaid icsa cuidenquio yec bēpiscudtequidquio nendac ěmbi cac ad iquendac. Nuquin Papan chuimiaidquio nec mibitedi camenuen dada shēquēquenquiocquid naden chiembique Tantia. Nidtoash nidquin min di buanec nid –capanēdash Esusën dada shēquēquenquiocquid chuiquin. <sup>25</sup> Adoac nidtoshon aton di bedanec Nuquin Papan naboed chuibanecqui aton shubuno nidpanēdash.

<sup>26</sup> Adsho isash tantiadempambo yec Nuquin Papan naid chiec onquecuededec tabadpanēdash: – Aden bēdamiaid isenquiochoeděmbi nēbimbobi aid isbempombi –quecuededpanēdash.

*Debi, ěbi tsibanec cho, quequin Esusën chiaid  
(Mat 9.9-13; Mad 2.13-17)*

<sup>27</sup> Adashic, capucuenequin Debi cuēmēdquid Esusën istuidpanēdash. Debi nec queshumbi Mateyo cuēmpañēdash. Ancanquid dapan utsibon na bedtequid bedshumbanta caid Debi icpañēdash. Ancanquiděn chiacpaden Debin utsibon na bedtequid bedbansho isun: –Ěmbi chiaid tantianush ěbi tsibanec cho –Esusën cac <sup>28</sup> Debi nidtoanec aton natedi nianec Esus tsibanec nidpanēdash.

<sup>29</sup> Adshun aton shubuno Esus buanshun Debin pemepañēdash. Ancanquiděn utsibon na bedtequid bedbanta caido abipadquido dadpembēdtabi Esus Debin pemepañēdash. <sup>30</sup> Aden adquidobēdtan Esusën pesho isash padiseyobo: –¿Atotsieshun mibi chuiquidbēdtan

mibitedishun icsambocquidbëdtan pepeba? — quepanëdash Esusbëd icquido caic.

<sup>31</sup> Aden chuisho tantiash Esus nadpanëdash: — Ëbi bëdamec cho, quenquoio bëdambocquid iquec. Daicsambocquidien, Ëbi bëdamec cho, quendac. <sup>32</sup> Adecbidi, Nuquin Papan bëdamboen isaidquoio icsho, Mimbi tantiaid icsa ënta, quequin chuinuec choenquoio iccondabi. Nuquin Papan icsamboen isaidquoio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

*Buna mëmunaid  
(Mat 9.14-17; Mad 2.18-22)*

<sup>33</sup> Aden Esusën chuibansho tantiashun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquoio mibëd icquido iquec. Aidon buna mëmunenquiocquin peshun sicaid actenec —quepanëdash padiseyobo Esus chiec.

<sup>34</sup> Adoaquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquoio iquec. <sup>35</sup> Yuecash chido inquit nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

<sup>36</sup> Aden chuibanequi abi Esus onquec: — Dashcute chuca cuëshun dashcute shëñibëdta nacnenquin bëtuscaisa matses nec. Cuëshquin

dashcute chuca icsa uaic. Adecbidi shëni tuscaid bëtësëdec. <sup>37</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. <sup>38</sup> Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiauidquid yanec icsabudendac. Mibi adquid iquec, quequin tantiaquin utsi chiacbimboen Esusën padiseyobo chuipanëdash. <sup>39</sup> Adashic ambi ënden chiaid tantienquiocboedi nëbi Nuquin Papan chiaid utsi chuibanac tantiaquidquio iquendac –quepanëdash Esus.

## 6

### *Chonoadtemaid ushë tantiaquid* (*Mat 12.1-8; Mad 2.23-28*)

<sup>1</sup> Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash. <sup>2</sup> Aden pesho isquin padiseyobon: –¿Atotsieshun chonoadtemaid ushën chonoadpeque? Tantianu. Èbi chui –capanëdash Esusbëd icquido chuiquin.

<sup>3</sup> Adoaquien: –¿Tsusedpa Dabid caidbëd icquidon piasquin pepampid tantiamboda ique? <sup>4</sup> Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid

nepampic –quequin padiseyobo chuishun Esusën nadopanëdash: <sup>5</sup> –Ëbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

*Mëuesadaid bëdamaid  
(Mat 12.9-14; Mad 3.1-6)*

<sup>6</sup> Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash. <sup>7</sup> Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. <sup>8</sup> Aden cainubien abi chieshënquidon tantiaid tantiaquin mëuesadaid isquin: –Nënantanquio nidto –Esusën cac mëuesadaid nënantanquio nidtoash nidpanëdash.

<sup>9</sup> Adsho isashien: –Tantianu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unëspec? –quepanëdash Esus.

<sup>10</sup> Aden chuishumbic iccuededquido isbanquin: –Ëbi mëd –cac Esus mëdequi mëuesadaid bëdampanëdash.

<sup>11</sup> Adec mëuesadaid bëdansho isashien comapenec nëishash: –¿Mitsipadentsimbi Esus acpe? –quec onquecuededpanëdash abi chieshënquido.

*Esusën, Ëbi chuibeneta, caido*  
*(Mat 10.1-4; Mad 3.13-19)*

<sup>12</sup> Adashic, ushë utsin macuësh yacno matses nibëdacno Nuquin Papa chiec onquenuec nidash inchëshën ushenquio yec Nuquin Papa chiec Esus onquepanëdash. <sup>13</sup> Badiadshun abëd icquido dadpen chomeshun, Ëbi chuibeneta, quequin 12tedictsëqui chuipanëdash. <sup>14</sup> Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome; <sup>15</sup> utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; <sup>16</sup> utsibic, Udas, Acobon mado; utsibic, Udas Iscadiote, yuecshun Esus chieshënuquido Esus bedmequid. Aidtedi, Esusën, Ëbi chuibeneta, caido icpanëdash.

*Nuquin Papan bëdamboen isaido icnuc ambi ic-samboen isaido*  
*(Mat 4.23-25; 5.1-12)*

<sup>17</sup> Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus nidtuidpanëdash. Nëidted icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aido Esusën chuibansho tantianuec cho-choash tabadnubi, Ëbi bëdamepec, quequin tantiec utsibo choash tabadpanëdash. <sup>18</sup> Adec choquido mayan icsa dapuduedaid icsho isun Esusën dapuduemepanëdash. <sup>19</sup> Adsho isun

nadatiambocquid Esus neque. Mishnu, qeshun mishequi bēdancuededpanēdash.

20 Adshumbic abēd icquidombo isbanquin naden Esusēn chuibampanēdash:

—Nēmbo mibi icnuc mitsana nibēdtenesho isun Nuquin Papan bēdamboen isaïdo iquec abuc nidan con natedi mitsana nendac.

21 “Nēuēshquio bundodenesho isun Nuquin Papan bēdamboen isaïdo yec abuc ēbēd tabadec bundoesa iquendac.

“Nēuēshquio matses Nuquin Papan chiaïd tantiesa icsho isash unēsquio yec shubidednequid Nuquin Papan bēdamboen isaïd yec abuc nidash ēbēd tabadec bēdambo iquebi quependac adquido.

22 “Esus tantiaquid icsho chieshēnquin pudued cainquio yaid adembidi mua uaquin chuishunaïd Nuquin Papan bēdamboen isaïdquio nec.

23 “Adomboembidi ěmbi ěndenquimbo chuimiaïd aton matsesēn icsamboen chuishundeniampic. Adomboembidi mibi min matsesēn icsamboen chuishundenetsiash. Nidaïdēnshun adoaid iquec Nuquin Papa yacno choacsho ambi bēdambo icmiaïd mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

24 “Padnuen, con na dadpen iquec, quequin tantiec bēdamboec tabadebi, qesho Nuquin Papan icsamboen isaïdo mibi nec. Nidaïdēnshun mimbi bedteniaïduidi tantiec Nuquin Papa yacno puduedtiapibocquid mibi iquendac. Nidaïdēn bēdamboec tabadquin ěnden bedondaidi mibi nec.

25 “Nidaïdēnshun abi bunaidtedi bedquido Nuquin Papan icsamboen isaïdo nec. Abi

bunaiduidi tantiaquin Nuquin Papan chiaid tantianu qeshun tantiatiapimbo iquendac.

“Mitsanauidi tantiec, Bëdambo iquebi, quec mamë nec tabadquido icsho Nuquin Papan icsamboen isaido mibi nec. Adquido Nuquin Papa yacno puduedte bunsho, Padi, cac shubiquiendac.

<sup>26</sup> “Bëdambocquid nec, quequin mibi dadpeshun chuisho tantienda. Adomboembidi mua uain Nuquin Papan ëdenquimbo chuimaidpembon chuipampic. Aidon chiaid tantiashun tsusedpabon Nuquin Papan chiaid tantienquo yanampic. Adquido Nuquin Papan icsamboen isaido nec –quepanëdash Esus.

*Mibi uimanëquido tantiaquin nabanta, quiaid (Mat 5.38-48; 7.12)*

<sup>27</sup> Aden chiashic abi Esus onquec: –Ëmbi chiaid tantiaquidquo nad iqueque. Chuinu. Tantiata. Mibi chieshëquido bëdamboen tantiaquin nabanta. <sup>28</sup> Adembidi mibi icsamboen chuiquid bëdamboen chuita. Adembidi, ëbi icsamboen naquido bëdamboen tantiaquin cuidenda, Papa, quequin Nuquin Papa chuita. <sup>29</sup> Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bëdamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. <sup>30</sup> Utsibic, aton na nibëdquid, Bec cho, qesho meneta. Adembidi utsin mit-sana ampesho isun cuidenquiocquin bëdamboen naoata. <sup>31</sup> Adembidi ëbi bëdamboen nashuntiadquidi nepec quequin mimbi tantiacpadomboen utsi tantiaquin nashunta.



32 “Ëböd tantiananquiduidi tantianu, quec ¿bëdamboda mibi icpe? Padenquo. Adembidi Esus tantiesan abipadquiocquido tantiec. 33 Adecbidi, Ëbi bëdamboen tantiaquin nashunquiduidi tantiaquin nashunoanu quec ¿bëdamboda mibi icpe? Padenquo. Esus tantiesan adembidi nashunquidquo nec. 34 Adecbidi, Ëbi menequiduidi menenu, quec ¿bëdamboda mibi icpe? Padenquo. Esus tantiesan adenuidi menec. 35 Naden nata, quequin chuinu. Tanta. Mibi chieshënquid icsho aid tantiaquin bëdamboen nabanta. Adembidi mibi meniantiapimbocquid, Bec cho, quesho, Yuecash cuidnanun nanuna, quenquiocquin meneta. Mimbi adosho isun Nuquin Papan mibi bëdamboen isendac. Adobanec bëdambo iquebi quec mibi tabadendac. Adamboen nabanquido Nuquin Papan nacpadomboen nabanquid nendac. Adquido aton mado iquendac. 36 Nuquin Papan abi chieshënquido nashundeniacpadomboen mibi chieshënquido nashundeneta —quepanëdash Esus.

*Icsambocquid nec, quequin chienda, quiaid  
(Mat 7.1-5)*

37 Aden chuibanashic Esus abi onquec: —Ëmbi tantiacpadomboen naisa icsambocquid nec, quenda. Adesa abi yacno choacsho Bëdambocquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquo icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash

cuidnanenquo yec bēpiscudta. Adquid, Cuidnu, quenquo yec mimbi icsamboen tantiaquin naid Nuquin Papa bēpiscudendac. <sup>38</sup> Aton na nibēdquid bēdamboen tantiaquin meneta. Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimbi meniacpadomboen mibi tantiaquin bēdamboen tabadmetequid daēd uashun Nuquin Papan mibi meneoaindac –quepanēdash Esus.

<sup>39</sup> Aden chuishumbic utsin tantienquo ictequid abēd icquido naden Esusēn chuipanēdash: —¿Podquedēn nidnu quec bēshuaid utsi bēyucampecta nidtic? Nidnu, quianec nidec abi daēdi nidaid shēcuē ampaēdpatsiash. <sup>40</sup> Adembidi tantianuequidēn abi tantiamequid dēniactiapimbo iquec. Tantiamiac abi tantiamequidpadquid iquendac —quepanēdash Esus.

<sup>41</sup> Adoshombic adembi tantiamequin naden Esusēn chuipanēdash: —¿Atotsi quiash utsi bētsiadaid pistsēcquid isequi mibi bētsiadaid dapa isadtiapimbo icpec? ¿Mibibi bētsiadaid dapa bēbedadabicquin mitsipadentsi mimbi utsi bētsiadaid pistsēcquid bedshunuen ispe? <sup>42</sup> Adembidi, utsin tantiaid icsa abentsēc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ēnta, quequin utsi chuipe? Mimbi tantiaid icsa nibēdacbimboen mimbi chuipeque. Adoenda. Mimbi tantiaid icsa ēnshun utsin tantiaid icsa icsho isun ēmenuequin chui —capanēdash Esusēn.

*Cuēte abipadquid aton bacuē nec, quequin chiaid  
(Mat 7.17-20; 12.34-35)*

<sup>43</sup> Adoshombic, adembidi Esusën chuipanëdash: —Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic. <sup>44</sup> Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquio matses iquec. Adecbidi, echo bacuë isash, Bata nec, quenquio matses icoaic. <sup>45</sup> Adembidi bëdamboen tantiaquidën ambi tantiacpadomboen utsi bëdamboen tantiaquin nabanendac. Adecbidi ambi tantiacpadec bëdamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

*Tantiaquidquio icnuc tantiauidquid nec, quequin chiaid*

*(Mat 7.24-27)*

<sup>46</sup> Adoshombic: —¿Atotsieshun, Con Icho mibi nec, qeshumbi ëmbi chiacpadomboen naisa mibi ne? <sup>47</sup> Èbi yacno choshon ëmbi chuibansho tantiaquish nidshun nadomboen naquidquio iqueque. Chuinu. Tantiata. <sup>48</sup> Cunquequid dapan chimeshnushe qeshun shubu uaquidën shëcuë ëquëduc uëdëshcashun buintad nitsinquid. Adembidi, natiamianquiec cametequid yanabicnuc tantesa uainquiocnuen ëbi tantiaquidquio icquin ëmbi chiaid papudedshun adomboembidi nabanquid nec. Adquidën tantesa uainquio iquendac. <sup>49</sup> Utsibic nad iqueque. Tantia. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid

papudueduidtsacpadomboen nabanenquo yec  
natiagianquid chonoc abi papudueduidtsaid  
bëpiscudendac. Adquid uquë nësecatequid nendac  
—quepanëdash Esus.

## 7

### *Sondado chuiquidën tantiaid*

*(Mat 8.5-13)*

<sup>1</sup> Aden iccuededquido chuiquin nainash  
Capednaun caid yacno Esus nidoapanëdash.

<sup>2</sup> Capednaun caid yacno choash Esus tabadnubien  
isadaidpembon sondado chuiquidën yua abi  
cudasaid unëstiadtsëcquo icpanëdash. <sup>3</sup> Aton yua  
unëstiadtsëcquo icnubien, Nënquid bédamequid  
Esus nëmbobi iquec, quequin utsibon chiac:

—Aidën con yua bédametsiash —quianec  
isadaidbo tsusiobo yacno nidshun istuidash:  
—¿Con yua chiec Esus yacno ada mibi nidpatsia?  
—quepanëdash sondado chuiquid.

<sup>4-5</sup> Adoaquien: —Ai —quianec Esus yacno  
isadaidbo tsusiobo nidshun chuituidec: —  
Sondado chuiquidën chuitan caido nebi. Con  
yua unëstiadtsëcquo iqueque. Esus bédamequid  
neque. Chuitan, cac mibi chiec chobi. Sondado  
chuiquid bédambocquid nec. Nuquin Papan chiaid  
chuibante shubu uamiondaidquio nioshe. Ambi  
chiacpadomboen aton yua bédametiadquidi mibi  
nec —quepanëdash isadaidbo tsusiobo Esus caic.

Adoac aidobëdi Esus nidpanëdash. <sup>6</sup> Adec  
aidobëd Esus nidshobi sondado chuiquidën cho-  
miaid utsibo choquin bëquedtuiddash nadpanëdash:  
—Sondado chuiquidën chomiaid nebi. Aidën chi-  
aid chuinuec chopobi. Naden chuita, caposhi:

“Padicnuna, Icho. Icsambocquid nebique. Mibi bēdamboquid iquec con shubun puduedenquioc-tiadquidi mibi nec. <sup>7</sup> Ēbi icsambocquid iquec mibi bēquedec nidenquiocobi. Mibi bēdamequid yec con shubun puduedenquiocquin mibi yac-noshombi, Bēdanta, mimbi cac con yua bēdampec. <sup>8</sup> Ēbien sondado chuiquid nec. Ēmbi nidta cac-padquiequi sondado nidec. Adecbidi, Cho, ěmbi cacpadquiecbidi choaic. Adembidi, Nadota, cac-padomboembidi con yuan nabanec,” quequin chuitan sondado chuiquidēn cabocpadembi mibi chuipombi –quepanēdash sondado chuiquidēn chuitan caido Ēsus caic.

<sup>9</sup> Adoaquien: –¿Abimbobida cai? –queshun ambi chiaid tantiamenuequin iccuededquido Ēsusēn bēisbanquin nadopanēdash: –Chuinu. Tantiata. Sondado chuiquid isadaidpembo ěbi tantiaquid-padquid isadaidbo nibēdec –quepanēdash Ēsus. <sup>10</sup> Aden chiaquien sondado chuiquidēn chuitan caido aucbidi nidoash shubun puduedshun sondado chuiquidēn yua bēdamiaid istuidpanēdash.

### *Nianten mado uincuen uaid*

<sup>11</sup> Adashic, ushē utsin shubu dadpen icquid Nain caid yacno Ēsus nidpanēdash. Aïdbēdi abēd icquido nidpanēdash. Adecbidi matses utsibo dadpen nidpanēdash. <sup>12</sup> Adec nidequi Nain tsasi uaid quēnē shēcuē anoentsēqui choquimbi unēsaid bēquido bēqueduidpanēdash. Unēsaid epa icnubi ani niante icpanēdash. Niantebēd Nain yacnocquido dadpen cho-chopanēdash. <sup>13</sup> Adec cho-choec niante shubisho isash Ēsus unēsquo yec: – Shubienquo yec ēnēd –quepanēdash. <sup>14</sup> Adec,

Ënëd, quetanec udictsëc nidshun unësaid nanaid Esusën mishnubi abi bëquido nidtuidpanëdash. Nidtuidsho isun: —Abuido, uëtsëdtota —cac<sup>15</sup> uëdtsëdtoash tsadec unësboed onquepanëdash. Adsho isash ani caic: —Në, unësboedi min mado uincuenoshe. Abëdi nidec nid —capanëdash Esusën.

<sup>16</sup> Aden unësaid uincuemesho isash chochoquido: —Adopenshenda uincuemec —queshun Nuquin Papan naid chuibampanëdash. Aden chuibanec: —Nuquin Papan matses bëdamboen isnuen ambi chomiaidquio nuquibëd icmiosh —quec isquido onquecuededpanëdash.

<sup>17</sup> Aden isash nidshun unësaid uincuemiaid isquidon chuibansho isadaidbon nidaid Udeya caid yacnocquidon tantiabempanëdash. Adem-bidi chiac dëuequidontsen tantiapanëdash.

*Ëbitedishun cainaid mibi nec, quequin Uanën chiaid*

*(Mat 11.2-19)*

<sup>18</sup> Adnubien, acten mentoanondaid Uan cuëmëdquid quënën nauedaid icsho abëd icquidon Esusën nabanaid chuibampanëdash. Adoaquien abëd icquido daëd chomeshun Uanën nadopanëdash: <sup>19</sup> —Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

<sup>20</sup> Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi?

mibi quenuc ¿Adambi utsi caimpe?” quiosh Uan — quepanëdash Uanën chomiaido Esus caic.

<sup>21</sup> Aden chiaquien icsambocquid bédamequinc, mayan icsa dapudedaid dapuduemequinc, bëshuaid bédamequinc caquin Esusën ismebampanëdash. <sup>22</sup> Aden nabanquin nainashic: — Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenosh. Adembidi unësaid uincuemiosh. Adembidi aton na nibédquido tantiamenuen Nuquin Papan chiaid Esusën chuibanosh, quequin Uan chuitanta. <sup>23</sup> Ëmbi aden nabansho isun tantesa uainquiocquin Nuquin Papan bédamboen isaidquio nendac, Esus quiosh quequin Uan chuitanta —quepanëdash Esus Uanën chomiaid daëd chiec.

<sup>24</sup> Adashic, Uanën chomiaido nidambi iccuededquido tantiamebanuec Uan chiec Esus nadpanëdash: —¿Atotsi isnuec matses nibédacno nidonda? ¿Cunquequidën ishacunaid isnuecta niddionda? <sup>25</sup> ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta niddionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. <sup>26</sup> Ad icnuc, ¿atotsi isnuec matses nibédacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibédacno Nuquin Papan chuimiaid isnuec mibi nidondac. Uanën ëbi chuiquidëmbi

ispondashi. Ēbi ěndenquimbo chuiquido ěbi isesabo icpampic. <sup>27</sup> Ēbi cain naden Uan Nuquin Papan chuimiampid nec:

“Mibi choec quequin chuibanquidba chomembi. Mibi choec quequin chuibanac ambi tantiaid icsa ěnshun mibi cainquidombo iquendac.”

Aden ěbi cain Uan chuiquin dada uapampid nec.

<sup>28</sup> “Adembi Uan chuibanu. Tantiata. Nuquin Papan chuimiaid Uampadquid matsesën tishaid utsi nibědec. Aiděn ěbi chotequid chuibanac choshon ěmbi nabansho isenquio icposh. Isash, Něid Nuquin Papan chomiaid nec, quetsemposh Uan. Aidě quěněn nauedac ěmbi nabanaid istiapimbo yec tsadec, Nuquin Papan chomiaid, ěbitedishun cainaid mibida ne, quepec –quepanědash Esus.

<sup>29</sup> Aden Esusěn chuibansho tantiash: –Nuquin Papan naid bědambo iquec –quepanědash Uaněn mentobanondaido. <sup>30</sup> Utsiboen ambi tantiaid icsa ěnenquio icquin Uan Esusěn chuisho tantiash, Nuquin Papan naid bědambo iquec, quetiapimbo aido icpanědash. Aido padiseyoboběd matsesën naden nata quequin chiaid tantiamequido icpanědash.

<sup>31</sup> Aden Uan chiash Esus: –ĵNuquin Papan chiaid něbi chuisho tantiesa mitsipadquid nepeque?

<sup>32</sup> Adquid chuinu. Tantia. Ambě tantiacpaden naisa icsho isash bacuěbo yacximboec něishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquio iquec. Adquiděn Nuquin Papan chuimiaiděn nabansho icsamboen ispec. <sup>33</sup> Nua cubudquin pesa Uan icsho isash, Mayan icsa dapudedaid nec, queposh Uaněn



chuisho tantiesa. <sup>34</sup> Ęmbi peshun acsho isec, Nua peshun tantienquiocquin acquid nepec. Aidbidi icsambocquidoböd icquid nec, Ębi caposh. <sup>35</sup> Aden tantienquiocquid, Bëdamboen tantianu, queshun bëdamboen tantiaquidënquio chuibansho tantiash abi tantiamequidpadquid iquendac — quepanëdash Esus.

### *Chidon Esus tanoshcaid*

<sup>36</sup> Adashic, Ębi yacno pec cho, padiseyobo abentsëcshun cac aidböd nidash shubun puduedash pete santen cuëshnudash Esus uepanëdash. <sup>37</sup> Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash. <sup>38</sup> Aden bëequi Esus yuedacno choash puduedshun abi bëdamequid Esus istuidash, Ębi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën taucshun taë tachoccabanshun noadte bëdan chidon tanoshcapanëdash. Chidon aton na bedtequid dadpen menequin comapenec noadte bëda bedshun Esusën taë tanoshcapanëdash chidon.

<sup>39</sup> Chidon adosho isash Esus yuedquid, Simon caid, abibi onquec: “Ęmbi yuedaid Nuquin Pan chuimiaid iquec, Ębi mishquid icsambocquid nec,” quequin chido mishmenquio icpec, quepanëdash Simon.

<sup>40</sup> Adoaquien, tantiaquidquo icquin Esusën: — Mibi tantiamequin chuinu. Tantiata, Simon — capanëdash.

Adoaquien: —Aden chuiban. Tantianu — quepanëdash Simon.

<sup>41</sup> Aden tantiashun Esusën Simon ambi tantiaid icsa tantiamenuen utsi chuiquin nadopanëdash: — Bec cho. Yuecshun menenun nanuna, quepondash daëd. Abentsëcshun dadpen bedshunubi utsin daëdpactsëc bedshumpondash. <sup>42</sup> Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantiec bëpiscudenquo icpec? —quepanëdash Esus Simon caic.

<sup>43</sup> Adoaquien: —Ambi dadpen meneshun cuidenda caidien nechitec —quepanëdash Simon.

Aden chiaquien: —Ai, bëdamboen tantiaquin mimbi chioc —quiash <sup>44</sup> Simon ismenuec Èsus chido yacmi bidiadshun naden chuipanëdash: —Min shubun puduedacsho mimbi taë pante ëbi menenquiococ. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. <sup>45</sup> Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquoiquin yuen con taë tachoccaniosh. <sup>46</sup> Bëchin manoshcanesa mibi iccoc. Padnueni nëid chidombi noadte bëdan tanoshcaniosh. <sup>47</sup> Adembidi mibi chiembique. Tantiata. Mayan icsa dadpenshun tantiamiaid icsho

nëid chido bédamepombi. Aden bédamiashic abi icsaid tantienquoio yec bēpiscudpobi. Ēmbi aden nac ēbi comapenen tantiaquoioquin ēbi nashunquidquoio nëid chido nec. Padnuen utsi icsaid daēdpactsēc mibi icsaidtedtsēcibidi icpec. Adquid icsaid bēpiscudebi ēbi quenuc ēbi bēdiactsēc tantiatsec mibi nashumēnec —quepanēdash Esus Simon caic.

<sup>48</sup> Aden Simon chiashic chido caic: —Icsaquid nec, quenquiocquin icsainquoio yac bimboecquid mibi isembi —quepanēdash Esus chido chuioaic.

<sup>49</sup> Adsho tantiash: —Icsainquoio yac bimboecquid mibi isembi, quec ħmitsipadquid Esus nepec? —quepanēdash iccuededquido. <sup>50</sup> Aden iccuededquidon tantianubi chido caic Esus: —Ēbi tantiacquid yec Nuquin Papa yacno puduedquid mibi neyoc. Bēdamboec tabadaid tantiamiaid mibi iqueque. Dacuēdenquoio yec nidta —quepanēdash chido caic.

## 8

### *Chidobo abi nashunquido*

<sup>1</sup> Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsēqui yac bimboec nidaidën tabadaid chuibenepanēdash. Abi bédamequid tsibananec chidobo nidpanēdash. <sup>2</sup> Ambi mayan icsa dapuduemiaidobēdtan ambi bēdamiaidon Esus tsibanampanēdash. Madia, Macada yacnoshon tishaid chedon Esus tsibampanēdash. Mayan icsa 7ted dapuduemiaid Madia icpanēdash. <sup>3</sup> Abēd nidquid utsi Uana icpanēdash. Aidën bēnē Chusa cuēmēdquid, ancanquid dapa Edodesën shubu

nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menepanëdash.

*Pete ëshë sequid*

*(Mat 13.1-23; Mad 4.1-20)*

<sup>4</sup> Aden chuibeniasch tabadtuidtsëcnubi ambi chuiquin tantameboedo cho-choquin tsibanampanëdash. Cho-chosho isun, Mibimboecnuc chiembi, quenquiocquin Esusën nadopanëdash: <sup>5</sup> –Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec. <sup>6</sup> Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. <sup>7</sup> Utsibic, nisanquid dëyucacno secac aïdbëdi dëyucash canidouidsacsho nisanquidën bëtïnac unësquid. <sup>8</sup> Utsibic, nidaid bëdan secac dëyucash caniasch dadpen ëshëendac –quepanëdash Esus.

Aden chuibanashic: –Tantiate bëdambocquidën ëmbi chuiboed tantiapec –quepanëdash.

<sup>9</sup> Adoaquien: –¿Mitsipadquid tantiaid mimbi chuiboed icpec? Ëbitedi tantiamequin chuioa –capanëdash abëd icquidon.

<sup>10</sup> Adoaquien: –¿Mitsipadequini Nuquin Papa yacno tabadpe? queboedëmbi nëbi mimbi tantiabeneç. Padnuen utsibon tantienquio yaid aid iquec. Aden chiac:

“Ëshë bēdamboecquid icquimbi tantiesa icquin ma Nuquin Papa yacno isenquiocpanuna.

Adembidi tantiate bēdamboecquid icquimbi tantiesa icquin ma abimbo chiaid tantienquiocpanuna”

—quepanēdash Esus.

<sup>11</sup> Aden chiashic: —Ëmbi chuiboed nad iqueque. Tantia. Chuinu. Tiedën caniquid pete ëshë icbon siaidbimboecquid Nuquin Papan chiaid nec. Ëshë siacno nidaidbimboecquid matsesën tantiate nec. <sup>12</sup> Podquedën nidaid tsasimboecquidbimboecquid nad iquec. Nuquin Papan chiaid tantiaash papuduedtiapimboesho Satansën bēpiscudmiaid adquid nec. <sup>13</sup> Cuēnote dadpen samēdacno nidaidbimboecquid nadquid iquendac. Nuquin Papan chiaid tantiaash, Bēdambo iquebi, quiashic natiamianquiec cametequid icnuc aid tantiec Nuquin Papan chiaid papudueduidquid iquendac. <sup>14</sup> Nisanquid dēyucaid dadpen yacno nidaidbimboecquid nad iquec. Nuquin Papan chiaid tantiaash abi bunaid, abi nēnaid, ambi natequid adquid tantiaquin Nuquin Papan chiaid bētashacimboec icnuc bēdamboec tabadaid ismesa yampec. Aden bēdamboec tabadaid ismesa yanuc utsin Nuquin Papan chiaid tantiatiapimbo iquendac. <sup>15</sup> Nidaid bēdabimboecquidien nad iquec. Nuquin Papan chiaid tantiadonec bēdamboec tabadquin utsi ismequidquio nec. Adquid natiamianquid chonoc tantesa uainquiocquin ënenquiocquin ismendac. Aden ismiac Esus tantiaquid utsi dadpen yampec —quepanēdash Esus ambi chuiboed abēd icquido tantiamenuc.

*Tabote nēnantan nanac chēnquiabimboecquid  
(Mad 4.21-25)*

<sup>16</sup> Aden chuishumbic naden Esusën chuioapanēdash: –Tabote taboshon matsun bētashesa. Adembidi tsadte tēdion tabote nanesa icho nec. Ma ěmbi yuedaidon isnueshun nēnantan tabote nanquid. <sup>17</sup> Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidēmbi chuibanendac. <sup>18</sup> Ad icnuc ěmbi chiaid bēdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadec tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bēdamboen tantiembi, qeshun papudedmenquiocquin bēdamboen ismesa nec. Aden ambi tantiauidaidd uesadendac –quepanēdash Esus.

*Aton utsibo aton titabēd choaid  
(Mat 12.46-50; Mad 3.31-35)*

<sup>19</sup> Adashic, Esus isec aton utsibobēd aton tita chopanēdash. Cho-choshon matses dadpen nuntan tabadsho isun, Ębi choaid chuita, cac <sup>20</sup> shubun puduedshun: –Titabēd min utsibo choshon umanucshun mibi cainec mibēd onquete bunquin –capanēdash Esus chuiquin.

<sup>21</sup> Adoaquien: –Adquid chuinu. Tantia. Nuquin Papan chiaid tantiashun nabanquido ěbēd icquid nec. Adquid buchi caindambi. Adquid utsi chido chuchu caindambi. Utsibic tita caindambi –quepanēdash Esus.

*Acte tëccoasquesho ënëdmiaid  
(Mat 8.23-27; Mad 4.35-41)*

<sup>22</sup> Adashic: –Chian cuëma utsiuc nidnu. Nid –quianec abëd icquidobëd cano antsadtoanec nidpanëdash. <sup>23</sup> Adec nidec cano anuequi Esus ushtopanëdash. Adec ushnuvien cunquequid dapa comapenec cunqueubi acte tëccoasquequidën acte uemiac cano mentoadtsempanëdash. Adsho isash dacuëdec <sup>24</sup> Esus ushacno nidshun tinec abëd icquido: –Nuqui mentoadequë. Isucun, Icho –quec comapenec cuëdpanëdash abëd icquido. Adsho tantiash isucunash nidtoshon: –Mibi comapenec cunqueque. Ënëd –Esusën cac cunquequid badedquio ënëdpanëdash. Adembidi: –Mibi comapenec tëccoasqueque. Ënëd –Esusën cac badedquio acte tëccoasquequid ënëdoapanëdash. <sup>25</sup> Aden ënëdmetanec: –¿Atotsi quiash ëbi tantienquio yec dacuëdcuedede? –Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tëccoasquequid ënëd cacpadequi ënëdchitosh, quec abëd icquido abibi onquecuededpanëdash.

*Mayan icsa dapuduedaid dapuduequin  
bëdamiaid  
(Mat 8.28-34; Mad 5.1-20)*

<sup>26</sup> Adshumbic, acte tëccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash. <sup>27</sup> Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen

yacno tabadboedi nëbi uano unësaid chococate macuësh cuënote yacno tabadpanëdash. <sup>28</sup> Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien <sup>29</sup> mayan icsa chuiquin: — Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquo yampanëdash. Adoac mayan icsan matses nibëdacno nidmiaid icpanëdash.

<sup>30</sup> Adquid nec, quequin tantiaquin Esusën: — ¿Tsutsi cuëmëdquid mibi ne? —capanëdash.

Adoaquien: —Sinco midted dapuduedondayid nebi —quepanëdash mayan icsa dapuduedaid onquec. <sup>31</sup> Aden chiashic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiashic <sup>32</sup> chanco dadpen-shun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? — quepanëdash mayan icsa dapuduedaid.

Adoaquien: —Aido dapuduedtan —Esusën cac <sup>33</sup> dapuduenequi chanco mayan icsa dadpen dapuduedash acte quiusudacno chanco comapenec niquec chian pudun-pudunec mentoadbudnec nibëdquiec unësbunepanëdash.

<sup>34</sup> Adsho isash chanco pemequin isquido titinquianec shubu dadpen yacno choshon ambi isboed chuituidac <sup>35</sup> anocquido istanu quianec Esus yacno cho-chopanëdash. Adec choshon mayan icsa dapuduemequin bëdamiaid dashcute dasiuidash bëdamboen tantiec Esusën



taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. <sup>36</sup> Dacuëdsho isun mayan icsa dapuduemequin bëdamiaid isquidon ambi isboed dacuëdquido chuipanëdash. <sup>37</sup> Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

<sup>38</sup> Adsho isun: —Mibëd nidtiadquio iquebi —quepanëdash ambi mayan icsa dapuduemequin bëdamiaid Esus chiec.

<sup>39</sup> Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduemequin bëdamiaid nidanec aton shubu yacno choshon anocquidtedi Esusën naid abi mayan icsa dapuduemequin bëdamiaid chuibanoapanëdash.

*Chido intac budaid bëdanaid icnuc champi uin-cuemiaid*

*(Mat 9.18-26; Mad 5.21-43)*

<sup>40</sup> Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. <sup>41</sup> Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: <sup>42</sup> —Con champi abentsëc tishaid unësanekidquido ic-cosh. Aton seta 12ted icquid niosh. Ëbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. <sup>43</sup> Adnubien, chido seta 12ted matamec intac budaid chopanëdash. Aidi dauëchoquid dadpeshun bëdametiapimbo icpanëdash. <sup>44</sup> Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

<sup>45</sup> Aden mishac: —¿Tsuntsimbini mishosh? — quepanëdash Esus. Aden chuisho tantiash abi datsidash capuquido mishambo yec otacquio tabadcuededpanëdash. Adec tabadnubien: — Matses dadpeshun tsucus-tsucustsëcquiocquin mibi cuëscabedec —capanëdash Petedon.

<sup>46</sup> Adoaquien: —Matses abentsëcshun ëbi mishosh. Ëmbi nadatiambocquin natequid bëuesadtsac —quepanëdash Esus.

<sup>47</sup> Adec Esus onquesho tantiash chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

<sup>48</sup> Adoaquien: —Mimbi tantiacpadquieci mibi bëdanaye. Dacuëdenquio yec bëdamboec tabadec nid, champi —capanëdash Esusën.

<sup>49</sup> Aden Esusën chuinubien Aidon shubun icquid utsibo Esus yacno cho-chopanëdash. Choash:

—Min champi unēsoshe. Chuibanquin tantiamequid min shubuno nidnunda —capanēdash abi yacnoēsh choquidon Aido chuiquin.

<sup>50</sup> Aden chuisho tantiash: —Dacuēdenda. Aden tantiequi nid. Mimbi tantiacpadquiec min champi bēdaneque —quepanēdash Esus Aido caic.

<sup>51</sup> Aden chianec Aidon shubuno nidash choquidotedi, Ēbēd puduedenda, quequin chianec Petedo, Uan, Acobo aited buanec Aido cuēmēdquidēn champi yacno Esus puduedpanēdash.

<sup>52</sup> Ambo puduedshun anocquido unēsquo yec shubisho tantiashun: —Mibi shubieque. Ēnēdta. Champi unēsenquo yec usheque —capanēdash Esusēn.

<sup>53</sup> Adsho tantiashun, Champi unēsacsho isombi, quequin Esus tantienquiocquin shubiquidon mamēnshumbededpanēdash.

<sup>54</sup> Mamēnshumbedednubi Esusēn Aido cuēmēdquidēn champin mēdante mēdinquin: —Nidto, champi —comapenen cac <sup>55</sup> aton tiboedte unēsabi yec champi badedquo nidtopanēdash. Champi nidtosho isash: —Peme —quepanēdash Esus.

<sup>56</sup> Aton champi nidtosho isash: —Adopenshenda iquec —quepanēdash ani amēbēdi.

Adoquien: —Mimbi isboed chuibanenda —quepanēdash Esus.

## 9

*Esusēn ěbi chuibeneta, quequin ambi nidmiaido  
(Mat 10.5-15; 14.1-12; Mad 6.7-29)*

<sup>1</sup> Adashic ambi ěbi chuibeneta caido 12tedtsēqui chometanquin Esusēn nadopanēdash: —Ēmbi nadatiambocquin nabanacpaden

mibitedishun nabanendac. Mayan icsa dapuduemequinc daicsaido bēdamequinc cain mibi capucueniacnoshon mimbi ismebenendac. <sup>2</sup> Nēbi mibi nideque. Adec capucuenequin chuibenequimbi bēdamebeneta. <sup>3</sup> Nidquin cuate uidēn nidte buanenda. Shictoadte buanenda. Petequid buanenda. Mitsana bedtequid buanenda. Dashcute utsi buanenda. Buanenquio yec dadauidquio nidtan. <sup>4</sup> Adec nidash mibi yuedquidēn shubun puduedshun ěmbi chiapadomboen nabanec anouidi tabadta. <sup>5</sup> Mibi nidacno mibi yuedquid nibēdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta —capanēdash Esusën abēd icquido chuiquin.

<sup>6</sup> Aden chiac nidash abēd icquido abi yuedacno puduedash tabadquin Esusën chiapadomboen Nuquin Papabēd tabadaid chuibanquimbi daicsaido bēdamebenepanēdash.

<sup>7</sup> Adnubien Esusën nabansho isquidon Edodes chuibanpanēdash. Edodes Cadidia yacnoquido ancaquid icpanēdash. Aden Esusën nabanaid chuisho tantiashun, ¿Tsudain nepec? Edodesën caquien,

Acten mentoanondaaid, Uan cuēmēdquid uincuempash icnui, quenubien; <sup>8</sup> Edias Nuquin Papan ambi chiaid chuimiampid padpīdec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanēdash, quequin chuipanēdash Esusën nabansho isun chuiquidon Edodes tantiamequin.

<sup>9</sup> Adoaquien: —Mambi uincuantiapimbocon Uan mapi budtemiondac. ¿Tsudain ëmbi tantiac-maidquio adobanquid icpec? —quiashic Esus iste bumpanëdash Edodes.

*Matses dadpen pemiaid*

*(Mat 14.13-21; Mad 6.30-44; Uan 6.1-14)*

<sup>10</sup> Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibansho tantias Esus abëd icquido bëyucanec shubu dadpen icquid Betsaida caid anoentsëqui nidpanëdash. <sup>11</sup> Aido nidsho isun cho-choquidon tsibanampanëdash. Adsho isun Esusën Nuquin Papa yacno tabadaid chuibanquimbi daicsaido bëdamepanëdash.

<sup>12</sup> Adashic ushë budtsan Esusbëd icquidombo Esusën dayunquio choshon: —Nëmbob shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

<sup>13</sup> Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidtedtsëqui icsho isunda cho-choquidtedi pemenuquin ëbitedi bedtan, cai? —quecuededpanëdash abëd icquido.

<sup>14</sup> Ambobi tabadsho chido bacuëbobëdtabi tambanenuquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac <sup>15</sup> ambi chiacpadomboen

tabadmepanëdash. <sup>16</sup> Aden tabadmesho isun panëmpi 5tedbëdta nuëcquid daëd sananquin abuc isec: —Mibi bëdambocquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

<sup>17</sup> Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

*Chuiquid dapa abentsëcquiobi iquec, quiaid*  
(*Mat 16.13-19; Mad 8.27-29*)

<sup>18</sup> Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

<sup>19</sup> Adoaquien: —Acten mentoanondaid, Uan pa-doen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

<sup>20</sup> Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.

*Abi unëste chiaid*  
(*Mat 16.20-28; Mad 8.30-9.1*)

<sup>21</sup> Adoaquien: —Mimbi ëbi tantiaid nëbi utsi chienda —quepanëdash Esus comapenen chiec.

<sup>22</sup> Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi

chieshënquido dadpen iquendac. Nuquin mat-ses tsusio dapabo yec tsusio utsibo yec Nuquin Papan naden nata quequin chiaid chuibanquin tantiamequido yec quec aidtedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoquini daëdec ushacsho uincuen uaindac —quepanëdash Esus abi uincuen uate chiec.

<sup>23</sup> Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmane quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac. <sup>24</sup> Cuesunenu cac unësmane quiash Esus tantiaquid nebi queboedi Esus tantiesa nebi quequid unësash Nuquin Papa yacno tabadenquio iquendac. Utsibo, Esus tantiaquid nebi, quiashic abi cuesunenuequid icnuc adecbidi Esus tantiaquid nebi, queoapec. Adquid unësash Nuquin Papa yacno tabadendac. <sup>25</sup> ¿Atotsieshun Nuquin Papa yacno tabadaid tantienquio yec nidaidën bëdamboec tabadnuequin bedted-bedtede? Mimbi bedaidënquio Nuquin Papa yacno puduedtiapimbo mibi iquec. <sup>26</sup> Esusbëdtabi ambi chiaid tantiaquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. <sup>27</sup> Nad

iquendac. Tantiaquiota. Chuinu. Ĕbi tantiaquid dadpen yansho ěnabicquid utsin-utsinquien isendac –quepanědash Esus.

*Esus bed-bedquesho istiapimbo yaid  
(Mat 17.1-8; Mad 9.2-8)*

<sup>28</sup> Aden chiashic Esus mědante utsiuc tauadoec ushash Nuquin Papa chiec onquenuec macuěsh yacno nidoapanědash. Petedo, Ūan, Acobo aideded buanec macuěsh yacno Esus nidpanědash. <sup>29</sup> Adec macuěsh yacno nidash Nuquin Papa chiec Esus onquenubi aton běsbed aton dashcutebědi nac-nacquio ushě chěnquiacbimboec icpanědash. <sup>30</sup> Adsho isnubien badedquio dada utsi daěd choash adquiobidi Esusběd nidec. Něidic, Moises, Nuquin Papan ambi naden nata quequin chiaid dada uamiampid; utsibic, Ĕdias, Nuquin Papan ambi chiaid chuimiampid. <sup>31</sup> Aid daědi Esusběd tabadquin Nuquin Papan tantiampicpadec Edusaden yacnoshon Esus uněs uate ushě chiec onquecuededpanědash. <sup>32</sup> Adnubien Esusběd chobedo aběd icquido 3ted ushcasmash tabadtuidquin Esusběd utsi daěd nac-nacquiocquid dasiuidacbimboec bed-bedquesho isbededpanědash. <sup>33</sup> Esusběd daěd nidtuidsho isash Petedo nadpanědash: – Němbobi iquec bědambo iquebique. Němbobi mibi tabadmenun abentsěc chotsěcnuc shubumpi uanuna, Icho. Abentsěc mitsana, utsibic Moisesěn na, utsibic Ediasěn na, quequin shubu uanuna –quepanědash Petedo.



<sup>34</sup> Adec Petedo onquenubien abu ushun isadenquiocnoc abitedi bêtimpanëdash. Adsho isash Esusbëd chobedo dacuëdpanëdash.

<sup>35</sup> Adnubien abu ushunuësh onquec: —Nëidic ëbëd icte bunquidquo, con madombo, ëmbi bëdamboen isaidquo neque. Aidën chiaidquo tantiata —quepanëdash Nuquin Papa Esusbëd icquido tedestedshun isenquiocnobi.

<sup>36</sup> Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

*Mayan icsa dapuduedaid madompi*

*(Mat 17.14-21; Mad 9.14-29)*

<sup>37</sup> Adashic badiadash macuësh dapa yacnoësh Esus budsho isash bëquedec matses dadpen cho-chopanëdash.

<sup>38-39</sup> Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquo sidquianesho aidëmbidi bedshun bëcunedeniac con mado ëcbacushaniosh. Dapuduenenquo icquin con mado aidën uimambo icmedeniosh.

<sup>40</sup> Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquo iccosh —quepanëdash dada abentsëc Esus caic.

<sup>41</sup> Adoquien ambi nianaido caic Esus nadpanëdash: —Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini

chieshtope? –quetanquin: –Min mado bec cho  
–Esusën cac aton mado aton papan bëpanëdash.  
42 Aden bënubi mayan icsan bëcuniac madompi  
uëdëquiampanëdash.

Adsho isun: –Padi. Chën –capanëdash mayan  
icsa chuiquin. Aden madompi bëdametanquin aton  
papa Esusën meneoapanëdash.

43 Adsho isash: –Nuquin Papan nada-  
tiambocquin naid uinsadpambo iquec –  
quecuededpanëdash isquido.

*Abi unëste chuioaid*  
(*Mat 17.22-23; Mad 9.30-32*)

44 Adoquien: –Chuinu. Bëpiscudenquiocquin  
tantiaquiota. Matsesacsho nëbi bedmendabi –  
quepanëdash Esus abi unës uate chiec.

45 Aden chuisho abëd icquidon tantienquioc-  
panëdash. Aden tantienquio yec, Mimbi chiaid  
tantienquio iquembi, quetiapimbo yec otacquo  
tabadcuededpanëdash abëd icquido.

*¿Tsutsi chuiquid dapa icpec? quequin chiaid*  
(*Mat 18.1-5; Mad 9.33-37*)

46 Adashic: –¿Nuquin Papa yacno nidash chuiq-  
uid dapa mitsiquid icpec? –quec Esusbëd ic-  
quido onquecuededpanëdash. ¿Ëbida chuiquid  
dapa icpe? quec ambibi tantiequi adpanëdash.

47 Adoquien Esus tantiaquidquo icquin  
bacuëmpi chomeshun aton dayunquio tabëcash:

48 –Chuiquid dapa icnu, quesa icta. Èbi tantiaquid  
icquin nëid bacuëmpi bëdamboen nashunquid  
iquec ëbi nashunoaquid iquendac. Nuquin Papan  
chiacpadomboen nabanquid Esus nec, quequin  
tantiaquidquo iquec ëbi chomiondaid, Nuquin

Papa tantiaquidquo icoaindac. Nidaidënuësh utsi nashunquidquo icboedi aidquiobi Nuquin Papan chuiquid dapa icta caindac –quepanëdash Esus abëd icquido caic.

*Abimbo tantiaquid ëbëd icquid nec quiaid  
(Mad 9.38-40)*

<sup>49</sup> Adashic, Uan Esusbëd icquid abentsëc nadpanëdash: –Mayan icsa dapuduemebanquid is-pombi. Aidi mayan icsa dapuduemenuec nadposh: “Esus, nadatiambocquin naquidquo mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquo icsho isun: “Padicnuna,” cauidpombi. ¿Adambi bëdamboen chuipo? –quepanëdash Uan Esus caic.

<sup>50</sup> Adoaquien: –Adquid, Padicnuna, cainda. Nadatiambocquin naquidquo Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque –quepanëdash Esus Uan caic.

*Esus bunesabo, Samadia yacnocquido*

<sup>51</sup> Adashic Esus abi abuc indote ushë chote anoentsëqui yanan, Unësmene quenquo yec nidebi, quequin ambibi tantianec Edusaden yacmi Esus nidoapanëdash. <sup>52</sup> Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: –Edusaden yacno Esus nideque. ¿Aidbëd icquido ada mimbi yuedpatsia? –caquien <sup>53</sup> Esus isadaidbo nec, quequin yuedenquiocpanëdash Samadia yacnocquidon.

54 Adoaquien, Acoboböd Uan nadpanëdash: —  
 ¿Ënabicquido unësmenuen mimbi nëdëncatequid  
 chome, Papa, quequindambi Nuquin Papa  
 chuipe, Icbo? —quepanëdash.

55 Adoaquien: —Padicnuna. ¿Matses  
 unësmenuectabi chodio? —quianec 56 shubu  
 daëdpactsëc yacno nidoapanëdash abëd  
 icquidobëd.

*Esus tsibante bunquidën natequid*  
 (Mat 8.19-22)

57 Adec podquedën Esus nidsho abi  
 databëdquid abentsëcshun nadopanëdash: —Mimbi  
 chuibeniäcnombobi mibi tsibananc nidendabi  
 —quepanëdash Esus databëdquid abentsëc.

58 Adoaquien: —Bëdi chëshë aton shëcuën uec.  
 Podochoquidën aton shubu uaic. Aden shubu  
 uainquiocquin Nuquin Papa yacno tabadaid  
 chuibenec nebi —quepanëdash Esus.

59 Adoshombic: —Ëbi tsibanta —Esusën caquien  
 utsi:

—Con pa unësaçsho chococashun mibi tsibanec  
 nidendabi, Icbo —quepanëdash.

60 Adoaquien: —Nuquin Papa yacno tabadnu  
 quequin unësaid chococaquidëmbi ma chococapa-  
 nuna. Mimbi Nuquin Papa yacno tabadnuequin  
 abi yacno tabadaid tantiaquin mimbi chuibeneta  
 —capanëdash Esusën.

61 Adashic, utsi nadpanëdash: —Mibipadquid ic-  
 nuequin mibi tsibanendambi. Con matses nidnu  
 quiacnoba ëbi nidme, Icbo —caquien:

62 —Mibi tsibanu queboedi utsiba tantiec  
ëbipadquid ictiapimbo mibi icpec —quepanëdash  
Esus.

## 10

### *Abi bëyucanec nidquid 72ted icquido* (*Mat 11.20-27; 13.16-17*)

<sup>1</sup> Adshumbic ambi bëyucmiaido dadpen, 72tedi,  
Esusën nidmepanëdash. Daëd-daëdec shubu  
utsi-utsiec yacno nidshun chuibeneta, quequin  
nidmepanëdash. <sup>2</sup> Nidmenun aid 72ted icquid  
Esusën nadopanëdash: —Mimbi ëbi chiac ëbi  
tantianuequid dadpen icpec. Adquido icnuc  
aido tantiamenuen ëbi chuibanquid daëdpactsëc  
iqueque. Naden Nuquin Papa chui: Icbombo,  
mibi cadoque. Mibi tantiamenuen chuibanquid  
dadpen nidmeta, Papa, quequin chui. <sup>3</sup> Aden  
mimbi chiacpaden mibi nidmembique.  
Ëbi chuibenec nidanetan. Mimbi nidshun  
chuibenenubi mibi chieshënquido dadpen  
iquendac. <sup>4</sup> Ëbi chuibenec nidanequin mitsana  
buanenda. Mitsana bedtequidbëdta shictoade  
buanenda. Tapucudte tapucudenquio yec  
nidanetan. Adec nidanequin utsi bëquedash  
tabadenquiocquin datambidanec shubun  
puduedec nidta. <sup>5</sup> Shubun puduedshun naden  
shubu icbo chuita: Nuquin Papabëd abi  
yacnocquido bëdamboec tabadacpadquiec ma nëid  
shubun icquido tabadpanuna. <sup>6</sup> Aden chiac shubu  
icbo bëdamboec tabadnuequid icsho Nuquin  
Papan abi bëdamboec tabadte aid shubun icquido  
menendac. Shubu utsi icbo ëbi chieshënquid  
ictsiash. Adquid yec mimbi chiaid tantianu

quesa aid shubu icbo icpec. Adquid icsho Nuquin Papan abi bēdamboec tabadte aid shubun icquido menenquio iquendac. <sup>7</sup> Mibi yuedacnouidtsēqui tabadta. Adembidi, mibi yuedquidēn meniaid peshun acta. Mimbi chuibanaid cuidquin aidēmbi mibi menendac. Adoac anouidi tabadta.

<sup>8</sup> “Shubu dadpen yacno mibi choacsho yuedshun pete meniac isuidec, Utsitsen bec cho, quenda. <sup>9</sup> Ambobi tabadquin daicsaid bēdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. <sup>10</sup> Shubu dadpen yacno choshon mibi yuedquid nibēdsho isun aton podquedēn nidquin naden chuita: <sup>11</sup> Nuquin Papan chomiaid mibi chuinuec chobi. Ēbi daēdi yuedenquiocsho mibi chuitiapimbo iquebi. Adoac abi yacno ambi chomiaidēn mibitedi yuedtiapimbo iquendac. Nuquin Papan chomiaid tantiata bunesa mibi icsho isash mibi yacno capuec ēbi tabitacquiaid tabesquenu. Is, quequin ismequin adota —capanēdash Esusēn ambi nidmetequad 72ted icquido chuiquin.

<sup>12</sup> Aden chiashic aido chiec abi Esus onquec: — Naid icsabēdtabi naid bēda chuibante ushē chonoc mibi yuedesa Nuquin Papan comapenen cuidendac. Ēbi choabicnuc Sodoma yacnocquido icpampic. Ēbi choabicnuc aidon ēbi tantiatiapimbo icpampic. Adquido Nuquin Papan bēdiactsec cuidendac —quepanēdash Esus.

<sup>13</sup> Aden ambi nidmetequad 72ted icquido chuibanshumbic utsibo isacimboen Esusēn nadopanēdash: —Nēbi icquido, shubu dadpen icquid tantiec unēsquiocquin mibi chiembique. Tantiata. Shubu dadpen icquid Codasin caid

yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësquiocnoc shubiquin abi icsaid ëntsempampic. <sup>14</sup> Aden Tido yacnocquidobëdtan Sidon yacnocquidon tantishun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. <sup>15</sup> Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe? Padenquo. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacbimboec onquec.

<sup>16</sup> Aden chiashic, ambi nidmenu caido 72ted icquido tantiamenuen chuibudec: — Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquo yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

<sup>17</sup> Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimbi chiacpaden nabanombi. Aden nabanquimbic,

Esusën nadatiambocquin naidënquio dapuduenta ëmbi caidtedi mayan icsa dapuduemposh, Icho —quecuededpanëdash ambi nidmiaido 72ted icquido ambi naboed Esus chuibanec.

<sup>18</sup> Adoaquien: —Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacimboecnuc bedquetanacimboec Satanas abucuësh badedquio paëdsho isec niobi. <sup>19</sup> Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiacpadomboen nabanac mibi icsa uatiapimbo iquendac. <sup>20</sup> Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

<sup>21</sup> Aden chuibanshumbic ambi nidmiaidon chi-aid tantiash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen



tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaïdon nabe-dedosh, Papa –quepanëdash Esus Nuquin Papa chiec.

<sup>22</sup> Aden Nuquin Papa chiec onquequin nainec: –Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi –quepanëdash Esus abi tantiec choash iccuededquido caic.

<sup>23</sup> Aden iccuededquido chuibanshumbic naden ambi 72ted icquido nidmian choboedouidtsëqui Esusën chuoapanëdash: –Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. <sup>24</sup> Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic –quepanëdash Esus.

### *Utsi tantiaquin bëdamboen naquidquio*

<sup>25</sup> Adashic, ¿Tantiaquidquioda Esus neque? Tantiabono, abibi quequin dada utsin: –¿Nuquin Papa yacno tabadnuen atotsimbi napeba? chuibanquin tantiamequidën ëbi chui –capanëdash.

<sup>26</sup> Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

<sup>27</sup> Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adem-bidi bëdambo icmequin naban. Ëbi tantiaquin nashuntiaquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

<sup>28</sup> Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

<sup>29</sup> Aden Esusën chiac ëbi otacquio icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiashun Esusën chuimeboed: — ¿Mitsicquid con utsi nepec? —quepanëdash.

<sup>30</sup> Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. <sup>31</sup> Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquid uano

datamposh. <sup>32</sup> Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. <sup>33</sup> Utsibic,

Samadia yacnoësh choquid aid podquedëmbi choquin cuestanquin nianaid istuidash unësqiioquin <sup>34</sup> aton dayun tsadbudshun cuestanquin nia-naidën chiuëtedi aton dauëmbi bënoshcashun bētaneshumposh. Aden bētaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bēdamboen isquin nashumposh.

<sup>35</sup> Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bēdamboen isquin nashunta.

Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh –quepanëdash Esus.

<sup>36</sup> Aden chuishumbic: –Ëmbi chuiboed utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? –capanëdash Esusën.

<sup>37</sup> Adoquien: –Ampequidon cuestanquin nianaid istuidash unësqiio yanquin abi nashumboedien con utsi nec, capendac –quepanëdash Esus chuimequid.

Adoquien: –Adembidi mimbembi ëmbi chui-boedbimboecnuc utsibo tantiaquin nashunoata –quepanëdash Esus.

*Madtan nabanubi Madian tantiaid*

<sup>38</sup> Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. <sup>39</sup> Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash. <sup>40</sup> Adec tsadquin Madian tantianubi Madtan ambi natiadquo yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.

<sup>41</sup> Adoaquien: —Mimbi natiadquo yaid dadpen tantiaquidquo mibi iqueque. <sup>42</sup> Èbi tantiaquidquo icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

**11***Nuquin Papa chiec onquianete**(Mat 6.9-15; 7.7-11)*

<sup>1</sup> Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamëpanëdash. Adembidi Nuquin Papa chiec onqueta quequin ëbitedi tantiamëquin chuioa, Icbo —capanëdash.

<sup>2</sup> Adoaquien: —Nuquin Papabëd onquequin naden chuita:  
“Bëdambocquidquo mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bēdabon mimbi chiacpadomboenuidi naic.

Adomboembidi matses abitedishunquo napashun, Papa.

<sup>3</sup> Tantiaquidquo, mibi cadoque. Bumianenquiocquin badiadquidēn-badiadquidēnquien con pete ēbi bedmedene, Papa.

<sup>4</sup> Adecbidi utsin ēbi chieshēnsho cuidenquo yec ēbi abi icsaid bēpiscudacpadquiequi ēbi icsasho cuidenquo yec bēpiscudoata, Papa.

Adembidi, Satanasën icsa uanushe queshun ēbi cudasquin dayun uata, Papa, quequin chuita”

—quepanēdash Esus.

<sup>5</sup> Adtanequic Esus nadpanēdash: —Mibēd nashunanquid iquec. ¿Adquid icnuda inchēshpotsembo abi yacno nidshun pete mimbi bedshumpatsia?

<sup>6</sup> Inchēshpotsembo pete bedshunuec mibēd nashunanquid yacno nidash: ‘Ēbi yacno utsi chosho pete nibēdnubi yuedombi. Con pete nibēdsho isash pemenu bedec chobi. Mimbi meniaid cuidquin adquidi mibi meneoaimbi,’ quepatsiac mibi mibēd nashunanquid caic.

<sup>7</sup> “Adoquien, nuntanuēshi: ‘Padi. Shēcnandombi. Con bacuē ishcunec din ictoshon mibi menetiapimbo iquebi,’ quequin mibēd nashunanquidēn mibi chuitsiash.

<sup>8</sup> “Aden aidēn chiaqui min pete nibēdnuc chuidonetsiac mimbi. Aden chuidoniac mibi menetsiash. ¿Abēd nashunanquid icshoda mibi menepadic? Padenquo. Mimbi nidenquiocquin

chuidonesho tantiashun mimbi chuiboedtedi mibi menepatsiash –quepanëdash Esus.

<sup>9-10</sup> Aden chiec abi onquec: –Adomboembidi Nuquin Papa chuidonesho mimbi bedtiadquoio yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

<sup>11</sup> “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi? <sup>12</sup> Adembidi, ¿Cachinan bacuë bec cho, queshoda mimbi chichun menedi? <sup>13</sup> Padenquoio. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, qesho tantiashun menenquioda mibi ictic? –quepanëdash Esus.

*Bedtsibun namiaid Esus nec, quequin chiaid  
(Mat 12.22-30; Mad 3.19-27)*

<sup>14</sup> Adashic, mayan icsa dapuduedquin eme uaid icsho Esusën istanquin: –Dapuduen –cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabad-cuededpanëdash. <sup>15</sup> Utsiboen: –Mayan icsan icbo Bedtsibu caidën tantiamiac mayan icsa Esusën dapuduemepash icnui –quepanëdash Esus chieshënquido.

<sup>16</sup> Adnubien iccuededquid utsibo: –Nuquin Papan chomiaidquoio icquin Nuquin Papa mimbi chiac aidëmbi abucshun naquïn ëbi isambo yaid nadatiambocquin ismepatsiashi. Aden mimbi

Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi — quepanëdash iccuededquid utsibo Esus caic.

<sup>17</sup> Aden chuisho tantiash tantiaquidquio yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. <sup>18</sup> Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemquid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic? <sup>19</sup> Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe? <sup>20</sup> ¿Nuquin Papan tantiamiac mayan icsa dapuduemquid ëbi yec ambi chomiaidquio matses chuiquid dapa mibi yacno ënden choabida ictio? —quepanëdash Esus abi chuimequido chiec.

<sup>21</sup> Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec.

<sup>22</sup> Aden namiac tabadnubi chuiquid dapa icnuequid utsi chopec. Nëbi choquidën abia

chuiquid dapan yuabo nameshun nua meniac  
aidën yuabo yanopec —quepanëdash Esus.

<sup>23</sup> Aden chiashic: —Ëbëd icquido ëbi chieshënesa  
nec. Matses ëbëd icquido icmenu quequid nebi.  
Matses Esusbëd icmenu quesa cuëshëdmianquid  
nec —quepanëdash Esus.

*Abibi dapuduemoed mayan icsa dapuduedoaid  
(Mat 12.43-45)*

<sup>24</sup> Aden chiashic abi onquec: —Abi dapuduedaid  
mayan icsa abibi dapuduenanec abipadquid  
tabadacno icsano matses nibëdacno nidash  
capuquin abi dapuduedbocpadquid istuidenquo  
icposh. Adquid istuidambo yec, Abibidi  
dapuduedoanu, quianec anobidi nidoaposh.

<sup>25</sup> Adec nidshun abi dapuduemoed naden  
istuidposh. Mayan icsa nidan, Ëbibi bëdambo  
iquec. Adash bëdambo tabadnu, abibi quiashic,  
Nuquin Papa tantianu, quenquiocposh. Aden  
chienquiocsho aton Mayan Nuquin Papan  
aid menetiapimbo icnuc abi dapuduemoed  
choshon aid abentsëcquo<sup>26</sup> istuidashic nidoashun  
abipadquid chuituidac utsi 7ted abëdi choash  
abitedi dapuduedcuededac dada icsamboshë  
yamposh —quepanëdash Esus.

<sup>27</sup> Aden Esusën chiambien iccuededquid chido:  
—Mibi tishacsho shuma chismiondaid Nuquin  
Papan bëdamboen isaid icpec —quepanëdash Esus  
caic.

<sup>28</sup> Adoquien: —Aden nasho padenquo.  
Nuquin Papan chiaid tantiashun nabansho  
Nuquin Papan bëdamboen isaidquo nec —  
quepanëdash Esus chido caic.



*Onasën ismiampicpaden ismiaid  
(Mat 12.38-42; Mad 8.12)*

<sup>29</sup> Adnubien abi yacno cho-choash utsi dadpen iccuededsho isun Esusën nadopanëdash: —Nëbi nidaidën tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquio iquendac. Nuquin Papan Onas ismiampicpaden ismiaid mimbi isendac. <sup>30</sup> Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantias, Abimbo chuiquid nec, queshun abi icsaid Ninibe yacnocquidon ëmbededpampic. <sup>31</sup> Utsibic, Nuquin Papan dadpen tantiamiaid, Sadomon iquec quesho tantias chuiquid dapa chido Sadomonën chiaid tantianuec ënapenuësh choshon tantias, Abimbo iquec, quepampic. Nuquin Papan matsesën naid icsa ambi naid bëdabëdta chuibante ushë chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bëdamboen tantiaquin chuiquid dapa Sadomon icmepampic. Abitedi tantiampidquio nëmbobi iqueque. Ëmbi chiaid tantiata. <sup>32</sup> Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnocquidon Onasën chiaid tantiapadomboen Nuquin Papan chiaid abimbo iquec, quequin tantienquio icsho Nuquin Papan mibitedi isendac. Nuquin Papan chuimiapaden Onasën chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiaidquio icpampic. Padnuen

mibi icsaid bedshunash abided cuidadtequid nēmbobi iqueque. Ēmbi chiaid tantiata — quepanēdash Esus abibi chiadequi.

*Tabote taboshon bētashenquo yacbimboec abi bēdamboec tabadaid ismequid*

*(Mat 5.15; 6.22-23)*

<sup>33</sup> Aden chuishumbic Esusën abi chuibanec: —Tabote taboshon ompoesa. Adembidi matsun bētashesambo icbo nec. Ma ěmbi yuedaidon isnueshun tabote nēnantan nanquid.

<sup>34</sup> Adoaidbimboec min tantiata iquec. Min tantiata bēdamboecquid icquin bēdamboec tabadquin ismequid mibi nendac. Bētashacimboec min tantiata icnuc icsamboen ismequid mibi nendac.

<sup>35</sup> Con icbo ěbi bednuec choec queshun bēpiscudenquiocquin isted-istedta. <sup>36</sup> Min tantiata icsaisa icsho Nuquin Papan chiacpadomboen tantiaquidquo aidi nec, quequin utsibon mibi isendac —quepanēdash Esus.

*Nuquin Papan icsamboen isaidquo*

*(Mat 23.1-26; Mad 12.28-40; Duc 20.45-47)*

<sup>37</sup> Aden Esusën chuibanshobien padiseyobo abentsēcshun: —¿Ada ěbi yacno pec nidtsia? —capanēdash. Adoac aidbēdi nidash pete sanaid cuate dayunquo Esus tsadbudpanēdash. <sup>38</sup> Adec Esus tsadsho isash, ¿Adpecshenda iquec. Penush mēpamēdenquo Esus icpec? quec abibi onquequin padiseyobon Esus yuedquidēmbi tantiapanēdash.

<sup>39</sup> Adoaquien, tantiaquidquo iquec Esus nadpanēdash: —Ēndenquimbo padiseyobon peshun acnun dēshote cachocbēdtabi pada-padaid cachoc

bëdamboen dapanta quequin chuinëdacpaden mimbi naoaic. Aden dapanshun mimbi codocaidbëdtabi mimbi actequid nitsinaid anauc ampanenquo mimbi icpec. Mibitedi adquo iquec. Nesquin bëchish uquec dapanudquin mimbi tantiaid icsa ënenquo mimbi icpec. Adecbidi, mibi bunaid bednuen icsamboen naquin ampequid mibi nec. <sup>40</sup> Nuquin Papan chiaid tantiesabimboecquid mibitedi nec. Nuquin Papan matses uaquin dadabëdtabi tantiate uainquioda icpampic. <sup>41</sup> Ai. Adquid icnuc aton na nibëdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebëdta min dada bëdamboen isendac — quepanëdash Esus.

<sup>42</sup> Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menenuequin mimbi dayun uaic penquiocquin. Aden nabanquin Nuquin Papan ambi matses bëdamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquo mibi nec, padiseyobo. <sup>43</sup> Adembidi, tsusio dapabimboecsho bëdamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi

tsadtenec. Adomboembidi tantiec matses iccuededacno nidequi, Ēbi bēquedquidon ěbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec. <sup>44</sup> Adembidi, matses uněsaid chococate manenushe queshun ismequin mabiunu, quenquio yacpadomboen ěbi icsaid tantianushe quequin ompoquid mibi nec –quepanědash Esus padiseyobo chiec.

<sup>45</sup> Adoaquien, Nuquin Papan naden nata quequin chiaid tantiembi, quiash utsibo tantiamequid abentsĕc: –Padiseyobo chuiquin ěbipadquido mimbi chuiopaec –quepanědash.

<sup>46</sup> Adoaquien: –Nuquin Papan ěndenquimbo naden nata quequin chiaidbědta mimbi naden nata quequin chiaid dadpen chuibanquin matses mimbi namec. Adoac aided matsesĕn natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

<sup>47</sup> “Adembidi, Nuquin Papan chuimiaid dadpen min tsusedpabon cunesunepampic. Tsusedpabon cunesuniampido ěnenquiocquin tantianu quiacbimboen mimbi shubumpi uabanec. Ēmbi shubumpi uaido isun utsibon bědamboen ispashuni, quequin aden mimbi nabanec. <sup>48</sup> Aden naquin tantiec, Nuquin Papan chuimiaido cunesunequin bědamboen tsusedpabon napampic, quiacbimboen tantiaquid mibi icnuc ambi chuimiampido cunesuniampidobimboecsho Nuquin Papan mibi isec. Nuquin Papan icsamboen isaidquio mibi nec. <sup>49</sup> Ēmbi chiacpaden chuibanta, cabicquin naden Nuquin

Papan chuipampic. Embi chuimiaid utsi-utsien aton matsesën mëyampec. Utsi-utsien mëyanshun cunesunepc, quec Nuquin Papa abitedi tantiaquidquio adpampic.<sup>50</sup> Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nēbi icquido icquin Nuquin Papan chuimiaid tantiesambo mibi nec. Adquido iquec ënden mëyanampidpadquido mibi neoaic. Aido cunesuniampidpadquido mibi neoaic.<sup>51</sup> Tsusedpan abia abed cunesunepampid icnubi ambi tsyuec Sacadias cunesunepampic. Aid Nuquin Papa tabadte shubu uashunaid dayunquobi aidon cunesunepampic. Ai, Nuquin Papan chiaid tantiesatedi ambi chuimaido cunesuniampidpadquido nēbi icquid neoaic.

<sup>52</sup> “Nuquin Papan naden nata quequin chiaid tantiembi, queshun utsibo tantiamenquiosho Nuquin Papan icsamboen isaïdo mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

<sup>53</sup> Aden chiashic, Èbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: — Esus icsamboen chuimenu —quiampanëdash.

54 Adquid icquin Esusën chuibanacno nidaneshun chuimeoanuequin naden padiseyobon tantiapanëdash: Ëbitedishun chuimiäc Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiäduio iquebi, quequin Esus chiembi, quequin tantiaquin Esus chuimepanëdash padiseyobon.

## 12

### *Natiamiantequidbëdtabi dayacmetequid (Mat 10.28-31)*

<sup>1</sup> Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aido tsucus-tsucustsëcquio yec tabadnubien abëd icquido Esusën nadopanëdash: —Sicaid nami uaid cabiunac amëc bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista. <sup>2</sup> Matsesën ompoquin naid Nuquin Papan abitedi ismendac. Matsesën ompoquin chienquio yaidbidi abitedi tantiamendac. <sup>3</sup> Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh

shoshquequin mimbi chiaid Nuquin Papan matstededi tantiamenuen chuoaindac.

<sup>4</sup> “Adembidi chuinu. Tantiata. Mibi cuesunenuequiv dacuëdënenda. Adquidën mibi cuesunequin mibi nibëdametiapimbo iquendac.

<sup>5</sup> Nuquin Papauidtsëqui dacuëdënta. Icsadednequid icsho aidën mibi cuesunemeshun chian anëdënnequivid nësecaindac. Adoanquiduidtsëqui dacuëdënta.

<sup>6</sup> Nuquin Papa tantiaquid yec dacuëdenda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic. <sup>7</sup> Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

*Esus tantiaquid nebi, quequin utsibon tantianubi chiaid*

*(Mat 10.32-33; 12.32; 10.19-20)*

<sup>8</sup> “Abi chiembique. Tantiaquiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi.

<sup>9</sup> Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid ëbi tantiesa neque. Puduedmenda, quequin Nuquin

Papan uaido mayan bëdabo chiendambi. <sup>10</sup> Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquio yacimboec bëpiscudta, Papa, quesho tantiaash

aidën icsamboen chienquo yacbimboec Nuquin Papa bēpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bēpiscudenquiocquin Nuquin Papan abi yacno adquid yuedenquo iquendac.

<sup>11</sup> “Adembidi chuinu. Tantiaquiota. Mibi chieshēnquido iquendac. Adquid icquin chuiquid dapa yacno Esus tantiaquido ěmbi buanacsho aidën mēyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. <sup>12</sup> Nuquin Papan Mayanën mimbi chuibante mibi tantiamequē —quepanēdash Esus abēd icquido caic.

*Aton na dadpen icquidēn tantiaid icsa*

<sup>13</sup> Adashic, abi datsidadquid abentsēcshun: — Con pa unēsān con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanēdash Esus chuiquin.

<sup>14</sup> Adoaquien: —¿Buchibēdta mibi chuiquidtabi nepe? —quepanēdash Esus abi chuita caquid caic. <sup>15</sup> Aden aid chuishumbic utsibo chuiquin nadopanēdash: —Con na dadpen bednu, quesa icta. Mimbi bedaidēnquo mibi Nuquin Papa yacno puduedtiapimbo iquendac.

<sup>16</sup> “Aidpadquid chuinu. Bēdamboen tantiata. Aton na dadpen icnubi aton tiedēn caniquid bacuēash dadpen icsho isash icbo nadposh: <sup>17</sup> ‘Con tiedēn caniquid bacuē dadpen iqueque. ¿Atontsimbimbi aitedi dayun uapeba? <sup>18</sup> Naden



naimbi. Tiedën caniquid ëshë dayun uate shubu shënitedi chicbanshun aidtedi nuamboshëcnuc shubu uabanuna. Aden nuamboshëcnuc shubu uashun aidënquio con tiedën caniquid bacuëtedi sandoshon dayun uanuna. <sup>19</sup> Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aquendambi. Aden naic, Bëdambo iquebi,' quec aton na dadpen icquid abibi onqueposh.

<sup>20</sup> “Adec abibi onquesho tantiashun, ‘Mimbi ic-samboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh –quepanëdash Esus.

<sup>21</sup> Aden chiashic: –Aton na dadpenuidi tanti-aquin Nuquin Papan chiacpaden naisa yec aton na nianec unësash Nuquin Papa yacno tabadti-apimbo iquec –quepanëdash Esus.

*¿Atotsimbi napeba? quesa icta, quequin chiaid  
(Mat 6.25-34)*

<sup>22</sup> Aden iccuededquido chuishumbic Esusën abëd icquido nadopanëdash: –Aton na dadpen icquidën tantiacpaden tantienda. ¿Con na nibëdnuc atotsimbi pepeba? quec dacuëdenda. Adecbidi, ¿Atotsibi dasiuidpeba? quec dacuëdenda.

<sup>23</sup> Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda.

<sup>24</sup> ¿Uicchunënda ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec.

Adquid icsho Nuquin Papan aton pete bedmec. Uicchun Nuquin Papapadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? <sup>25</sup> Adecbidi, ¿mibi unëste ushë abimbo chonoc, Padi, quepecta mibi icti? Padenquo. <sup>26</sup> Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

<sup>27</sup> “Adembidi, cuëtempi chuinu. Tantia. ¿Cuëtempinda aton bacuë ictequid daëdcapec? Padenquo. Adoenquo yaid aton bacuë ictequid bëdaidquo iquec. Cuëtempi bacuë ictequid bëdaidquo yacpadquid chuiquid dapa Sadomonën dashcute adquo ictiapimbo icpampic. <sup>28</sup> Padnuen cuëte bacuë ictequid bëdaidquo icboedi badedquo sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquo ictsiash quequin Nuquin Papa bëdiactsëc tantienda. <sup>29</sup> Aden tantienquo yec ¿Atotsimbi peshun aque? quec dacuëndenda. <sup>30</sup> Nuquin Papa tantiesan abi bunaiduidi tantianubi Nuquin Papa tantiaquidquo icquin pete actequidbëdta ëbi bedmedonec, quequin tantiec tabadta. <sup>31</sup> Adembidi, Nuquin Papabëd tabadnu quequin tantiec tabadta. Aden tantiaquin mimbi bedtiadquo yaid mimbi bedendac.

*Abiyacno choacsho meniaid  
(Mat 6.19-21)*

<sup>32</sup> “Nuquin Papan abi yacno mibi chomeque. Dacuëndenda, ëbi tantiaquido caimbi. <sup>33</sup> Ambo nidabi icquin mitsana menebanquin mitsana bedtequid bedshun aton na nibëdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquio iquendac. Capishton petemaidquio aid iquendac. <sup>34</sup> Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bëdamboec tabadte cudasquin mimbi dayun uaid iquendac —quepanëdash Esus.

*Chieshenquiocquin caintequid*  
(*Mat 24.45-51*)

<sup>35-36</sup> Aden chuishumbic Esusën nadopanëdash: —Aton icbo u isec nidan con icbo chonoshe quiash dasiuidacchobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec. <sup>37</sup> Aden abi cainquido aton icbon bëdambo icmequin nadopec: “Ëmbimbo mibi pemenu. Nëmbo tabadec cho,” queshun ambi yuaido icbonquio pemequin bëdambo icmendac. <sup>38</sup> Adembidi, icbo inchëshpotsembo choshon abi nashunuequin cainquido icsho icbon bëdambo icmiaido iquendac. Adembidi, cachina cuëdanabi badiadabicnuc choshon abi cainquido icbon bëdambo icmiaido iquendac. <sup>39</sup> Adquidpenquio icbo utsi chuinu. Tantia. Aidi abi cainquid nibëdnubi aton na icnuc isedtanec choshon isac ampequid ënden nidac. Adsho isash, Ampequid

choec, quequin tantiaquid yec nidenquio ictsenobi, quependac icbo. <sup>40</sup> Adquiecbidi ampequid choacbimboec Nuquin Icbo choeque. Ad icnuc, Chosho ëmbibi tantienquiocchitomane qeshun chieshenquiocquin ëbi cainta — capanëdash Esusën.

<sup>41</sup> Aden Esusën chuisho tantiash Petedo: — ¿Utsi chuiquin mibëd icquidoudi tantiamenuenda chio? ¿Abitedi tantiamenuenda chio? Tantiyanu. Ëbi chui —quepanëdash Esus caic.

<sup>42</sup> Adoaquien: —¿Icbon chiac mitsipadquiocquin ambi namiaido bëdamboen napeba? Adquid chuinu: Pete tambanshun musucshun ëmbi namiaid utsitedi bëdamboen menebanta, quequin ambi namiaid utsi abentsëc chianec icbo nidac. <sup>43</sup> Adec nidashic choshon ambi chiacpaden ambi namiaidën chieshenquiocquin nabanacsho isun icbon bëdambo icmiaid nendac. Adquid naden chuipec: Ëbi nidan chieshenquiocquin mimbi nabanoque.

<sup>44</sup> Ëmbi namiaid utsibotedi ëbipadquiocquin chuiquid icta. Adquid icquin con natedi dayun uata, quequin chiendac icbon. <sup>45</sup> Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshënquin cuesbanshun ambentsëqui nua peshun tantienquio yanquin aquec. <sup>46</sup> Aden nabanquin tantienquiocnoc aton icbo choshon ambi namiaidën icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

<sup>47</sup> “Adembidi, ambi chiacpaden nabanesa icsho isun, Comapenen cuesta, icbon cac cuesendac.

<sup>48</sup> Aton icbo bunaid tantiabicquidën cuesmeti-

adquiocquin nabansho aton icbon bēdiactsēc cuesmendac. Adembidi, Nuquin Papan dadpen tantiambiaido ambi chiacpaden nashuntiadquio iquen-dac. Adembidi, icbon dadpen meniaidon dadpen meneoatiadquidi nendac —quepanēdash Esus.

*Utsibēd bēdamboec tabadnu quesa icquin cuēshēdmequid*

*(Mat 10.34-36)*

<sup>49</sup> Aden chiashic abi onquec: —Ēbi tantiaquid icnuc ēbi tantiesa yec cuēshēdendac. Aido ěnden cuēshēdondan ēbi tantiaquidombo bēdamboec tabadtsiandac, quec tsadebi. <sup>50</sup> Adecbidi, Yuecshun ēbi unēs uanun mēyantequid iquendac, quequin tantiec, Ěnden mēyanonaid iquec abuc Nuquin Papabēd tabadtsiandabi, quec tsadebi. <sup>51</sup> ¿Nidaidēnshun abitedi bēdamboen tabadmenu quectabi chodionda? Padenquio. Ěmbi chiaid tantiesa ēbi tantiaquidbēd icboedi cuēshēdtsiash quianec chopondabi. <sup>52</sup> Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuēshēdec adquid. <sup>53</sup> Nadec cuēshēdtsiash: aton papa ēbi tantiaquid icnuc con papadquid icnu quesa aton mado cuēshēdendac. Shubu utsin aton mado ēbi tantiaquid icnuc aton papa adquid icnu quenquio yec cuēshēdendac. Adecbidi aton tita ēbi tantiaquid icnuc con tapadquid icnu quenquio yec aton champi cuēshēdendac. Shubu utsin, aton champi ēbi tantiaquid icnuc aton tita padenquio yec cuēshēdendac. Shubu utsin aton chaya ēbi tantiaquid icnuc aton babanēn padenquio yec cuēshēdendac. Shubu utsin, aton babanēn ēbi

tantiaquid icnuc aton chaya padenquio yec  
cuëshëdendac —quepanëdash Esus. Abi tantiesa  
cuëshëdtequid chuibanec.

*Nuquin Papan ismiantè isun nad iquendac, que-  
quin tantiaid*

*(Mat 16.1-4; Mad 8.11-13)*

<sup>54</sup> Aden abëd icquidombo chuishumbic Esusën  
naden iccuededquido chuioapanëdash: —Inchësh  
chosho isec, Ue choec, quiacpadec choec.

<sup>55</sup> Adecbidi, ushë chënquec chosho isash, Chumbo  
yampec quiacpadec iquec. <sup>56</sup> Aden isquin mimbi  
ëmbi nidaidëshun ismiaidbëdta abucshun ismiaid  
mimbi tantiec. Aden abucshun ismiaid isquin  
tantiaquidquio icquin ¿atotsieshun abucshun  
Nuquin Papan chomiaid isumbi tantienquiocquin  
mibi icsaid ënenquio ique? —quepanëdash Esus  
iccuededquido caic.

*Utsibëd chushcananquid*

*(Mat 5.25-26)*

<sup>57</sup> Aden chiashic: —Utsibëd chushcananquido  
mibi nec. Adec tabadec ¿atotsi quiash, Naden  
natiadquidi nebi, quequin tantiashun mibi ic-  
said ënenquio ique? <sup>58</sup> Utsi icsambocquin mimbi  
nadenec. Adsho isun matses cuidte chuiquid  
yacno aidëmbi mibi buanshobi nëish bëdamenuen,  
Mimbi chiacpadomboen mibi nashunu, quequin  
bëdamboen chuita. Mibi adenquio icsho matses  
cuidte chuiquid yacno buanshun mibi icsaid chiac  
matses cuidte chuiquidën, Quënën nauedmenuen  
buanta, cac buanshun quënën nauedmequidën  
mibi quënën nauedmepec. <sup>59</sup> Aden nauedaqui

mimbi icsamboen naboed cuidnante meniabic-nuc quënë yacnoësh mibi puduentiapimbo iquen-dac –quepanëdash Esus.

## 13

*Utsibo unësmiacpadec unësmemane quequin mibi icsaid ënta caid*

<sup>1</sup> Aden Esusën chuibanubien iccuededquid ut-sibon, Esus chuimenu, quequin caimpanëdash. Aden cainequi Esusën chuibanquin nainsho tantishun iccuededquid utsibo: –Chuinu. Tantiata. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesunaidën intacbëd daëdash chididiquiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi –quecuededpanëdash Esus chiec.

<sup>2</sup> Adoaquien: –¿Cadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemiash, quequinda mimbi tantiape? <sup>3</sup> Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe queshun. <sup>4</sup> Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacenaid uebudquin abëd icquido 18ted cuesac unësosh, quiosh. ¿Edusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequinda mimbi tantiape? <sup>5</sup> Mimbi icsamboen tantieque. Utsibo unësacpadec unësmemane quequin mibitedishun mibi

icsaid ënta –capanëdash Esusën abi chuimeboedo chuiquin.

<sup>6</sup> Aden chuishumbic utsitsen chiec: — Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. <sup>7</sup> Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuec choudobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

<sup>8</sup> “Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaid chëshë chodquiaid ëbi bëdamboen tasiameta. Adoac bacuëtsiash. <sup>9</sup> Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh –quepanëdash Esus. Ëmbi tantiacpadec tabadenquiocboedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

### *Cashuebudaïd bëdamiïd*

<sup>10</sup> Adashic, chonoadtemaid ushën Nuquin Papan chiaïd chuibante shubun puduedshun Nuquin Papan chiaïd Esusën tantiamenubien <sup>11</sup> seta dadpen 18tedi matamequin mayan icsan shuabudaïd icpanëdash. <sup>12</sup> Adquid icsho isun Esusën: —Shuabudaïd icboedi nëbi cacueoaid mibi iquendac, chido –cashun <sup>13</sup> mishac cacuiash,



Nuquin Papan nadatiambocquin naid nec, quequin chiec chido onquepanëdash.

<sup>14</sup> Aden chonoadtemaid ushën Esusën chido bëdamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bëdamenu quequin nëid ushënquoio bëdamenda. Chonoadtequid ushënquoio bëdameta — capanëdash iccuededquido chuiquin.

<sup>15</sup> Adoaquien Esus: —Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono queshun mimbi yuaid tënëshacchobi acte yacno buanenquioda mimbi icpe? <sup>16</sup> ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiamequin chiec.

<sup>17</sup> Aden Esusën chuisho tantiash, Adenda, quequin bëdamboen chiombi, quetiapimbo yec otacquoio tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

### *Cuëte ëshëmpi chiaid*

*(Mat 13.31-32; Mad 4.30-32)*

<sup>18</sup> Adashic: —¿Nuquin Papan shubun icquido mitsipadquidquoio icpec? <sup>19</sup> Nadquidquoio iqueque. Chuinu. Tantia. Icbon cuëte ëshë pistsëcquiocquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabededec. Adquiecbidi, Nuquin Papan chiaid chuisho tantiatsëcquidën

tantiabenash bēdamboquid icsho isash matses  
utsibo ēbi tantiaquid Nuquin Papan shubun  
icquido dadpen yanec —quepanēdash Esus.

*Sicaid nami uaidpadquid*

*(Mat 13.31-33)*

<sup>20</sup> Aden chuishumbic utsitsen chuioaic: —  
¿Nuquin Papan shubun icquido mitsipadquidquo  
icpec? <sup>21</sup> Nadquid iqueque. Tantia. Sicanun nami  
uatepadquid nec. Sicaid chidon nami uashun  
cabiunac amēec bidisquedoec. Adomboembidi  
ēmbi chiaid ēbi tantiaquidēn chuibanac ēbi  
tantiaquid dadpen yanec utsibon isenquiocnobi  
—quepanēdash Esus.

*Pudued-puduedtequid shēcuē pistsēcquo chiaid*

*(Mat 7.13-14, 21-23)*

<sup>22</sup> Adashic, Edusaden yacmi nidoaquin shubu  
dadpen icquid utsi-utsiec yacno isbidanquin  
shubu daēdpacksēcquid utsi-utsiec yacnotsen  
isbidanoaquin anocquidotsen tantiamenuen  
chuibenenu, quec Esus nidpanēdash. <sup>23</sup> Adec  
nidsho isun iccuededquid abentsēcshun  
nadopanēdash: —¿Nuquin Papa yacno matses  
daēdpacksēcta nidpec? Tantuanu. Ēbi chui.

Adoquien Esusēn nadopanēdash: <sup>24</sup> —  
Nuquin Papa yacno pudued-puduedtequid  
shēcuē pistsēcquo iquendac. Esusquo tantiec  
aidēmpinquo mibi puduedendac. Mimbī tantiaid  
utsi icnuc tsucusec puduedtiapimbo mibi  
iquendac. Adquid dadpen icnuc, <sup>25</sup> Nuquin Icbon,  
Ēbi yacno puduedte ushē naimbudosh, caqui cho-  
choshon, Ēbi puduedme, quequin comapenen  
cuēmbededpec.

“Adoaquien: ‘Ëbëd icquidpenquoio mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

<sup>26</sup> “Adoaquien: ‘Mibëdtambi peshun acbededombi. Ëbi yacnoshon mimbi tantamequin chuibansho tantiombi,’ quequin abi tantiesan Nuquin Icho chuipec.

<sup>27</sup> “Adoaquien: ‘Icsaquido mibi neque. Nëmbo puduedenda,’ quepec Icho. <sup>28</sup> Aden chiaqui Abadauan yec Isac yec Acoho yec quec Nuquin Papan chuimaido aidtedi Nuquin Icho yacno tabadsho isash abi tantiesa adtiapimbo yec chian anëdënquiaco tabadec shubiquiec, Nuquin Papa icsambo iquec, quec nëishpec. <sup>29</sup> Nuquin Papa yacno abi tantiesa puduedtiapimbo nobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. <sup>30</sup> Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac — quepanëdash Esus.

*Edusaden isash anocquido Esus unësquiqtequid  
(Mat 23.37-39)*

<sup>31</sup> Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquoio nidec nid —capanëdash Esus chuiquin.

<sup>32</sup> Adoaquien: —Edodes cuesunemenuecbimboec onquequidquoio nec. Aid yacno nidshun naden chuita. Nëbi mayan icsa dapuduemequin

utsibo bēdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushē utsin-utsinquien adomboembidi nabanoaimbi. Adobanquimbi naimbudembi.

<sup>33</sup> Adobanequi nēbi capuebi. Adobanequi badiadash capuoaiibi. Adobanequi abadiadash capuoaiibi. Adobanequi Edusaden yacno capuoaiibi. Adec capuec ¿Edusaden yacno choabidabi unēs uapec? quiosh, Esus quequin Edodes chuita — capanēdash Esusën.

<sup>34</sup> Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanēdash: —Nuquin Papan chuimiaido cuesunquido mibi nec. Adembidi, Nuquin Papan mibi yacno chomiaido cuēnoten se-sequido mibi neoaic. Ēbi tantiaquid icmenu, quequin chuideniombi. Cachinan, Con bacuē chieshēnquid choec, qeshun nua shoccotsēcshun aton bacuē cudasquin mabēsec aton podon. Adembidi: Mibi chieshēnquid choec, qeshun mibi cudasquin chuibanombi. Aden chuisho tantiatiapimbo yec mibi tabadpoc.

<sup>35</sup> Adquido yec nēbi min shubun icquido cudasquid ēbipadquid nibēdec. Nad iqueque. Tantia. Mibi chieshēnec cuesunenuequido choabicnuc ēbi nidacsho yuen ēbi isenquio mimbi iquendac. Yucash abucuësh choasho isash, Ambi chomiaid Nuquin Papan bēdamboen isaidquio nec, quequin tantienquiochoedēmbi tantiendac —quepanēdash Esus Edusaden uano icnuc Edusaden yacnocquido tantiamequin chiacbimboec onquec.

# 14

## *Padiseyobon shubun Esus puduedash tabadaid*

<sup>1</sup> Adashic, chonoadtemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bēdamenushe queshun isnuequin padiseyobo utsibo tabadquin caimbededpanēdash. <sup>2</sup> Aden caimbedednubien podo nidte chedo bidisquiaid uano tsadsho isun Esusën: <sup>3</sup> —¿Chonoadtemaid ushën daicsambocquid bēdamenquiocte ushë nec, quequina mimbi tantiape? —caquien <sup>4</sup> abi caimbededquido otacquo tabadcuededpanēdash. Adec aido otacquo tabadcuedednubien podo nidte chedo bidisquiaid dada Esusën bedshun bēdameshun: —Nidec nid —cac bēdambo yec nidpanēdash.

<sup>5</sup> Aden aid nidmeshun abi bēdamenushe quequin caimbededquido caic: —¿Chonoadtemaid ushën nua uēdēshcaidën min baca ampaēdacsho isun badedquo bedtanquin indoenquioda mimbi ictsia? —quepanēdash Esus. <sup>6</sup> Aden chuisho tantiaash adquiobidi otacquo tabadcuededpanēdash.

<sup>7</sup> Adashic, tsusiobon dayunquo tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiaashun Esusën nadopanēdash: <sup>8</sup> —Pec cho, cac choshon tsadte bētinenda. Tsadte mimbi bētinambien shubu icbon ambi pec cho caid utsi mibi chuiquid tsusio chosho <sup>9</sup> isun: “Chuiquid dapa choeque. Uano tabadad,” icbon cac icsamboen naombi quiaash natiaic uano tsadpec mibi. <sup>10</sup> Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nēmbō, chuiquidbēd tsadec cho,” capec mibi shubu icbon.

<sup>11</sup> Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac –quepanëdash Esus abëdta yuedaido caic.

<sup>12</sup> Aden aido chuishumbic abi yuedquid Esus nadpanëdash: –Pemenu, quequin mibëd icquid min utsibo aton na dadpen icquidoudi pec cho cainda. Aido pemiash, mibi pec cho caoic.

<sup>13</sup> Pemenu, quequin aton na nibëdquido, daic-saidobëdta bëshuaido pec cho cata. <sup>14</sup> Adquido mibi cuidquin pemetiapimbo iquec. Adquido pemiash, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac –quepanëdash Esus abi yuedquid caic.

### *Nuquin Papa yacnoshon pequido*

<sup>15</sup> Aden Esusën chuisho tantiasch abëdtan pec tsadquid abentsëc: –Nuquin Papa yacno nidshun abëdtambi pec bëdambo iquebi –quepanëdash.

<sup>16</sup> Adoaquien aidi tantiamenuen utsi chiacbimboec Esus nadpanëdash: –Yuednu, quequin nadënquio pec chota, quequin ambi yuedtequid dadpen chuiposh. <sup>17</sup> Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh. <sup>18</sup> Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaaid abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

<sup>19</sup> “Utsibic: ‘Baca bedshun, Bëdamboen nimban-quinda buaneque. Isnu,’ queshun isedtanen-quiocquin ambi bedboed nimbameposh.

<sup>20</sup> “Utsibic: ‘Con chido bedombique. Nidenquo iquebi,’ queposh.

<sup>21</sup> “Aden chuisho tantiash nidshun aidon chiac-paden aton yuan icbo chuioaposh. Adsho tantiash nēishun icbon: ‘Ĕmbi isedacmaido yacno nidshun, Pec cho, cata. Aton na nibēdquidbēdta daicsaid, bēshuaid chedo chuitan,’ cac aton yua nidposh.

<sup>22</sup> “Nidshun chuitanec aidobēdi choshon, ‘Mimbi chuiboedo bēombi. Aido icnubi abi tabadte iquec,’ queposh yua.

<sup>23</sup> “Adoaquien: ‘Shubu ěnēdacno nidshun ěmbi chuibocpadquido isun bēoata ma con shubun tsucus-tsucustsēcquo yec ma adquido tabadpanuna. <sup>24</sup> Abia ěmbi pec cho caidon ěbēdtambi peti-apimbo iquendac,’ queposh icbo —quepanēdash Esus.

### *Esuspadquo ictequidquo*

<sup>25</sup> Adashic, nidsho matses dadpenshun tsibanac abi choacmi bidiadshun isec Esus nadpanēdash: <sup>26</sup> —Ĕbipadquo icnuequid aton papabēduidi icquid iquec ěbipadquo ictiapimbo iquec. Adecbidi, aton titabēduidi icquid iquec ěbipadquo ictiapimbo icoaic. Adecbidi, aton chidobēduidi icquid iquec ěbipadquo ictiapimbo icoaic. Adecbidi aton bacuēbobēduidi icquid iquec ěbipadquo ictiapimbo icoaic. Adecbidi, aton utsibobēduidi icquid iquec ěbipadquo ictiapimbo icoaic. <sup>27</sup> Unēsmane quiaash mēyanac dayactiapimbocquid ěbipadquo ictiapimbo icoaindac —quepanēdash Esus.

<sup>28</sup> Aden chiec Esus abi onquec: —¿Shubu uanu, queshun abia shubu uaid isec, Nēidtenquo nanu, queshun aitedquibidi

bëshun toccashun shubu uainquioda icpec?  
<sup>29</sup> Aden tantienquiocquidën abentse-abentsen  
 bë-bëtsëcquin baded naintiapimbo iquec. <sup>30</sup> Adsho  
 isun utsibon mamënshumpec. Bëdamboen isun  
 shubu uaquidpadquid, Esuspadquio icnu,  
 qeshun ëmbi chiaid bëdamboen tantiabenash  
 adquiobidi icpec. Ëbi tantiauidtsëcquid ëbipadquio  
 ictiapimbo iquec.

<sup>31</sup> “Adembi chuinu. Tantiata: ‘Mibëd icquidobëd  
 cuesnanuec chuiquid utsi nëmbo cho-choec,’  
 qesho tantiashun nëmbobi icquido chuiquidën  
 naden tantiapec: ‘Ëbëd icquido daëdpactsëc  
 iquec. Aidedtsëqui iquec dayacquiocquid icquin  
 chuiquid utsi abëd icquido cuemepec, qeshun  
 ma chobono,’ quequin caimpec. <sup>32</sup> Padnuen, abëd  
 icquido dayactiapimbo icsho isun chuiquidën:  
 Chuiquid utsi bëquedtanta. Bëquedshun, Mibëdi  
 ictsiabi. Ëbëd icquido chuiquid icta, ëbi chuiquid  
 quiosh, quequin chuita, quequin chuiposh.  
<sup>33</sup> Adembidi ëbipadquio icnuequidon bëdamboen  
 tantiata. ¿Ëbi chuiquid Esus nec, quequin ambi  
 chiacpadendambi nabampeba? Ai, adonona,  
 qeshun adota. Adoesa, Esuspadquiocquid nebi,  
 quenda –quepanëdash Esus abi tsibananquido  
 chiec.

*Sa batapentsëcquiocquid*  
*(Mat 5.13; Mad 9.50)*

<sup>34</sup> Aden chiashic Esus nadpanëdash: –Sa  
 batambo iquec. Casecac utsibëd daëdash  
 batambo iquec. ¿Sa batapentsëcquiocquid casecac  
 batamboda icpadic? <sup>35</sup> Padenquio. Secatequid  
 adquid nendac. Adecbidi Esuspadquio icnu



quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tantianu, qeshun tantiacpadomboen nabanta –quepanëdash Esus.

## 15

### *Obeca abentsëc bënudtequid (Mat 18.10-14)*

<sup>1</sup> Adashic, icsaquid utsibobëd ancanquidën mat-sesën aton na buansho isun aton na bedtequid nëidtedi bedta caido, Tantianu, quiash Esus dat-sidadpanëdash. <sup>2</sup> Adsho isash padiseyobo Esus tantiamenquio yec chushquiacbimboec, Abi dat-sidadquido icsambocquid icscho cacumenquioc-quin aidobëdtambi peshun Esusën aquec, quec abibi onquecuededpanëdash.

<sup>3</sup> Adoaquien, tantiaquidquio iquec Esus: <sup>4</sup> — ¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibënec nidenquioda mibi icpe? <sup>5</sup> Aidi nibënquin istuidash, Con obeca istuidbosh bëdambo iquebi, qeshun chiadquin buanec icho nidec. <sup>6</sup> Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipec. <sup>7</sup> Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac –quepanëdash Esus.

*Aton na bedtequid bënudtequid*

<sup>8</sup> Aden icbon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec? <sup>9</sup> Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

<sup>10</sup> “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuedec —quepanëdash Esus.

### *Aton mado cuëshëdquid*

<sup>11</sup> Aden chido chiashic utsi chiacbimboec Esus nadpanëdash: —Aton mado daëd icnubi <sup>12</sup> tsyuec tishaid aton papa caic: ‘Tsusio budquin mimbi chiondacpaden nëbi ëbi aited meneta, papa,’ quepondash. Adoac aton na musucshun aton mado abi daëdi menebampondash.

<sup>13</sup> “Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash. <sup>14</sup> Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash. <sup>15</sup> Adec bundoquiec abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ queshun aton chancho yacno tsusion mado nidmepondash. <sup>16</sup> Aden nidmiac nidquin chancho peme-

banequi ambi chancho pemaiad petiadquoio yec tabadshobi anocquidon menenquoio icpondash.

<sup>17</sup> “Adec natiambo bunec tabadquin aton papa ambi nianondaibëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi. <sup>18</sup> Nëbi con pa yacno nidshun naden con pa chiemi: Nuquin Papan chiacpaden nainquiocquin mibi tantienquoio yec nidshun icsamboen nabanombique. <sup>19</sup> Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiemi, <sup>20</sup> abibi quianec aton papa yacno nidoapondash. Adec nidec ancuenquoio yacno aton mado nidondaic casenash chosho isash unësquiocnoc aton mado bëquedquin dayumbudshun shubi uatanquin aton papan tanchocapondash. <sup>21</sup> Adoac ambibi tantiabocpaden aton papa chuiquin: ‘Nuquin Papan chiacpaden nainquiocquin mibi tantienquoio yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

<sup>22</sup> “Aden chiaquien bëdambo yanshun ambi namiaidombo naden aton papan chuipondash: ‘Con mado ënden nidondaic choashe. Dasiuidte bëdaidquoio bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta. <sup>23</sup> Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. <sup>24</sup> Con mado unësacimboeçoedi nëbi ëbëdi tabadoaic. Aidi bënudacimboeçoedi nëbi istuidacimboeçoesh iquec,’ cac bacan bacuë cuesuneshun

codocacsho pebededpondash.

<sup>25</sup> “Adnubien bëyuc tishaid tied nantan icpondash. Auëshquio nidec shubu anoentsëqui choquin tentencate cuëdëmec matses cuëdënsho tantiatuidpondash. <sup>26</sup> Aden tantiatuidashien aton papan namiaid istuidash: ‘¿Atotsi naic nec?’ quepondash bëyuc tishaid.

<sup>27</sup> “Adoaquien: ‘Min utsi ënden nidondaic choaposh. Aidi chosho isash unësquiocquin nuquitedi bëdamboec tabadquin pemenuëquin aton bacan bacuë nuacquid dapa papan cuesunemiosh,’ cac <sup>28</sup> bëyuc tishaid nëishash shubun puduedenquio icpondash.

“Adsho isash, Puduedenquio iccosh, quequin chiac bëyuc tishaid yacno nidshun: ‘Min utsibobëd bëdambo icnuec cho, mado,’ capondash aton papan. <sup>29</sup> Adoaquien: ‘Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. <sup>30</sup> Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,’ quequin bëyuc tishaidën aton papa chushcapondash.

<sup>31</sup> “Adoaquien: ‘Mado, ëbëd icquid mibi nec. Adquid icnuc con natedi mitsana neyoc. <sup>32</sup> Min utsi unësacimboecboedi nëbi choash tabadoaic. Aidi bënudacimboecboedi nëbi istuidaid nec,’ quequin aton papan choaedën buchi chuipondash — quepanëdash Esus.

## 16

### *Icbon na icsamboen isquid*

<sup>1</sup> Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh.

<sup>2</sup> Adoac, ambi con na ista caid chomiash icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ¿Ëmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnü,’ queposh icbo.

<sup>3</sup> “Aden chiac icbon na isquid otacquio onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi. <sup>4</sup> Naden natsiambi. Con icbon na meniondaid abitedi cuidmenquio yac ëbi yuedtsiash,’ queposh.

<sup>5</sup> “Aden tantiashun ambi icbon na meniondaid abentse-abentsen chomiac bëyuc choquid chuiquin: ‘¿Tedtsi ëmbi con icbon na meniaqui mimbi cuidenquiocpaccoc?’ caquien:

<sup>6</sup> “ ‘Bëchi shocosh nuacquid dapan cushtoaid 15tedi bedshun cuidamboccombi,’ queposh.

“Adoquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

<sup>7</sup> “Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“Tsitsan dapa dadpen 1000ted tiedën caniquid ëshë bedombi,’ queposh.

“Adoaquien: ‘Mimbi aidted bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

8-9“Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquo iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

<sup>10</sup> Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac. <sup>11</sup> Adembidi mimbi nidaidënshun bedquin mimbi icsamboen nabansho isun, ¿Ëbi tantiaquid bëdamboen ista, quequinda Nuquin Papan mibi chuipeba? Padenquo

iquec. <sup>12</sup> Adembidi, ¿utsin na isquin bēdamboen nashunenquo icsho isun abi yacno chosho isun mibi menependa ictic? Padenquo.

<sup>13</sup> “Adecbidi, chuiquid daēd icnuc aid daēdshun namiaidquo ictiapimbo mibi iquec. Abentsēcshun chiaiduidi tantiaquin utsin chiaid mimbi chieshēnec. Adquiobidi Nuquin Papa mimbi tantiaidquo icquimbi mitsana bedtequid mimbi tantiaidquo ictiapimbo iquec —quepanēdash Esus.

<sup>14</sup> Aden chuibanubi aton na bedtequid ambi tantiaidquo icnuc chieshec padiseyobo tabad-cuededpanēdash. <sup>15</sup> Adec tabadsho isun Esusēn: — Bēdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bēdamboen naquidbimboecsho matsesēn ispashuni, quequin tantiaquin nasho Nuquin Papan bēdamboen istiapimbo iquec.

<sup>16</sup> “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesēn dada uampidbēdta Nuquin Papan chuimiaid utsibon dada uampid mimbi ēnden tantiondaid nec. Nuquin Papa yacno puduedmianquid iquec, quequin nēbi chiaid utsi nec. Ad icnuc Nuquin Papa yacno puduedmianquid tantianu, quenquo yec ambibi tantiacpadec puduedte bunec. <sup>17</sup> Abubēd nidaid ēnēdtequid icnuc Nuquin Papan naden nata quequin chiaid ēnēdtiapimbo iquendac.

*Aton chido nianquid  
(Mat 19.1-12; Mad 10.1-12)*

18 “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic –quepanëdash Esus.

*Aton na dadpen icquid icnubien aton na nibëdquid*

19 Adequi onquequimbi utsi chiacbimboen Esusën naden chuipanëdash: –Dada, aton na dadpen icquid bëdaidquio dasiuidquidën badiadquidën-badiadquidënquien nua peshun acposh. 20 Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. 21 Bunquiec ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bëtashuntuidposh.

22 “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi 23 chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec. 24 Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana daebu-doaquin ëbi ëcpanun Dasado acte bëme, papa,’ caposh.

25 “Adoaquien: ‘Chuinu. Tantia, abuido. Ënden nidaidën tabadquin mitsana dadpen bedbanec



bëdambo mibi tabadnubien Dasado comapenec bunquiec tsadposh. Nëbi aidi ënabi bëdamboec tabadnubien anchumbo yec mibi tënquebudec. <sup>26</sup> Adboedi, uquëmbo mibi iquiec cuëma utsiuc potetemaic icnuc nëuëshquio nidtiapimbo iquiec. Adquiobidi mibi yacnocquido nëmbo chotiapimbo icoaic,' quequin Abadauanën aton na dadpen icboed chuiposh.

<sup>27</sup> “Adoaquien: ‘Ëbi yacno potetemaic icnuc con pan shubu yacno Dasado nidme. <sup>28</sup> Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe qeshun Dasado aido chuimetanta, papa,' queposh aton na dadpen icboed.

<sup>29</sup> “Adoaquien: ‘Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,' quequin Abadauanën chuiposh.

<sup>30</sup> “Adoaquien: ‘Aid tantienquioctsiash, papa. Unësboed nidshun chiac aidon tantiapatsiash,' quequin aton na dadpen icboedën chuiposh.

<sup>31</sup> “Adoaquien: ‘Padicnuna. Nuquin Papa tantiesa icquin uincuemaidën chiaid min utsibon tantienquio icpatsiash,' caposh Abadauanën aton na dadpen icboed chuiquin –quepanëdash Esus.

## 17

*Matses icsaid chiaid, ambi Esus tantiaid chiaid, ambi natequid chiaid*

*(Mat 18.6-7, 21-22; Mad 9.42)*

<sup>1</sup> Aden chuishumbic abëd icquido Esusën nadopanëdash: –Icsa uanquid iquendac. Adquid

Nuquin Papan comapenen cuidendac. <sup>2</sup> Adquid ëbi tantiabenabicquid icsa uanabicsho cuënote yuëmbocquid têtanetanquin acte shodomboshë yacno nënepatecnëdan. <sup>3</sup> Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënëdnuna,’ quesho tantiash aidi icsainquo yacbimboec bëpiscudta. <sup>4</sup> Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedebidi aidi icsambo yenquo yacbimboec bëpiscudoata –capanëdash Esusën abëd icquido chuiquin.

<sup>5</sup> Adoaquien: —Nuquin Papa nadatiambocquin nabanquidquo nec, quequin tantiaquidquo ic-tiadquo iquebique. Adquid ëbi icme, icbo —capanëdash abëd icquidon Esus chuiquin.

<sup>6</sup> Adoaquien: —Cuëtempi ëshë mostasa caid pistsëcquo iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquo iquec, quequin tantiabenshun nëid cuëtempi caic, Cuëte mananuc tabadboedi adquiecbidi

acte nantan tabadoata, quequin mimbi  
chiacpadec acte nantantsen abi tabadacpadebidi  
tabadoaindac –quepanëdash Esus.

<sup>7</sup> Aden chiashic Esus abi onquec: –¿Min yua  
mimbi neshcata cac nidshun neshcaquin nainash  
shubuno chosho isun: “Nëmbo tsadquin pec cho,”  
caquinda mimbi icpe? <sup>8</sup> Padenquio. “Con  
pete codocashun ëbi pemeshun acte menetanquin  
mimbisen peshun acta,” mimbi caic. <sup>9</sup> Aden  
mimbi chiac mimbi chuiboedtedictsëqui naban-  
quin mimbi yuaidën naimbudec. Aden naimbud-  
sho isash: “¿Bëdamboen mimbi naoc,” quecta mibi  
icpe? <sup>10</sup> Padenquio. Ambembi nainquio iccosh.  
Mimbi chiacpaden min yuan nabanosh. Adem-  
bidi Nuquin Papan chuiboedtedtsëqui nabanash  
Nuquin Icho caic: “Mimbi chuiboedtedi naban-  
pombi. Mimbi namiaid icquin ëmbi naboed ëmbi  
natequiduidi napombi,” quequin mimbi chuite  
nendac –quepanëdash Esus.

### *Daushumbocquido bëdamiaid*

<sup>11</sup> Adashic, Edusaden yacno nidequi nidaid  
Cadidia caid ënëdacno nidaid Samadia caid  
yacno datambëtsenec <sup>12</sup> shubu daëdpactsëc  
yacno Esus chopanëdash. Ambo choshobien  
daushumbocquidon <sup>10</sup>tedishun Esus  
bëquedtuippanëdash. <sup>13</sup> Adquido yec uano  
tabadquin: –Ëbitedi bëdamboen tantiaquin  
nadatiambocquin naban, icho –cabededpanëdash  
comapenen cuënquin.

<sup>14</sup> Adsho tantiaishun Esusën: –Isadaidbo  
tsusiobo yacno nidshun ismetanta –capanëdash.  
Adoac nidanequi abitedi bëdambudnepanëdash.

<sup>15</sup> Adoac bēdamboed abentsēc dēbidiadanec Nuquin Papan naid chiec onquec choaic <sup>16</sup> Esusēn taēno tsadbudash: —Mimbi bēdameboc bēdambo iquebi —quepanēdash Esus caic. Aidi Samadia yacnocquid isadaidpembo nepanēdash.

<sup>17</sup> Adoaquien: —¿Diestedidambi bēdamepo? — quepanēdash Esus dēbidiadanec choaed caic.

<sup>18</sup> Aden chiashic iccuededquidtedi caic: — Nēidi isadaidpembo yequi dēbidiadanec choash Nuquin Papan naid chiec onquenubi ambi chiacpadomboen bēdameboed utsibo isadaidbo icquimbi Nuquin Papan naid chienquio icpec — quepanēdash Esus. <sup>19</sup> Aden chuishumbic: —Mimbi tantiacpadequi mibi bēdanoque. Nidtoanec nid — capanēdash Esusēn daushumbo icboedi chuiquin.

*Chuiquid dapabēd bēdamboec tabadte chote ushē  
(Mat 24.23-28, 36-41)*

<sup>20</sup> Adshumbic: —¿Chuiquid dapa abentsēcbēd bēdamboec tabadte ushē choaid mitsipadēnquio nuqui ispeque? Tantuanu. Ēbi chui —capanēdash padiseyobon Esus chuiquin.

Adoaquien: —Chuiquid dapabēd bēdamboec tabadte ushē chote ismete nibēdendac. <sup>21</sup> Adecbidi, nēmbobi chuiquid dapa abentsēc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsēcbēd tabadte nēmbobi iquec caimbi —quepanēdash Esus padiseyobo abi chuimeboedo caic.

<sup>22</sup> Aden padiseyobo chuishumbic abēd icquido Esusēn nadopanēdash: —Yuecash natiamiantequid icnuc abuc Esusbēd tabadte ushē chopashun, quec ēbi iste mibi bunquimbi ēbi isenquio mimbi

iquendac. <sup>23</sup> Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. <sup>24</sup> Nuquin Papa yacno bëdamboec tabadte ushë chonoc abu bedquetaniacbimboec uëshëmbo chënquéc ëbi chosho abitedishun isbededendac. <sup>25</sup> Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec — quepanëdash Esus.

<sup>26</sup> Aden chiec Esus abi onquéc: — Ëndenquimboshë Noe tabadnuc matsesën icsamboen tantiaded-tantiadednëdaccpadomboen ëbi choate ushë icnuc adembidi matsesën tantiadenepec. <sup>27</sup> Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic — quepanëdash Esus.

<sup>28</sup> Adec Noe tabadnuc icsamboen tantiec matses tabadaid chiashic, Esus nadpanëdash: — Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iquéc abi bunaiduidtsëqui tantiaquid icoapampic. Nidaidën tabadaiduidquio tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin

aton tied nitsindenequinc, shubu uadenequinc, caquin napampic. <sup>29</sup> Aden nabanquin Nuquin Papan chiaid tantienquo icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dēpesh pasquiacbimboecquid nēdēnquetequid ue sequiachimboec sequequidēn Sodoma yacnocquidtedi Nuquin Papan chiaid tantiesabo unēs uabunepampic –quepanēdash Esus.

<sup>30</sup> Aden chiashic: –Ēbi choate ushē icnuc ěmbi chuibocpadquiec Nuquin Papan chiaid tantiesa yec abi bunaiduidtsēqui tantiaquid iquendac. <sup>31</sup> Shubu macano yacno dectatoash mibi tsadnuc ěbi choate ushē chosho isash budanec mitsana bednu quec shubuno puduedenquo yec cuenta. Adecbidi, tied nantan mibi icnuc aid ushē chosho isash shubu yacno mitsana bednuec nidenquo yec badedquo cuenta. <sup>32</sup> Mibi yacnocquidtedi unēs uanushe bidiadshun isenquo yec cuenta, cac Dod cuenubien aton na tantiec aton chido auchbidi bidiadsho unēs uampidpadquid iquenda. <sup>33</sup> Unēsmane queshun ambi tantiacpadec tabadquid unēsash mēyanacno tabadnubien unēsmane quenquiocquin Nuquin Papa yacno tabadte tantiaquin chuiquido unēsash Nuquin Papa yacnombo tabadendac. <sup>34</sup> Ēbi choate ushē icnuc nad iquendac: Inchēshēn daēd usho Nuquin Papa yacno yuednuen abi tantiaquid bedquin abi tantiesa nianendac. <sup>35</sup> Adembidi, chido daēdshun macueso Nuquin Papa yacno yuednuen abi tantiaquid bedquin abi tantiesa nianoaindac. <sup>36</sup> Adembidi, dada daēd aton tied nantan icsho Nuquin Papa yacno yuednuen abi

tantiaquid bedquin abi tantiesa nianoaindac  
—quepanëdash Esus.

<sup>37</sup> Aden chuisho bëdamboen tantienquiocquin  
abëd icquidon: —¿Mitsimbo budpec, ícho? —  
capanëdash.

Adoaquien: —Unësaid yacno edeste bud-budec.  
Adquiecbidi Nuquin Papan chiaid tantiesa abi  
bunaiduidtsëqui tantiaquid yacno abi cuidtequid  
budendac —quepanëdash Esus abëd icquido caic.

## 18

### *Cadonequidquo chido chiaid*

<sup>1</sup> Adashic, Ëbëd icquido chieshenquo yec  
Nuquin Papa chiec onquian-onquianquidquo  
ma icpanu quec aido tantiamenu quec  
Esus nadpanëdash: <sup>2</sup> —Shubu dadpen yacno  
icsambocquid cuidte chuiquid icposh. Aidi  
Nuquin Papan chiaidbëdta utsibo tantiesa  
icposh. <sup>3</sup> Adnubien uano tabadquid niante chido  
icposh. Aidi icsambocquid cuidte chuiquid  
yacno nidshun: ‘Ëbi icsamboen naquid ma  
cuidnu chuiquiota,’ quequin chuiposh. Aden  
chiaqui padenquiocsho isash choded-chodedquin  
adomboenuidi chuided-chuidedposh.

<sup>4</sup> “Aden chuidoniaqui abi icsambocquin naquid  
cuidte chienquiocboedëmbi chido ënëdenquo yec  
<sup>5</sup> choded-chodedquin adomboembidi chuiasho  
tantiaashun: ‘Nuquin Papabëdta matses tantiesa  
nebi, quequimbi niante ënëdenquo yec choded-  
nesho isun uimabudmane qeshun abi icsam-  
boen naquid cuidte chuiquiono,’ qeshun cuidte  
chuiquidën chuiquioposh.

<sup>6</sup> Aden chiashic Esus: —Choded-chodedquin chidon chuiosh tantias: “Mibi icsamboen naquid cuidte chuinu,” queposh icsambocquid cuidte chuiquid. <sup>7</sup> ¿Adomboembidi ambi cuënaidon, Èbi chieshënquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? <sup>8</sup> Abitedi padenquioctsiash. Utsi nëbimbobi cuidenquioctquin choshon cuidendac. Badedquio cuidenquioctsho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

*Padiseyobo abentsëc icnuc ancanquidën utsin na bedtequid bedmianiaid chiaid*

<sup>9</sup> Adashic, bëdambocquid nebi, quiashtsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash: <sup>10</sup> —Nuquin Papa tabadte shubu uashunaid yacno Nuquin Papa chiec onquenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. <sup>11</sup> Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidën utsin na bedtequid bedmianiaidpadquidpenquio nebi, Papa. <sup>12</sup> Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies



yacno cuëscaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

<sup>13</sup> “Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquio yec abi onquec: ‘Icsambocquin nabanquid nebique. Ëbi tantiaquin pauc, Papa,’ queposh —quepanëdash Esus.

<sup>14</sup> Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yachimboec, Bëdamboquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuioaindac —quepanëdash Esus.

*Bacuëbo Esus yacno bë-bëaid  
(Mat 19.13-14; Mad 10.13-16)*

<sup>15</sup> Adshumbic, aton bacuëbo Esus mishmenuequin utsin-utsinquien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

<sup>16</sup> Aden chuisho tantiash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquio bacuëbo nec. <sup>17</sup> Adomboembidi, Nuquin Papa yacno tabadte iquec, quequin chiac

bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

*Nëbi caniquid chuiquidën chiaid  
(Mat 19.16-30; Mad 10.17-31)*

<sup>18</sup> Adshumbic, nëbi chuiquid caniquidën: — Nuquin Papa yacno nidnuequin ¿atotsimbi nape? Bëdamboen tantiaquidquio icquin ëbi chui. Tantiyanu —capanëdash Esus chuiquin.

<sup>19</sup> Adoaquien: —¿Mitsipaden tantiec bëdambocquid nec, quepe mibi? Nuquin Papauidtsëqui bëdambocquid nec. <sup>20</sup> Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cunesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

<sup>21</sup> Adoaquien: —Canidotsëcquimbi aden nadeniondambi —quepanëdash nëbi caniquid.

<sup>22</sup> Aden chuisho tantiash: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

<sup>23</sup> Aden Esusën chuisho tantiash aton na dadpen tantiec unësquo yanshun Esusën chiacpaden natiapimbo icpanëdash. <sup>24</sup> Adsho isun: —Aton na

dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac. <sup>25</sup> Adquiecbidi shëcuë pistsëcquid puduedte nidaidën capuquid dapan badedquio tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid tantiatiapimbocquid ambibi tantiacpadequi puduedte bunec – quepanëdash Esus.

<sup>26</sup> Aden chuisho tantiash iccuededquido nadpanëdash: –¿Tsutsi Nuquin Papa yacno puduedquid icpec? –quepanëdash Esus caic.

<sup>27</sup> Adoaquien: –Matses ambibi tantiacpadece puduedtiapimbocnoc Nuquin Papambien abi yacno yuedanquid matses tantiamendac – quepanëdash Esus.

<sup>28</sup> Adoaquien Petedo: –Mibëd icnu, quequin ëbëd icquidbëdtan con natedi nianondambi, icbo –quepanëdash Esus caic.

<sup>29</sup> Adoaquien: –Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho <sup>30</sup> ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac –quepanëdash Esus Petedo chiec.

*Ëbi unës uaindac, quequin Esusën chiaid  
(Mat 20.17-19; Mad 10.32-34)*

<sup>31</sup> Adashic, aböd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac.

<sup>32</sup> Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamënshumbededquimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuesten dectanquin unës uaindac. <sup>33</sup> Adoaqui daëdec ushtanec uincuenendabi —quepanëdash Esus aböd icquido chiec.

<sup>34</sup> Aden abi unëste Esusën chuisho aböd icquidon bëdamboen tantienquio yec tabadpanëdash.

*Bëshuaid bëdamiaid*  
(*Mat 20.29-34; Mad 10.46-52*)

<sup>35</sup> Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid. <sup>36</sup> Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanëdash. <sup>37</sup> Adoaquien choquid abentsëc: —Nasaded yacnoësh choquid Esus cuenec nec —quepanëdash.

<sup>38</sup> Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

<sup>39</sup> Adshobien: —Adec cuëdenquio yec tsad —capanëdash choquidon.

Adoaquien bëdiactsëc cuëmboedëmbi comapenquien: –Tsusedpa Dabidën mado mibi icquin ëbi tantiaquin nashunta –caoapanëdash bëshuaidën.

<sup>40</sup> Adoac nidtuidshun Esusën: –Aidi bec cho –cac abi yacno bësho isun: <sup>41</sup> –¿Atotsimbi mibi nashumpeba? –capanëdash Esusën bëshuaid chuiquin.

Adoaquien: –Bëshuaid nebique. Ëbi bëucshune, Icho –capanëdash.

<sup>42</sup> Adoaquien: –Mimbi tantiacpadomboen padpidemboen is –cac <sup>43</sup> badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

## 19

*Saqueyo, ancanquidën utsin na bedtequid bedmianiaid dapa*

<sup>1</sup> Adec nidequi Edico caid yacno datambidanec Esus nidpanëdash. <sup>2</sup> Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. <sup>3</sup> Adoaid icquimbi utsi, Esus cuenec, qesho tantias, ¿Mitsipadquidquio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuactsëcquid icquin Esus Saqueyon isenquio icpanëdash. <sup>4</sup> Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

<sup>5</sup> Adec tsadnubien aid podquedënquio choec nid-tuidshun Saqueyo bushcuctsëccquid istuidshun Esusën: —Nëbi mibi yacno nuquibi tabadec nidnu. Baded bud —cac <sup>6</sup> Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

<sup>7</sup> Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

<sup>8</sup> Adnubien, aton shubu nuntanuësh nidtoash Saqueyo: —Chuinu. Tantia, Icho. Nëbi con na mais uaquin aton na nibëdquid menenun nabono. Adoshombic, con matses: “Con na mimbi ampioc,” qesho tantiaashun ëmbi ampiaidbëdta daëd-daëdquiecnuc daëd uaquin menebanembi —quepanëdash Esus chiec.

<sup>9</sup> Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec. <sup>10</sup> Icsambocquid Saqueyo icbocpadquid nibënquin istuidshun nësecanushe qeshun mënchicnuec chopobi —quepanëdash Esus Saqueyobëd icquido caic.

### *Aton na bedtequid 10ted icquid meniaid*

<sup>11</sup> Aden Esusën chuisho tantiaashun Edusaden yacno choash chuiquid dapa Esus yantsiash, quequin utsibon icsamboen tantiaapanëdash. <sup>12</sup> Aden tantianubi tantiaquidquio icquin utsi chiacbimboen aido tantiamenuen Esusën nadopanëdash:

—Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ <sup>13</sup> qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

<sup>14</sup> “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

<sup>15</sup> “Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid çtedtsi daëd uapashba? abibi qeshun ambi meneboedo chomeposh.

<sup>16</sup> “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

<sup>17</sup> “Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

<sup>18</sup> “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

<sup>19</sup> “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

20 “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. 21 Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quiaşh dacuëdec tsadteniobi,’ queposh.

22 “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbocho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? 23 ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquo icco? Aden meniac daëd uashun bedtsenombi,’ queposh abi chuiquid.

24 “Aden aton na daëd uaisa chuishumbic iccuededquido chuiquin: ‘Ëbi chieshënquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

25 “Adoaquien: ‘Aton na dadpen iqueque. Aid menenda, chuiquid,’ queposh iccuededquido.

26 “Adoaquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. 27 Adembidi ëbi chieshënec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën — quepanëdash Esus.



*Chuiquid dapabimboec yec Edusaden yacno  
Esus choaid*

*(Mat 21.1-11; Mad 11.1-11; Uan 12.12-19)*

<sup>28</sup> Aden chuibanashic Esus Edusaden yacmi nidequi anoentsëqui choash nidtuidpanëdash.

<sup>29</sup> Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash.

Adec nidtuidash abëd icquid daëd caic: <sup>30</sup> —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac.

Aid istuidshun tënëshaid tēchicshun nēmo bēta.

<sup>31</sup> Aden chicsho isash: “¿Atotsi canun mimbi aid chicpe?” quepec. Adshō tantiashun: “Con Icho bunaid nec,” quequin chuita —quepanëdash Esus.

<sup>32</sup> Adoac nidshun istuidtanquin

<sup>33</sup> cabayobitsecquidēmpi tënëshaid tēchicsho isash: —¿Atotsi canuen aid tēchique? —capanëdash icbon.

<sup>34</sup> Adoaquien: —Con Icho bunaid nec —qeshun Esus yacno nimbanquin abi tënëshaidën buampañdash Esusbëd icquidon.

<sup>35</sup> Aden bēshun, Chuiquid dapa Esus nepanui, quec onqeshun Esusbëd icquidon aton dashcute bēntsecquid chictanquin cabayobitsecquid capucshun Esus catsadumpanëdash. <sup>36</sup> Aden

Esus catsadunash nidnubien iccuededquidontsen aton dashcute bēntsecquid chictanquin podqued ansambanec nidanepañdash. Chuiquid dapa Esus nepanui, qeshun aidontsen adopanëdash.

<sup>37</sup> Adec nidanec macuësh Odibos caid budtuidequi iccuededquidtedimbo bēdambo iquec comapenen Nuquin Papan nadatiamboquin naid ambi

isboed naden chiec comapenec onquecueded-panëdash:

<sup>38</sup> —Nuquin Papan chomiaid ambi chuiquid dapa icmiaid ambi bëdambo icmiaidquiobidi nec. Nuquin Papa yacno abëdi bëdamboec tabadequi ic-saisatedi iquendac —quepanëdash iccuededquido comapenec cuëdcuededec.

<sup>39</sup> Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

<sup>40</sup> Adoaquien: —Ëmbi naid chiec aitedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

<sup>41</sup> Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: <sup>42</sup> —Ëbi bëdambo icmequid Esus nec, quec nëbi ëbi tantiaquid mibi ictsiandac. Tantiesa icquin mibi chuiquid mimbi nibënacpadquid mimbi istuidtiapimbo iquendac. <sup>43</sup> Yuecash choquin uimanëmënnquidon mibi cuentiapiimbocnoc tsicatabudcuenendac. <sup>44</sup> Aden mibi tsicatabudcuenshun min bacuëbobëdtabi naimbudquin mibi unës uashun nendac. Min shubutedi nibëdquiendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquio icnuc anocquido chiacbimboec adpanëdash.

*Nuquin Papa tabadte shubu uashunaid yac-noshon cuemiaid*

<sup>45</sup> Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash.

<sup>46</sup> Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

<sup>47</sup> Adoshombic, badiadquidën-badiadquidënquiec Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash. <sup>48</sup> Aden caimbededquimbi Esusën chiaid tantianu quec dadpen Esus datsidadacsho isun ashunquio isadaidbon Esus cuesunemenuen bedtiapimbo icpanëdash.

## 20

*¿Tsundan chuibanta caid mibi ne?  
(Mat 21.23-27; Mad 11.27-33)*

<sup>1</sup> Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. <sup>2</sup> Cho-choshon: —¿Tsundan chuibanta caid mibi neque? Tantianu. Ëbitedi chui —capanëdash.

<sup>3</sup> Adoaquien: –Ëmbia tantianu. Ëbi chui.  
<sup>4</sup> ¿Nuquin Papan ëmbi chiaid chuibanshun mentobanta caidta Uan icpondash? Padenquo mibi quenuc, ¿Matsesën nata caidta nepondash, quequina mimbi tantie? –quepanëdash Esus isadaidbo tsusiobo caic.

<sup>5</sup> Aden chiac isadaidbo tsusiobo onquecuededec nadpanëdash: –Nuquin Papan nata caid Uan pado nepondash, ëbitedi qesho tantiash Esus nadpendac. ¿Atotsieshun Uanën chuisho mibitedishun tantienquo icponda? <sup>6</sup> Matsesën nata caid Uan pado niondash, ëbitedi qesho tantiashun iccuededquidon cuënoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec –quepanëdash isadaidbo tsusiobo.

<sup>7</sup> Adec onquecuededash: –¿Tsuntsin nata caid Uan pado icpondash? quequin tantiambo iccombi –quepanëdash tsusiobo.

<sup>8</sup> Adoaquien: –Mimbi chienquo yacpadembi ëmbitsen ëbi chuita caquid mibi chienquo icoaimbi –quepanëdash Esus.

*Neshcashunquidon icsambocquin naid*  
 (Mat 21.33-44; Mad 12.1-11)

<sup>9</sup> Aden isadaidbo tsusiobo chuishumbic, Utsi chuinu, quiacimboen Esusën nadopanëdash: –Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: <sup>10</sup> ‘Tiedën caniquid ënden bacuëpash. Ëbi neshcashunquidën musucaid con na bedmenu,’ qeshun ambi namiaid aton tied yacno icbon nidmeposh. Nidmiac ambi bedtan

caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoaposh. <sup>11</sup> Adoshombic, icbon aton tied yacno ambi namiaid utsi nidmeoaposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoaposh. <sup>12</sup> Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

<sup>13</sup> “Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembi. Aidi con tied yacno chosho bëdamboen ispec,’ quequin aton mado nidmeposh.

<sup>14</sup> “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesununa. <sup>15</sup> Aden cuesunian icbo unësan aton natedi nuquin na ictsandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiashic Esus:

“ ‘Min mado cuesuniosh,’ quequin utsin chiac ¿atotsi tied icbon napec? <sup>16</sup> Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquo icpashun —quepanëdash iccuededquido. <sup>17</sup> Adoaquien

iccuededquido bëisequi Esus nadpanëdash: —¿Nuquin Papan dada uamiaidën naden chienquioda icpampic? Ai, aidën chuipampid nad iquec: “Shubu uanuequidën isuidaaid buintad utsin ambia nitsinaid icposh.”<sup>18</sup> Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abí yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac — quepanëdash Esus.

<sup>19</sup> Aden Esusën chuisho tantiash: —Nuqui naid chiacbimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

*Sesadën shocoshëmpi neque. Mene, quequin chiaid*

*(Mat 21.45-46; 22.15-22; Mad 12.12-17)*

<sup>20</sup> Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiacimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiatic Esusën icsamboen chuitsiash. Aden chuisho isadaidpembo ancaquidën Esus bedpashun, quequin tantiaquin nidmepanëdash.<sup>21</sup> Aden nidmiac choash Esus ista caid abentsëc: —Mimbi tantiamequin chuibanaid bëdambo iquec, quequin tantiembi, Abitedi Nuquin Papan chiaid abimbo chuibanquid mibi nec.<sup>22</sup> Adquid mibi icquin ëbi chui.

Tantianu. ¿Ancanquid Sesad cuëmédquid isadaid-pembo icquin ambi piucquid shocoshëmpi bec cho caid isadaidbon menetiadquidida nepec? — quepanëdash isadaidbo tsusiobon ista caid Esus caic.

<sup>23</sup> Aden chuisho tantiashun choboedën icsamboen tantiaid tantiaquin Esusën nadopanëdash:

<sup>24</sup> —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

<sup>25</sup> Adoaquien: —Ancanquid Sesadën na nec — quepanëdash tsusiobon ista quequin chomiaid.

Adoaquien: —Ancanquid, Bec cho, qesho meneta. Nuquin Papan naden nata cac adobanta —capanëdash Esusën. <sup>26</sup> Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquio tabadcuededpanëdash.

*Uincuen uaid chido bedesa nec, quequin chiaid  
(Mat 22.23-33; Mad 12.18-27)*

<sup>27</sup> Adashic, saduseyobo caido yec <sup>28</sup> unësaid uincuen uate nibëdec quequin chuiquido Esus yacno chopanëdash. Aïdo choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. <sup>29</sup> Aden Moisesën dada uaid icnuc dada 7ted iccuededposh. Aïdted dada icnuc bëyuc tishaidën aton chido bedshun bacuë tishmiabi yec unësposh. <sup>30</sup> Aton buchi unësan aidën chido bedash adecbidi bacuë tishmiabi yec unësoaposh aton utsi. <sup>31</sup> Adembidi, bëyuc tishaid tsibanquidën-tsibanquidënquien chido abentsëqui

bedto-bedtoec bacuë tishmiabi yec unësbuneposh.  
<sup>32</sup> Yuecash chidotsen unësoaposh. <sup>33</sup> Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tantuanu –quepanëdash saduseyobo Esus caic.

<sup>34</sup> Adoaquien: –Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec. <sup>35</sup> Uincuen uate ushë choan Nuquin Papan bëdamboen isaido abëdi tabadquin chido bedenquoio iquendac. Adembidi, aton champi menenquoio aton papan iquendac. <sup>36</sup> Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquoio iquendac. Nuquin Papan uincuen uatequido aton bacuëbo nendac. <sup>37</sup> Adembidi chuinu. Tantia. Cuëtempi nëdënquiacimboecquid isun Moisesën dada uapampid nec. Cuëte nëdënquiacimboecsho isun Nuquin Papa chuiquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquën papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuipampic. <sup>38</sup> Moisesën tsusedpabo ambi chuiboed ënden unësampidën nami chodquiaidën papa cain Nuquin Papa cuëntiapimbo iquec. Aton nami chodquiash abi tantiaquidquoio icquin tantiec tsadquidën papa cain Nuquin Papa cuë nec –quepanëdash Esus saduseyobo chiec.

<sup>39</sup> Aden Esusën chuisho tantiash Nuquin Papan naden nata quequin chiaid tantiamequid padisey-



obo utsi-utsiec nadpanëdash: –Bëdamboen mimbi chuibanoc –quepanëdash Esus chiec. <sup>40</sup> Aden Esusën chuisho tantiashun Esus chuimetiapimbo utsibo icpanëdash.

*¿Tsuntsin mado Quidistu nepec? quiaid  
(Mat 22.41-46; Mad 12.35-37)*

<sup>41</sup> Aden utsibon abi icsamboen chuimetiapimbo icsho isun Esusën nadopanëdash: –Ëbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec? <sup>42</sup> Dabidën ambibi Sadmo caid dada uaqin naden chuiampic:

“Icbo utsi yec con mado mibi chiembique. Tantia, quequin chiec icbo dapa nadpampic:

‘Ëquë con dayun abiucquo cainec tsadec cho

<sup>43</sup> ma mibi chieshënquidtedi mimbi namiaid ma icpanu,’”

quequin Nuquin Papan Esus chiaid Moisesën dada uapampid nec. <sup>44</sup> Aden Dabid padon dada uaqin ¿mitsipadomboentsibi con icbo cashumbi con mado ëbi caoapampic Dabidën? –quepanëdash Esus abi chieshënquido caic.

*Naden nata quequin chiaid tantiamequid-  
padquid iquenda, quequin chiaid*

*(Mat 23.1-36; Mad 12.38-40; Duc 11.37-54)*

<sup>45</sup> Aden chuishun iccuededquidon tantianubi abëd icquido Esusën nadopanëdash: <sup>46</sup> – Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi

tantiec matses dadpen iccuededacno nidash capuequi, Ēbi bēquedquidon ěbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtenec. Adquidpadquid iquenda.  
<sup>47</sup> Aidon bēdamboen nabanacbimboen nianten natedi bedbanec. Aidombidi Nuquin Papa abimbo tantiacbimboec yuen chiec onquec. Aden bēdamboen nabanacbimboecquido Nuquin Papan comapenen cuidendac. Adoesa bēdiactsēc cuidendac —quepanēdash Esus abēd icquido chiec.

## 21

### *Nianten piucquid shocoshēmpi meniaid (Mad 12.41-44)*

<sup>1</sup> Adashic, Nuquin Papa tabadte shubu uashu-  
 naid yacno tabadtuidash tsadquin Esusën isbam-  
 panēdash. Ambi isaido Nuquin Papa tabadte  
 shubu nacnemetē cuidnu, quequin menequin aid  
 shubun shocosh tabēcaidēn aton na bedtequid  
 utsin-utsinquien sandobededpanēdash. Aton na  
 bedtequid dadpen icquidon dadpen sandobed-  
 edsho isquimbi <sup>2</sup> nianten aton na nibēdquidēmbi  
 aton na bedtequid shocosh daēd ictsēcquid san-  
 dosho ispanēdash. <sup>3-4</sup> Adosho isash: —Chuinu.  
 Tantia. Nianten aton na bedtequid abitedimbo  
 sandoposh. Adosho, Dadpen menequid nec, que-  
 quin Nuquin Papan niantē isec. Utsibon aton na

dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepanëdash Esus.

*Abitedi naimbudte ushë choec quequin chuite  
(Mat 24.1-35, 42-44; Mad 13.1-37)*

<sup>5</sup> Adashic, Nuquin Papa tabadte shubu uashu-naidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

<sup>6</sup> Adoaquien: —Mimbi nëbi isaid yuecash nidbëdquiendac. Matses utsibon nëid shubutedi chic-chicbudendac —quepanëdash Esus.

<sup>7</sup> Adoaquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiente icpeque? Tantuanu. Chui —quepanëdash utsibo.

<sup>8</sup> Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda. <sup>9</sup> Adecbidi: “Cuesnancuededec,” qesho tantiash dacuëndenda. Nuquin Papan chiampic-padequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepanëdash Esus.

<sup>10</sup> Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. <sup>11</sup> Adecbidi, nidaid utsi-utsiec yacno canchednuec ishcut-ishcutendac. Adecbidi, utsi-utsiec yacno bunquiotte iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac.

Adecbidi, mimbi isacmaid abucuësh natiambo icsho mimbi isbededendac.

<sup>12</sup> “Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac <sup>13</sup> aidotsen tantiaquid yantsiash queshun ëbi chuibanta. <sup>14</sup> Aden buanaqui, ¿atotsimbi ancanquid cape? quequin tantiec tsadenda. <sup>15</sup> Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënquido iquendac. <sup>16</sup> Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. <sup>17</sup> Ëbi tantiaquid chieshënquid dadpen iquendac. <sup>18-19</sup> Aden nabanquin mibi cuesunemenu, cac chieshenquio yec, Esus tantiaquid nebi, quequid icta. Adquid iquéc unësash ënëdenquio yec Nuquin Papabëd mibi tabadendac.

<sup>20</sup> “Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushë choec, quequin mimbi tantiendac. <sup>21</sup> Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquio cuempanuna.

Adecbidi, dëuequido Edusaden yacno ma nidenquiocpanuna. <sup>22</sup> Aid ushë icnuc Nuquin Papan chiacpadomboen cuidtequid iquendac. <sup>23</sup> Aid ushë chonoc matses utsibon Edusaden yacno tsicatebudac pete naimbudnuc bacuë usunquidobëd bacuë chishmequido mëyadec natiaquiendac. Edusaden yacnocquido abi tantiesabo icsho Nuquin Papan natiambocquin cuidte iquendac. <sup>24</sup> Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

<sup>25</sup> “Adec Nuquin Papa, Chën, quian badiadën ushë, inchëshën ushë uispa chedo aidtedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindac. <sup>26</sup> Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac. <sup>27</sup> Adnubini Nuquin Papan chomiaid matsesaid ëbi dasiuidaid bëchomauanquiec ushë chënquiacbimboec uëshëmbo yec nadatiambocquin nabanquidquio abu ushun ëbi budsho matsestedishun isbededendac. <sup>28</sup> Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdambocquin abuc isteneta —

quepanëdash Esus.

<sup>29</sup> Aden chuishumbic ambi chuibloed ushë chote tantiamenuen nadopanëdash: <sup>30</sup>—Cuëtempî bacuëacsho isash, Ęnden suc seccuduquiac nēbi seta taēc, quequin matsesën tantiec.

<sup>31</sup> Adembidi ěmbi chuibloed icsho isun, Nuquin Papabëd tabadte ushë choec, quequin mimbi tantiec. <sup>32</sup> Abimbo chiembique. Tantia. Ęmbi chuibamboed naimbudabicnuc con tan matses isadaidbo naimëdbudenquio iquendac. <sup>33</sup> Abubëdta naimbudtequid nidaid nendac. Ęmbi chiaid abimbo iquendac.

<sup>34-35</sup> “Adembidi chuinu. Tantiata. Nidaidën capuquidën, Nēbi ěbi sec, quequin tantienquio yec capusho badedquio siac cuentiapimbo iquec. Adembidi, Natiate ushë choec, quequin tantienquio yec chieshquin badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsesedi cuidte ushë choenda ictic? Ai, aid ushë choendac, quequin caimbudec bëdamboec tabadta. <sup>36</sup> Ęnenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ěbi icme, Papa. Adembidi natiambocquin cuidte ushë chonoshe queshun ěbi mënchicta, Papa. Aid ushë chonoc ěbi bedshun mimbi chomiac matsesaidën dayun tsadquidquio ěbi icmeta, Papa, quec onquedeneta —capanëdash Esusën.

<sup>37</sup> Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen

Esusën chuided-chuidedpanëdash. Adecbidi  
 inchëshquidën-inchëshquidënquiec macuësh  
 Odibos caid yacno nidash tabadtenepanëdash.  
 38 Adembidi, badiadquidën-badiadquidënquien  
 Esusën chuibansho tantianuequido Nuquin  
 Papa tabadte shubu uashunaid yacno choded-  
 chodedpanëdash.

## 22

*Esus bedmenu, quequidquio Udas*

*(Mat 26.1-5, 14-16; Mad 14.1-2, 10-11; Uan 11.45-53)*

<sup>1</sup> Adashic, nami uabicquid pete tantiate  
 ushë, Pascuas caid, anoentsëqui yampanëdash.  
<sup>2</sup> Aid ushë choabicnuc isadaidbo tsusiobobëd  
 Nuquin Papan naden nata quequin chiaid utsibo  
 tantiamequido iccuededtenequin, ¿Mitsipaden  
 Esus bedshun cuesuneque? Isnu, quequin  
 isted-istedpanëdash. Aden isted-istedtanquin  
 Esus tantiec datsidquido dadpen icsho isash  
 dacuëdquin Esus bedenquio icpanëdash.  
<sup>3</sup> Adnubien Udas cashumbic Iscadiote caid  
 Esusbëd icquid dapudedshun Satanasën  
 tantiamiac <sup>4</sup> Esus chieshënquid yampanëdash.  
 Adquid yanash padiseyobo tsusiobo yec  
 isadaidbo tsusio utsibo yec Nuquin Papa  
 tabadte shubu uashunaid isquido yec quec Esus  
 chieshënquid utsibo iquec quianec aido yacno  
 Udas choash, Esus bedmete bunebi, quequin  
 chuipanëdash. <sup>5</sup> Aden chiac isadaidbo tsusiobo  
 bëdambo iquebi quetanquin: —Esus bedmiacsho  
 mibi piucquid menenu —capanëdash Udas  
 chuiquin. <sup>6</sup> Adoaquien: —Adonuna —quianec

Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembi, quequin isted-istedpanëdash Udasën.

*Ënquin nidaidënshun Esusën pebanaid  
(Mat 26.17-29; Mad 14.12-25; Uan 13.21-30;  
1Cod 11.23-26)*

<sup>7</sup> Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe queshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash.

<sup>8</sup> Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

<sup>9</sup> Adoaquien: —¿Mitsishumbimbi aid nacnempe? —quepanëdash Uambëd Petedo.

<sup>10</sup> Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun <sup>11</sup> shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. <sup>12</sup> Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

<sup>13</sup> Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.



14 Adashic, inchëshën choash aböd icquidoböd  
 pete sante cuate dayun uequi Esus: 15 —Ëbi  
 mëyante yanabicnuc bëyuc tishaid cuesuni-  
 anquidën cuesunenquiocquin matanampid  
 tantiaquin pec mibëdi tabadtiadquio yanobi.  
 16 Matanampid tantiaquin obeca cuesuneshun  
 nuqui pebocpadomboen mibëdtambi  
 nidaidënshun padpiden penquio iquendambi.  
 Matses icsaquid icsho cuidnushe qeshun  
 obecaded cuesuniaidpadquiocquid yanshun  
 Nuquin Papa yacno choash tabadquidobëdtambi  
 ashunquio pendambi —quepanëdash Esus.

17 Adoshombic dëshote sananec Nuquin Papa  
 chiec onqeshun actanquin aböd icquido menec:  
 —Në, aniactse-aniactsen acban mibitedishun.  
 18 Tiedën caniquid ënë nidaidënshun padpiden  
 aquenquio iquendambi. Nuquin Papa  
 yacno choash tabadquidobëdtambi ashunquio  
 aquendambi —quepanëdash Esus.

19 Adoshombic, pete bedshun Nuquin  
 Papa chiec onqeshun cuësh-cuështanquin  
 menebanquin: —Mibi icsaid bedshunacsho  
 ëbided cuidquin mëyanquin cuesuniaid tantiaquin  
 pebeded —capanëdash Esusën.

20 Adoshombic pete utsi petanquin dëshoten  
 sicaid cushtoshon menec: —Ënden, Icsambocquin  
 naombi, qeshun obecaded cuesunemenuen  
 isadaidbon menedeniac. Aden cuesuniaidën  
 intac siquéc unëso isun, Obeca cuesuneboed ëbi  
 icsaquid icsho cuidnushe qeshun cuidtequid  
 nec, quiampicpaden abi chiec. Padnuen nëbi  
 unës uashun siac aton intac siquéc matses  
 icsaid bedshunash Esused cuidadac, quequin

tantiatequidquo nendac. <sup>21</sup> Ĕbi chieshënquido ěbi bedmenuequin chuiquid pete sante dayun ěbědi uec. <sup>22</sup> Nuquin Papan chiampicpaden ěbi matsesacsho uněs uaid iquendac. Ĕbi chieshënquido bedmenuequin chuiquid comapenen cuidte iquendac –quepanědash Esus.

<sup>23</sup> Aden Esusěn chuisho tantiash aběd icquido: – ĵMidacquidien capec? –quecuededpanědash.

<sup>24</sup> Adashic: –Dosedet nuqui iquec. ĵTsu-dain chuiquid icpec? quequin utsibon ispec – quepanědash Esusběd icquido.

Aden chuitanec, Chuiquid nec, quequin utsibon ěbi ispec, Esusběd abitedi něishash comapenec chushcanampanědash. <sup>25</sup> Adec chushcanansho tantiash Esus nadpanědash: – Isadaidpembo ancaquiděn comapenen aton matses namebanquin daědpactsěc menebanec.

Aden meneshun, Ĕmbi namiaido bědambo icmequid nebi, quequin muaquin chiec. <sup>26</sup> Mibitedi adquid iquenda. Nadquidquo icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta.

<sup>27</sup> Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Něbi mibědi pec tsadequi mibi nashunquid nebi. <sup>28</sup> Ĕbi chieshënquido icnuc ěbi nianesa <sup>29</sup> icsho con Pan ěbi chuiquid icmiacpadquid chuiquid mibitedi icmendambi. <sup>30</sup> Aden chuiquid icmiac ěběd icquin ěbědtambi peshun aquec mibitedi tabadendac.

Chuiquid icquin abuc tsadte icquiděn tsadquin isadaidbon naid bědabědta ambi naid icsa cuidte

ëbëdtambi mimbi chuibanendac —quepanëdash  
Esus abëd icquido caic.

*Esus ëmbi isacmaid nec, quequin Petedon chiaid  
(Mat 26.31-35; Mad 14.27-31; Uan 13.36-38)*

<sup>31</sup> Aden chuishumbic Esusën nadopanëdash: —  
Mibi chuinu. Bëdamboen tantia, Simon. Mibitedi  
Satanasën yuatiadquio iquec. Aden yuanuequin  
piacbo macuesquin nainshun bitsi secacimboen  
mëyantankuin ëbëd icboedi mibi cuëshëdmetiadquio  
iquec. <sup>32</sup> Aden mibi Satanasën yuatiadquio iquec,  
quequin tantiaquin Nuquin Papa naden chiombi.  
Simon ëbëd icquidquio iqueque. Yuadnushe  
queshun Satanasën niac-niacmete chiaid Petedo  
tantienquio icmeta, Papa, quequin chiombi. Adec  
ëbëd icboedi cuëshëdtsembosh choashun comape-  
nen ëbi tantiaquin ëbëd icquid utsibo adom-  
boembidi comapenen ëbi tantiameta, Simon —  
capanëdash Esusën Petedo chuiquin.

<sup>33</sup> Adoaquien: —Mibi caic, Quënën nauednu,  
quenuc mibëdi naudedebi. Adecbidi mibi caic,  
Unës uanu, quenuc adecbidi mibëdi unës uadebi,  
Icbo —quepanëdash Petedo Esus caic.

<sup>34</sup> Adoaquien: —Chuinu. Tantiata, Petedo.  
Cachina bënë cuëdanabicnuc nëid inchëshëmbi,  
Esus ëmbi isacmaid nec, mibi queded-  
quededendac —quepanëdash Esus.

*Buanenda, queboedëmbi, Buanta, quequin chiaid*

<sup>35</sup> Aden Petedo chuishumbic abëd icquidtedi  
chuiquin: —Mitsana bedtequid buanenquio yec  
shictoade buanenquio yec dashcute utsi buanen-  
quio yec quec nidaneta, ëmbi cac nidash ¿mibitedi  
bunecta tabado? —capanëdash Esusën.

Adoaquien: –Padenquio –quepanëdash abëd icquido.

<sup>36</sup> Adoaquien: –Ënden adquid buanenda, queboedi, Ëbi nibëdnuc mitsana bedtequid shictoadtebëdtabi buanta. Chështe bednu, qeshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. <sup>37</sup> Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboemi nëbimbobi naimbudemi –quepanëdash Esus.

<sup>38</sup> Adoaquien Esusën chuiboed tantienquio yec abëd icquido: –Në, chështe daëd iqueque. Is, Icho –quepanëdash.

Aden abëd icquidon tantienquiocsho isash: –Ai, padi –quepanëdash Esus.

### *Macuësh Odibos caid yacnoshon Esusën Nuquin Papa chiaid*

*(Mat 26.36-46; Mad 14.32-42)*

<sup>39</sup> Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash. <sup>40</sup> Adec nidequi abi tabadteniacno choshon Esusën: –Chieshëmëñquidën ëbi namete bunacpaden natiapimbocquid ëbi icme, Papa, quequin Nuquin Papa chuideneta –capanëdash abëd icquido chuiquin. <sup>41</sup> Aden chiashic abiuidtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: <sup>42</sup> –Mëyanquin mibi

unës uanu, ëbi chieshënquidon casho tantiash bunenquio yec, Adoenda, quepatsiac mibi Papa. Adoshombic mibi bunacpadomboen nameta, Papa –capanëdash Esusën Nuquin Papa chuiquin. <sup>43</sup> Aden Esusën baded-badedquien chuishobi Nuquin Papan uaid mayan bëda choshon Esus chieshtomenquio icpanëdash. <sup>44</sup> Aden uidën uaqui adec uëshquec Nuquin Papa chuiquiequi ichacbëd intacash nidaidën siquepanëdash.

<sup>45</sup> Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: <sup>46</sup> –¿Atotsi quiash ushe? Nidtoashon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta –capanëdash Esusën abëd icquido chuiquin.

### *Esus bedaid*

*(Mat 26.47-56; Mad 14.43-50; Uan 18.2-11)*

<sup>47</sup> Adec Esus onquenubien Esusbëd ichoedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: <sup>48</sup> –¿Ëbi matsesaid icsho bedmuen tanchoccaquinda ëbi chieshënquido isme, Udas? –quepanëdash Esus.

<sup>49</sup> Aden Udasën nac Esus bednuesho isash Esusbëd icquido: –¿Cho-choquido nuquida cuesten cuespe? –quec <sup>50</sup> onquetanquin abentsëcshun isadaidbo tsusio dapan yuan pabiate opioc pateshunepanëdash.

<sup>51</sup> Adosho isash: –Padi. Chën. Adoenda –quetanquin Esusën tsusio dapan yuan pabiate patiacno mishquin bëdamepanëdash.

<sup>52</sup> Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, queshunda utsin-utsinquier chështe sananubi utsin-utsinquier cueste sananec cho-chopec? <sup>53</sup> Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

*Ëmbi isacmaid nec, Petedo quiaid*

*(Mat 26.57-58, 69-75; Mad 14.53-54, 66-72; Uan 18.12-18, 25-27)*

<sup>54</sup> Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. <sup>55</sup> Adec choec umanuc cuëte dëtsiadaoaid cuëc utsibo tabadacno Petedo cuëte cuëc tsadpanëdash. <sup>56</sup> Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

<sup>57</sup> Adoaquien: —Bëboed ëmbi isacmaidquio nec —quepanëdash Petedo.

<sup>58</sup> Adashic, yuecpectsëcshun Petedo isec utsisen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquio iccobi —quepanëdash Petedo.

<sup>59</sup> Adashic yuec-yuecpactsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queoapanëdash.

<sup>60</sup> Adoaquien: —Mimbi chiaidbëd icquid-penquio nebi —quepanëdash Petedo. Aden chuinubien cachina bënë cuëdampanëdash.

<sup>61</sup> Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash <sup>62</sup> unësquio yec umanuc nidash Petedo shubiquioplanëdash.

*Esus sondadon mamënshunaid  
(Mat 26.67-68; Mad 14.65)*

<sup>63</sup> Adshumbic Esus cuenushe queshun abi isquidon, sondadon, Esus mamënshumbededquin cuesbededpanëdash. <sup>64</sup> Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquio icquin

¿midaquidën mibi nëbi cueseque. Tantianu. Chui —capanëdash Esus chuiquin. <sup>65</sup> Aden cuesbededquin Esus icsamboen chuipanëdash.

*Isadaidbo tsusiobo yacno Esus buanaid  
(Mat 26.59-66; Mad 14.55-64; Uan 18.19-24)*

<sup>66</sup> Adshumbic badiadnubi isadaidbo tsusiobo iccuededacno Esus buanshun <sup>67</sup> nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tantianu. Chui —quepanëdash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquio iquendac. <sup>68</sup> Adembidi, ¿Mitsipadquidquio Nuquin Papan chomiaid

neque? Tantuanu. Èbi chui, cac ècbedenquio mimbi iquendac. <sup>69</sup> Nad iqueque. Chuinu. Tántia. Matsesash nidaidèn tabadboedi ambi nadatiambocquin naidènquio Nuquin Papan dayunquio tsadendabi —quepanèdash Esus isadaidbo tsusiobo tantiamequin chiec.

<sup>70</sup> Adoaquien: —¿Nuquin Papan madombobi nebi, quequina chio? —quepanèdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanèdash Esus isadaidbo tsusiobo caic.

<sup>71</sup> Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unès uatiad, quequin tantiashun, Esus icsaosh, quequin chuiti-adquiocquin chuita, cainquio iquembi utsibo chuiquin. Adquid iquec, quequin nuqui tantiec —quepanèdash isadaidbo tsusiobo.

## 23

### *Pidato yacno Esus buanaid*

*(Mat 27.1-2, 11-14; Mad 15.1-5; Uan 18.28-38)*

<sup>1</sup> Aden ambibi chiec Esus muc nec, isadaidbo tsusio abentsèc qesho tantiash isadaidbo tsusiobotedi nidtoshon Esus bedshun Pidato yacno buampanèdash. <sup>2</sup> Aden Pidato yacno Esus bèec choash: —Esusèn chuibansho tantiash, Cuèshèdmianquid nec, quequin mibi yacno bèombi. Nèid ancanquid dapa Sesadèn, Shocoshèmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanèdash isadaidbo tsusiobo Pidato chiec.



<sup>3</sup> Adoaquien Pidato: —¿Isadaidbo chuiquid da-pada ne? —quepanëdash Esus caic.

Adoaquien: —Mimbi chiaidquio abimbo iquec —quepanëdash Esus.

<sup>4</sup> Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

<sup>5</sup> Adoaquien: —Ambi tantiamiaidënquio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiamoaposh —quepanëdash isadaidbo tsusiobo Pidato caic.

### *Edodes yacno Esus buanaid*

<sup>6</sup> Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

<sup>7</sup> Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

<sup>8</sup> Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec <sup>9</sup> Esus chuimenu quec Edodes onquepanëdash. Adoaqui Esusën ëcbedenquio icpanëdash. <sup>10</sup> Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. <sup>11</sup> Adoac Edodesbëd sondado Esus icsamboen chuiquin

mamënshumbededshumbi chuiquid dapan  
dashcutebimboecquid abichobicquid Esus  
dasiuinshun Pidato yacno buameoapanëdash.  
<sup>12</sup> Mimbi tantiacpaden Esus cuidta, quequin  
Pidato chuita, quequin Edodesën chuitanquin  
Pidato yacno Esus padpiden buamepanëdash.  
Adoac Edodesbëd Pidato bëdambo yampanëdash.

*Esus cuesten dectameta quiaid*

*(Mat 27.15-26; Mad 15.6-15; Uan 18.39-19.16)*

<sup>13</sup> Adashic, isadaidbo tsusiobobëdta isadaidbo  
utsibo chomeshun <sup>14</sup> Esus ismetanquin  
Pidaton nadopanëdash: –Nëid dada bëash:  
“Cuëshëdmianquid nec,” quequin mimbi ëbi chioc.  
Adoac aibdëdi onquiash, ¿Cuëshëdmianquidta nedic?  
quendabi. <sup>15</sup> Aden ëmbi tantiacpadomboen  
tantiaquin Edodesën ëbi yacno chomeoaposh.  
Esus unës uainquioctiadquidi nec. <sup>16</sup> Aden  
tantiaquin mëyanshun aidi nidmenuna –  
quepanëdash isadaidbo tsusiobo caic.

<sup>17</sup> Aden chiac naden isadaidbon tantiapanëdash.  
Setan-setanquien icsambocquid con matses  
quënën nauedaid abentsëc ambi nidmiacpaden  
nëbi adquid utsi Pidaton nidmetsiash, quequin  
tantiec isadaidbo nadec cuëdcuededquin: <sup>18</sup> –Nëid  
Esus caid unës uatiadquidi nec. Mimbi quënën  
nauednëdaid Badabas cuëmëdquid puduemetata  
–capanëdash comapenec cuëdcuededquin  
isadaidbon. <sup>19</sup> Ancanquid bunenquiocquin  
utsibo cuëdcuededmiondaid utsi cuesuniondaidbidi  
Badabas icsho quënën nauedmepanëdash.

<sup>20</sup> Adec isadaidbo cuëdcuededsho tantiaish Esus  
nidmetiadquio iquéc: –Esus cuidenquiocti-  
adquidi nec –quepanëdash Pidato isadaidbo caic.

<sup>21</sup> Adnubien: —Cuesten dectame —capanëdash isadaidbon yuec comapenec cuëdcuededquin.

<sup>22</sup> Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantianu. Ma unës uainquiociadquidi neyoc. Aden tanti-aquin mëyameshun Esus nidmembali —quepanëdash Pidato.

<sup>23</sup> Adoaquien: —Cuesten dectame —quepanëdash cuëdcuededoaic isadaidbo Pidato, Ai, camenuc.

<sup>24</sup> Adoac iccuededquidon chiacpaden namenuen <sup>25</sup> Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

*Esus mëyanaid*

*(Mat 27.32-44; Mad 15.21-32; Uan 19.17-27)*

<sup>26</sup> Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuiddanquin Esus dectante cueste Simon buamiac Esus tsibambëpanëdash. <sup>27</sup> Adec Esus nidsho isun matses dadpenshun shubiquin tsibanampanëdash. Adembidi abi tsibanquid chidobo icpanëdash. <sup>28</sup> Adec chidobo abi tsibanec shubisho tantiash bidadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta. <sup>29</sup> Yuecash mëyantequid ushë choendac. Aid ushë chonoc bacuë tishtiapimbocquid caic utsibo nadendac: “Bacuëbo nibëdquid icquin min bacuëbo natiasho

isenquo mimbi iquec. Adquid yec bédamboshë mibitedi iquec.” <sup>30</sup> Mëyantequid ushë chonoc matses utsibon natiambocquin mëyanaqui naden mimbi Nuquin Papa chiendac:

“Natiastianqueque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

<sup>31</sup> Èbi buansho isec shubiequi, Èbi mëyantequid ushë choec, quequin tantiesa mibi icpec. Nèdënquenquioctiadquidi achuëshquiocquid nèdëncasho isash: “¿Tanunquiocquid badedquo nèdënquenquo icpec,” quecta mibi icti? Adembidi: “Cuidenquioctiadquidi nec,” queboedëmbi èbi icsaisa unës uasho isash: “¿Èbitedi icsambocquid comapenen cuidenquo icpec,” queoapecta mibi ique? Ai, quequin tantiatad —quepanëdash Esus.

<sup>32</sup> Adnubien Esusbëdta icsambocquid dada daéd nidmequimbi <sup>33</sup> macuësh mapi canite caid yacno choshombi èquë daéd dectambudcuentanquin nënantanquo Esus dectampanëdash. <sup>34</sup> Dectanac diadequi Esus Nuquin Papa caic: —Èbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacbimboec bèpiscudta, Papa —quepanëdash. Adnubic Esusën dashcute bednuequin sondadon dada uashun tēchun sandoshon cadotanequin dada uatempi puduemebanquin isquin Esusën dashcute bedbampañdash.

<sup>35</sup> Adnubien matses dadpenshun isnubi Isadaidbo tsusiobo isec tabadquin

mamënshumbedec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

<sup>36</sup> Adembidi sondadon mamënshumbedequin paëmbocquid mucambocquid sananquin Esus ismequimbi: <sup>37</sup> —Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

<sup>38</sup> Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

<sup>39</sup> Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

<sup>40</sup> Adec Esusbëdta dectamboed abentsëc onquesho tantiash aïdbëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? <sup>41</sup> Icsamboen nabanacsho cuidaid ëbi daëdi nec. Aidi bëdamboequin nabanquid icsho cuidenquioctiadquidi nec —quepanëdash.

<sup>42</sup> Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

<sup>43</sup> Adoquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi

iquendac –quepanëdash Esus abëdta dectamboed abentsëc chiec.

*Esus unësaid*

*(Mat 27.45-56; Mad 15.33-41; Uan 19.28-30)*

<sup>44</sup> Adec onquenubi ushë cuembo yanuc bëtinacimboec inchëshquio yashic ushë budtsan chënquedoapanëdash. <sup>45</sup> Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquio yec canchedbudcuempanëdash. <sup>46</sup> Adnubien unësbudec comapenec cuëdec: –Mibi yacno ëbi yuedta, Papa –quiash Esus unësbudpanëdash.

<sup>47</sup> Adec Esus unëso isequi ambi isboedtedi tantiaquin Nuquin Papan naid chiec sondado chuiquid: –Abimbo chiosh. Cuesten dectanaid Esus caid bëdambocquid niosh. Aidi unësenquioctiadquidi unës uaposh –quepanëdash. <sup>48</sup> Ambo tabadquin isquid utsibo Esus unëso isash unësquio yec aton shubuno nidanepanëdash. <sup>49</sup> Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

*Esus nauedaid*

*(Mat 27.57-61; Mad 15.42, 47; Uan 19.38-42)*

<sup>50</sup> Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash. <sup>51</sup> Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste

bunquin cainquidquo icpanëdash. <sup>52</sup> Aidi Esus unëso isash Esusën dada nauedtiadquo yec Pidato yacno nidshun ambi tantiacpaden Osen chuipanëdash. <sup>53</sup> Aden chiaquien Pidaton: — Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquo Esus Osen badedquo nauedpanëdash. <sup>54</sup> Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

<sup>55</sup> Adnubien: Naudednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash. <sup>56</sup> Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnuc Nuquin Papan chiacpadec chonoadtemaid ushë nec, quiash Esus nauedacno nidenquo yec tabadpanëdash. Nuquin Papan chiacpadec tabadpanëdash.

## 24

### *Esus uincuente*

*(Mat 28.1-10; Mad 16.1-8; Uan 20.1-10)*

<sup>1</sup> Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpanëdash. <sup>2</sup> Ambo choshon Esus nauedshun bëtashaid cuënote shëcniacsho isashi <sup>3</sup> shëcuën puduedash aton Icho Esusën dada nibëdsho isec tabadpanëdash.

<sup>4</sup> Adec tabadnubien dada daëd dashcute

dasiuidacbimboec      dasiuidash      chënquec  
 chopanëdash. <sup>5</sup> Aid isash dacuëdcuededequi  
 isenquoio yec chidobo tabadpanëdash. Adsho isash  
 dada daëd: —¿Atotsi canuen unësacsho nauedac  
 uincuemiaid nibëne? <sup>6</sup> Nëmbo nauedboedi  
 nibëdec. Aidi uincuenaccosh. ¿Aidi Cadidia yacno  
 mibëdi tabadquin chuisho tantienguio da icco?  
<sup>7</sup> Naden Esusën mibitedi chiondash: “Matsesaid  
 ëbi icsho bedshun icsambocquid ëbi menendac.  
 Aden meniac cuesten dectanac daëdec ushtanec  
 uincuenoabi,” quequin Esusën chiondash —  
 quepanëdash dada daëd chidobo caic. <sup>8</sup> Aden chiac  
 chidobon Esusën chiaid abi bëpiscudaïd padpiden  
 tantiapanëdash.

<sup>9</sup> Aden tantiash Esus nauedaid shëcuë yacnoësh  
 puduenanec Esus tantiaquid dadpen tabadacno  
 choec puduedshun ambi isboedbëdtabi ambi  
 tantiaboed chidobon chuibampanëdash. <sup>10</sup> Madia  
 shubu dadpen icquid Mactada caïd yacnoshon  
 tishaid yec Uana yec Madia utsi Uambëdtan  
 Acobon tita yec chido utsibo yec quec choshon  
 Esusën Ëbi chuibeneta caïdo chuipanëdash.  
<sup>11</sup> Aden chuisho tantiash: —Mimbi chiaïd  
 tantiatiapimbo iquebi —quecuededpanëdash  
 iccuededquido. <sup>12</sup> Adnubien Petedo nidtoanec  
 titinquec nauedaid shëcuë yacno choash  
 shuebudquin shëcuë anisquin dataniaïd  
 dashcuteuidi uesho ispanëdash. Aden isanec  
 nidequi: —¿Atodain nechitec? —quepanëdash  
 Petedo tantienguio yec.

*Emaus yacmi nidte*  
*(Mad 16.12-13)*



<sup>13</sup> Adashic abi ushëmbi Edusaden yacnoësh utsi-bobëd iccuededboed dada daëd shubu daëdpactsëc icquid Emaus caid yacno nidpanëdash. <sup>14</sup> Adec nidequi ambi Edusaden yacnoshon isboedbëdta ambi tantiaboed chiec onquepanëdash. <sup>15</sup> Aden chiec onquec nidshobi Esusën aid daëdi chin-unash aidobëd nidpanëdash. <sup>16</sup> Aden abi chinuntuidsho isac utsibimboec Esus isadpanëdash.

<sup>17</sup> Adec nidequi Esus: —¿Atotsi chuibanec onquec nide? —quepanëdash. Adsho tantiash unësquio yec mamënenquio yec nidtuidpanëdash.

<sup>18</sup> Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanëdash Esus caic.

<sup>19</sup> Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiai id icquin ambi chuibaniaid ambi nabanaidbidi Nuquin Papabëdta matses dadpenshun bëdamboen isaid icposh. <sup>20</sup> Nuquin tsusio dapabobëdta nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh. <sup>21</sup> Nëbi chuiquid dapa isadaidpembo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Èmbi caboedi unës uaposh. Aidi unës uan daëdec ushobi. <sup>22</sup> Adec daëdec ushun dacuëdanquiecnuc chidobon naden chuibededpash: “Esusën dada nauedbocno badiadnuc nidshun isac <sup>23</sup> nibëdosh. Ambobi

icnubi Nuquin Papan uaido mayan bēdabo daēd icsho isac, ‘Mimbi nibēnaid nibēdec. Uincuenac,’ quiosh,” quequin chidobon chuiposh. <sup>24</sup> Aden chidobon chuisho tantienquo yec ēbēd icquido Esusën dada nauedbocno nidshun chidobon chuibocpadembi unēs uaboed nibēdsho isposh —quepanēdash ambi chinunaido Esus chiec.

<sup>25</sup> Adoquien: —Ma bēdiactsēc tantiaquid mibi daēdi neyoc. Nuquin Papan ambi chiaid chuimiaidon dada uampid bēdiactsēc tantiatsec tantiesabidi ma mibi neyoc. <sup>26</sup> ¿Bēdamboec tabadacno chuiquid dapa icnuec Esus mēyanaidba iquendactiosh? —quepanēdash Esus. <sup>27</sup> Aden chuibanquin Moisesën dada uampidbēdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibampanēdash.

<sup>28</sup> Aden chuibanequi shubu daēdpactsēc icquid Emaus caid yacno anoentsēqui choshon datanshobimboecnuc Esus isun: <sup>29</sup> —Inchēsheque. Nēmbo ēbi yacno tabadec cho —abi daēdshun cac nidash aidobēd tabadpanēdash.

<sup>30</sup> Adashic, shubu nuntan pete sante dayun abēdi uequin pete bedshun Nuquin Papa chuishun cuēsh-cuēshun Esusën menebampanēdash. <sup>31</sup> Aden nasho isun badedi, Esus nec, quequin tantianubi Esus nibēdquo yampanēdash. <sup>32</sup> Adsho isash: —¿Podquedēn choquin Nuquin Papan chiaid dada uampid chuisho tantias, Bēdambo yanobi, quenquiodabi ēbi daēdi ictio? —quepanēdash Esus yuedquido.

<sup>33</sup> Aden chuitanequi Emaus yacno choaed daēd badedi Edusaden yacno nidoapanēdash.

Edusaden yacno choash Esusbëd icquido 11tedbëdi utsibo iccuededacno puduedacsho isash: <sup>34</sup> —Abimbo iquec. Nuquin Icbo uincuempaccosh. Uincuenanec choquin aidëmbi Simon ismetuidposh —quepanëdash iccuededquido. <sup>35</sup> Aden iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

*Abëd icboedo yacno Esus chote*

*(Mat 28.16-20; Mad 16.14-18; Uan 20.19-23)*

<sup>36</sup> Adec onquecuedednubi nënantanquio choshon Esusën: —Nuquin Papan bëdamboen isaïdo yec dacuëdenquio yec tabad —capanëdash.

<sup>37</sup> Adec aid chosho isash: Podo bitsi nec, quec dacuëdequi abëd icquido tabadpanëdash. <sup>38</sup> Adsho isashien Esus: —¿Atotsi quiash, ¿Esusida nepec? mibitedi quepe? <sup>39</sup> Con mëdantebëdta con taë is. Èbibi nebique. ¿Mëtoccaïd taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

<sup>40</sup> Aden chuitanquin abi bëchun shuin mëtoccoïd chiuë aton mëdantebëdta aton taë Esusën ismepanëdash. <sup>41</sup> Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien <sup>42</sup> nuëcquid shëaid cuëshë menepanëdash.

<sup>43</sup> Aden meniac bedshun Esusën pepanëdash abëd icquidon isnubi.

<sup>44</sup> Aden piash: –Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi –quepanëdash abëd icquido tantiamenuc.

<sup>45</sup> Aden chuishumbic abëd icquido tantiamequioquin: <sup>46</sup> –Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqui daëdec ushash uincuenendac.

<sup>47</sup> Aid tantiashun mibi icsaid mimbi ënsho isash, Icsaquid nec, quenquo yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoaindac.

<sup>48</sup> Mëyanquin unës uaqui ëbi uincuenacsho mibitedishun ispoc. <sup>49</sup> Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” –capanëdash Esusën.

*Esus abuc indote  
(Mad 16.19-20)*

<sup>50</sup> Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: –Nëidtedi bëdamboen ista, Papa –quepanëdash Esus. <sup>51</sup> Aden chiacsho abëd capucuenequido niamequin Esus aton

Papan abuc indopanëdash. <sup>52</sup> Aden indosho isash, Ëbitedishun icbo nec, quequin ismec shuebudash: –Bëdambo iquebi –quianec Edusaden yacno nidanepanëdash. <sup>53</sup> Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nited-nitedquin Nuquin Papan naid chuidenepanëdash.

Padi. Aited dada uaombi, Teyopido.

## **Esuquidistu Chuiquin Tantiamete New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Matsés

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022

446da786-5bd1-5ffa-85e2-9eff4052cf8b